

《雜阿含經・道品》

譯者：求那跋陀羅法師

編輯：林崇安

佛法教材系列 A4

財團法人內觀教育基金會出版

編 序

《雜阿含經》是釋迦牟尼佛四十多年教法的精髓所在，由劉宋·求那跋陀羅由梵譯漢（西元 435-445 年）。此經收錄在《大正藏》第 2 冊，編號是 No.99。

此處所編的【內觀教育版】，是依據《瑜伽師地論·攝事分》的論文，將經文重新編號並分段標點，使其段落分明，便於誦讀、分析與比對。全經分成〈蘊品〉、〈處品〉、〈緣品〉、〈道品〉、〈弟子品〉、〈如來品〉、〈八眾品〉，共有 1334 經。本書即為其中之〈道品〉。

為了方便比對，每段經文之後，標有印順法師《雜阿含經論會編》、《佛光藏》、《大正藏》的經文編號。凡有所校訂或補正的字句，都用括號〔 〕標出。

願此工作，有助於學佛者在義理和實踐上的增進。

林崇安 2003.2

於桃園縣[中壢市]內觀教育基金會

目錄

道品/道品誦/道品分 (十相應)

念住相應.....	01
正斷相應.....	21
神足（如意足）相應.....	24
根相應.....	26
力相應.....	34
覺支相應.....	51
道支相應.....	78
入出息念（安那般那念）相應.....	101
學相應	113
證淨（不壞淨）相應.....	124

《雜阿含經・道品》

求那跋陀羅譯

林崇安編，內觀教育基金會出版

【內觀教育版】2003

1. 本版（內觀教育版）標出《雜阿含經》中每一經文的編號，並附上別書或其它版的編號：（印 x）表示印順法師所編第 x 經；（光 x）表示佛光藏版所編第 x 經；（大 x）表示大正藏版所編第 x 經。【Sx】表示巴利藏同一相應的第 x 經。
2. 凡是對舊譯經論有所更正的字句，都用括號〔 〕標出。

道品/道品誦/菩提分法誦

念處相應

經文（四〇九）

- （01）如是我聞：一時，佛住舍衛國祇樹給孤獨園。
- （02）爾時，世尊告諸比丘：「有四念處。何等為四？
- （03）謂身身觀念處，受、心、法法觀念處。」
- （04）佛說此經已，諸比丘聞佛所說，歡喜奉行。

（印七六〇）（光六一九）（大六〇五）

經文（四一〇）

- （01）如是我聞：一時，佛住舍衛國祇樹給孤獨園。
- （02）爾時，世尊告諸比丘：「有四念處。何等為四？
- （03）謂身身觀念處，受、心、法法觀念處。
- （04）如是比丘！於此四念處，修習滿足，精勤方便，正念、正知，應當學。」
- （05）佛說此經已，諸比丘聞佛所說，歡喜奉行。

（印七六一）（光六二〇）（大六〇六）

經文（四一一）【S1】

- （01）如是我聞：一時，佛住舍衛國祇樹給孤獨園。

(02) 爾時，世尊告諸比丘：「有一乘道，淨諸眾生，令越憂悲，滅惱苦，得如實法，所謂四念處。何等為四？

(03) 身身觀念處，受、心、法法觀念處。」

(04) 佛說此經已，諸比丘聞佛所說，歡喜奉行。

(印七六二)(光六二一)(大六〇七)

經文(四一二)【S41】

(01) 如是我聞：一時，佛住舍衛國祇樹給孤獨園。

(2a) 爾時，世尊告諸比丘：「若比丘離四念處者，則離如實聖法；離如實聖法者，則離聖道；離聖道者，則離甘露法；離甘露法者，不得脫生老病死、憂悲惱苦，我說彼於苦不得解脫。

(2b) 若比丘不離四念處者，得不離聖如實法；不離聖如實者，則不離聖道；不離聖道者，則不離甘露法；不離甘露法者，得脫生老病死、憂悲惱苦，我說彼人解脫眾苦。」

(03) 佛說此經已，諸比丘聞佛所說，歡喜奉行。

(印七六三)(光六二二)(大六〇八)

經文(四一三)【S42】

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「我今當說四念處集、四念處沒。諦聽！善思！

(03) 何等為四念處集、四念處沒？

(4a) 食集則身集，食滅則身沒。〔如是隨集法觀身住，隨滅法觀身住，隨集滅法觀身住〕，則無所依住，於諸世間永無所取。

(4b) 如是觸集則受集，觸滅則受沒。如是隨集法觀受住，隨滅法觀受住，隨集滅法觀受住，則無所依住，於諸世間都無所取。

(4c) 名色集則心集，名色滅則心沒。隨集法觀心住，隨滅法觀心住，隨集滅法觀心住，則無所依住，於諸世間則無所取。

(4d) 憶念集則法集，憶念滅則法沒。隨集法觀法住，隨滅法觀法住，隨集滅法觀法住，則無所依住，於諸世間則無所取。

(05) 是名四念處集、四念處沒。」

(06) 佛說此經已，諸比丘聞佛所說，歡喜奉行。

(印七六四)(光六二三)(大六〇九)

經文（四一四）【S3】

- (01) 如是我聞：一時，佛住舍衛國祇樹給孤獨園。
(02) 爾時，世尊告諸比丘：「我當說修四念處，諦聽！善思！
(03) 云何修四念處？
(4a) 謂內身身觀念住，精勤方便，〔正念、正知〕，調伏世間憂、悲；外身、內外身觀〔念〕住，精勤方便，正念、正知，調伏世間憂、悲。
(4b) 如是受、心，〔內法、外法、內外法觀念住〕，精勤方便，正念、正知，調伏世間憂、悲。
(05) 是名比丘〔現〕修四念處。」
(06) 佛說此經已，諸比丘聞佛所說，歡喜奉行。

(印七六五)

- (07) 過去、未來修四念處，亦如是說。

(印七六六～七六七)(光六二四)(大六一〇)

經文（四一五）【S5】

- (01) 如是我聞：一時，佛住舍衛國祇樹給孤獨園。
(02) 爾時，世尊告諸比丘：「有善法聚、不善法聚。
(3a) 云何善法聚？
(3b) 所謂四念處，是為正說。所以者何？
(3c) 純一滿淨聚者，所謂四念處。云何為四？
(3d) 謂身身觀念處，受、心、法法觀念處。
(4a) 云何不善聚？
(4b) 不善聚者，所謂五蓋，是為正說。所以者何？
(4c) 純一逸滿不善聚者，所謂五蓋。何等為五？
(4d) 謂貪欲蓋、瞋恚蓋、睡眠蓋、掉悔蓋、疑蓋。」
(05) 佛說此經已，諸比丘聞佛所說，歡喜奉行。

(印七六八)(光六二五)(大六一一)

經文（四一六）

- (01) 如是我聞：一時，佛住舍衛國祇樹給孤獨園。
(02) 爾時，世尊告諸比丘：「如人執持四種強弓，大力方便，射多羅樹影，疾過無闕。

- (03) 如是，如來四種聲聞，增上方便，利根智慧，盡百年壽，於如來所百年說法教授，唯除食息、〔補瀉〕、睡眠，中間常說、常聽，智慧明利，於如來所說盡底受持，無諸障闕，於如來所不加再問；如來說法無有終極，聽法盡壽百歲命終，如來說法猶不能盡。
- (04) 當知如來所說無量無邊，名、句、味身亦復無量，無有終極，所謂四念處。何等為四？
- (05) 謂身念處，受、心、法念處。」
- (06) 佛說此經已，諸比丘聞佛所說，歡喜奉行。
- (印七六九)
- (07) 一切四念處經，皆以此總句，所謂「是故，比丘！於四念處修習，起增上欲，精勤方便，正念、正智，應當學。」
- (印七七〇)(光六二六)(大六一二)

經文(四一七)

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「有不善聚、善聚。
- (3a) 何等為不善聚？
- (3b) 謂三不善根，是名正說。所以者何？
- (3c) 純不善積聚者，謂三不善根。云何為三？
- (3d) 謂貪不善根、恚不善根、癡不善根。
- (4a) 云何為善聚？
- (4b) 謂四念處。所以者何？
- (4c) 〔純善滿淨聚〕者，謂四念處，是名善說。云何為四？
- (4d) 謂身念處，受、心、法念處。」
- (05) 佛說此經已，諸比丘聞佛所說，歡喜奉行。
- (印七七一)
- (06) 如三不善根，如三惡行——身惡行、口惡行、意惡行。
- (07) 三想——欲想、恚想、害想。
- (08) 三覺——欲覺、恚覺、害覺。
- (09) 三界——欲界、恚界、害界，〔亦如是說〕。
- (10) 佛說此經已，諸比丘聞佛所說，歡喜奉行。
- (印七七二～七七五)(光六二七)(大六一三)

經文（四一八）【S11】

- (01) 如是我聞：一時，佛住舍衛國祇樹給孤獨園。
- (02) 時有異比丘來詣佛所，稽首佛足，退坐一面，白佛言：「世尊！如所說大丈夫，云何名大丈夫、非大丈夫？」
- (03) 佛告比丘：「善哉！善哉！比丘！能問如來大丈夫義。諦聽！善思！當為汝說。
- (4a) 若比丘身身觀念住，彼身身觀念住已，心不離欲，不得解脫、盡諸有漏，我說彼非為大丈夫。所以者何？心不解脫故。
- (4b) 若比丘受、心、法法觀念住，心不離欲，不得解脫、盡諸有漏，我不說彼為大丈夫。所以者何？心不解脫故。
- (5a) 若比丘身身觀念住，心得離欲，心得解脫、盡諸有漏，我說彼為大丈夫也。所以者何？心解脫故。
- (5b) 若受、心、法法觀念住，受、心、法法觀念住已，心離貪欲，心得解脫、盡諸有漏，我說彼為大丈夫也。所以者何？心解脫故。
- (06) 是名比丘大丈夫，及非大丈夫。」
- (07) 佛說此經已，諸比丘聞佛所說，歡喜隨喜，禮足而去。

(印七七六)(光六二八)(大六一四)

經文（四一九）【S10】

- (01) 如是我聞：一時，佛住舍衛國祇樹給孤獨園。
- (02) 爾時，尊者阿難，晨朝著衣持鉢，入舍衛城乞食。於路中思惟：我今先至比丘尼寺；即往比丘尼寺。
- (03) 諸比丘尼遙見尊者阿難來，疾敷床座，請令就座。時諸比丘尼禮尊者阿難足，退坐一面，白尊者阿難：「我等諸比丘尼，修四念處，繫心住，自知前後昇降。」
- (04) 尊者阿難告諸比丘尼：「善哉！善哉！姊妹！當如汝等所說而學。凡修習四念處，善繫心住者，應如是知前後昇降。」
- (05) 時尊者阿難為諸比丘尼種種說法，種種說法已，從座起去。
- (06) 爾時，尊者阿難於舍衛城中乞食還，舉衣鉢，洗足已，詣世尊所，稽首佛足，退坐一面，以比丘尼所說，具白世尊。
- (7a) 佛告阿難：「善哉！善哉！應如是學四念處，善繫心住，知前後昇降。所以者何？
- (7b) 心於外求，然後制令求其心，散亂心不解脫，皆如實知。

- (8a) 若比丘於身身觀念住，於彼身身觀念住已，若身耽睡、心法懈怠，彼比丘當起淨信，取於淨相，起淨信心。憶念淨相已，其心則悅；悅已，生喜；其心喜已，身則猗息；身猗息已，則受身樂；受身樂已，其心則定。〔心定已〕，聖弟子當作是學：我於此義，外散之心，攝令休息，不起〔覺想及觀想〕，無覺、無觀，捨、念、樂住。樂住已，如實知。
- (8b) 受、心、法念〔住〕，亦如是說。」
- (09) 佛說此經已，尊者阿難聞佛所說，歡喜奉行。

(印七七七)(光六二九)(大六一五)

經文(四二〇)【S8】

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「當取自心相，莫令外散。所以者何？」
- (3a) 若彼比丘愚癡、〔不辯〕、不善，不取自心相而取外相，然後退減，自生障闕。
- (3b) 譬如廚士愚癡、不辯，不善巧便，調和眾味奉養尊主，酸、鹹、酢、淡不適其意，不能善取尊主所嗜，酸、鹹、酢、淡眾味之和，不能親侍尊主左右，〔伺〕其所須，聽其所欲，善取其心，而自用意，調和眾味以奉尊主。若不適其意，尊主不悅，不悅故不蒙爵賞，亦不愛念。
- (3c) 愚癡比丘亦復如是，不辯、不善，於身身觀〔念〕住，不能除斷上煩惱，不能攝取其心，亦復不得內心寂靜，不得勝妙正念、正知，亦復不得四種增上心法現法樂住，本所未得安隱涅槃。
- (3d) 是名比丘愚癡、不辯、不善，不能善攝內心之相，而取外相，自生障闕。
- (4a) 若有比丘黠慧、才辯，善巧方便取內心已，然後取於外相，彼於後時終不退減，自生障闕。
- (4b) 譬如廚士黠慧、聰辯，善巧方便供養尊主，能調眾味——酸、鹹、酢、淡，善取尊主所嗜之相，而和眾味以應其心，聽其尊主所欲之味，數以奉之。尊主悅已，必得爵祿、愛念、〔信重〕。如是黠慧廚士，善取尊主之心。
- (4c) 比丘亦復如是，身身觀念住，斷上煩惱，善攝其心，內心寂止，正念、正知，得四〔增上心法〕現法樂住，得所未得安隱涅槃。

(4d) 是名比丘黠慧、辯才，善巧方便取內心相，攝持外相，終無退減，自生障闕。

(05) 受、心、法觀〔念住〕，亦復如是。」

(06) 佛說此經已，諸比丘聞佛所說，歡喜奉行。

(印七七八)(光六三〇)(大六一六)

經文(四二一)【S6】

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「過去世時，有一鳥，名曰羅婆，為鷹所捉，飛騰虛空，於空鳴喚言：我不自覺，忽遭此難。我坐捨離父母境界而遊他處，故遭此難，如何今日為他所困，不得自在！

(03) 鷹語羅婆：汝當何處自有境界而得自在？

(04) 羅婆答言：我於田耕壟中，自有境界，足免諸難，是為我家父母境界。

(05) 鷹於羅婆起憍慢言：放汝令去，還耕壟中，能得脫以不？

(06) 於是羅婆得脫鷹爪，還到耕壟大塊之下，安住止處，然後於塊上，欲與鷹鬥。

(07) 鷹則大怒，彼是小鳥，敢與我鬥！瞋恚極盛，〔迅飛〕直搏。

(08) 於是羅婆入於塊下，鷹鳥飛勢，臆衝堅塊，碎身即死。

(09) 時羅婆鳥深伏塊下，仰說偈言：

鷹鳥用力來，羅婆依自界，乘瞋猛盛力，致禍碎其身。

我具足通達，依於自境界，伏怨心隨喜，自觀欣其力。

設汝有兇愚，百千龍象力，不如我智慧，十六分之一，

觀我智殊勝，摧滅於蒼鷹。

(10) 如是比丘！如彼鷹鳥愚癡，自捨所親父母境界，遊於他處，致斯災患。汝等比丘亦應如是，於自境界所行之處，應善守持，離他境界，應當學。

(11) 比丘！他處他境界者，謂五欲境界。眼見可意、〔愛念〕妙色，欲心染著；耳識聲；鼻識香；舌識味；身識觸可意、〔愛念〕妙觸，欲心染著，是名比丘他處他境界。

(12) 比丘！自處父母境界者，謂四念處。云何為四？

(13) 謂身身觀念處，受、心、法法觀念處。

(14) 是故，比丘！於自行處父母境界而自遊行，遠離他處他境界，應當學。」

(15) 佛說此經已，諸比丘聞佛所說，歡喜奉行。

(印七七九)(光六三一)(大六一七)

經文(四二二)

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「於四念處多修習，當得四果、四種福利。云何為四？

(03) 謂須陀洹果、斯陀含果、阿那含果、阿羅漢果。」

(04) 佛說此經已，諸比丘聞佛所說，歡喜奉行。

(印七八〇)(光六三二)(大六一八)

經文(四二三)【S19】

(01) 如是我聞：一時，佛在拘薩羅人間遊行，於私伽陀聚落北身恕林中。

(02) 爾時，世尊告諸比丘：「過去世時，有緣幢伎師，肩上豎幢，語弟子言：汝等於幢上，下向護我，我亦護汝，迭相護持，遊行嬉戲；多得財利。

(03) 時伎弟子語伎師言：不如所言，但當各各自愛護，遊行嬉戲，多得財利，身得無為安隱而下。

(04) 伎師答言：如汝所言，各自愛護。

(05) 然其此義，亦如我說：己自護時即是護他，他自護時亦是護己。心自親近，修習隨護作證，是名自護、護他。

(06) 云何護他、自護？不恐怖他、不違他、不害他，慈心哀彼，是名護他、自護。

(07) 是故，比丘！當如是學：自護者修四念處，護他者亦修四念處。」

(08) 佛說此經已，諸比丘聞佛所說，歡喜奉行。

(印七八一)(光六三三)(大六一九)

經文(四二四)【S7】

(01) 如是我聞：一時，佛住王舍城迦蘭陀竹園。

(2a) 爾時，世尊告諸比丘：「大雪山中寒冰嶮處，尚無猿猴，況復有人！

- (2b) 或復有山，猿猴所居而無有人。
- (2c) 或復有山，人、獸共居。
- (3a) 於猿猴行處，獵師以糲膠塗其草上。有點猿猴，遠避而去。愚癡猿猴，不能遠避，以手小觸即膠其手；復以二手欲解求脫，即膠二手；以足求解，復膠其足；以口齧草，輒復膠口；五處同膠，聯捲臥地。獵師既至，即以杖貫擔負而去。比丘！當知愚癡猿猴，捨自境界父母居處，遊他境界，致斯苦惱。
- (3b) 如是比丘！愚癡凡夫依聚落住，晨朝著衣持鉢，入村乞食，不善護身，不守根門，眼見色已則生染著，耳、聲，鼻、香，舌、味，身、觸，皆生染著。愚癡比丘，內根、外境被五縛已，隨魔所欲。
- (04) 是故，比丘！當如是學：於自所行處、父母境界依止而住，莫隨他處、他境界行。
- (05) 云何比丘自所行處、父母境界？
- (06) 謂四念處：身身觀念住，受、心、法法觀念住。」
- (07) 佛說此經已，諸比丘聞佛所說，歡喜奉行。

(印七八二)(光六三四)(大六二〇)

經文(四二五)【S4】

- (01) 如是我聞：一時，佛住舍衛國祇樹給孤獨園。
- (02) 時尊者阿難與眾多比丘，詣世尊所，稽首禮足，退坐一面。
- (03) 尊者阿難白佛言：「世尊！此諸年少比丘，當云何教授？云何為其說法？」
- (04) 佛告阿難：「此諸年少比丘，當以四念處教令修習。云何為四？
- (5a) 謂身身觀念住，精勤方便，不放逸行，正智、正念，寂定於心，乃至知身。
- (5b) 受、心、法法觀念住，精勤方便，不放逸行，正念、正智，寂靜於心，乃至〔知法〕。
- (6a) 若比丘住學地者，未得進上，志求安隱涅槃時，身身觀念住，精勤方便，不放逸行，正念、正智，寂靜於心，〔乃至於身遠離〕。
- (6b) 受、心、法法觀念住，精勤方便，不放逸行，正念、正智，寂靜於心，乃至於法遠離。

- (7a) 若阿羅漢，諸漏已盡，所作已作，捨諸重擔，盡諸有結，正知善解脫。當於彼時，亦修身身觀念住，精勤方便，不放逸行，正念、正智，寂靜於心，〔於身得遠離〕。
- (7b) 受、心、法法觀念住，乃至於法得遠離。」
- (08) 時尊者阿難，歡喜隨喜，作禮而去。

(印七八三)(光六三五)(大六二一)

經文(四二六)【S2】

- (01) 如是我聞：一時，佛在跋祇人間遊行，到鞞舍離國菴羅園中住。
- (02) 爾時，菴羅女聞世尊跋祇人間遊行，至菴羅園中住，即自莊嚴，乘車出鞞舍離城，詣世尊所，恭敬供養。詣菴羅園門，下車步進，遙見世尊與諸大眾圍遶說法。
- (03) 世尊遙見菴羅女來，語諸比丘：「汝等比丘！勤攝心住，正念、正智。今菴羅女來，是故誡汝。」
- (4a) 云何為比丘勤攝心住？
- (4b) 若比丘已生惡不善法當斷，生欲方便，精進攝心；未生惡不善法不令起；未生善法令生；已生善法，令住不忘，修習增滿，生欲方便，精勤攝心。
- (4c) 是名比丘勤攝心住。
- (5a) 云何名比丘正智？
- (5b) 若比丘去來威儀，常隨正智；迴顧、視瞻、屈伸、俯仰、執持衣鉢、行住坐臥、眠覺、語默，皆隨正智住。
- (5c) 是〔名〕正智。
- (6a) 云何正念？
- (6b) 若比丘內身身觀念住，精勤方便，正智、正念，調伏世間貪憂；如是受、心、法法觀念住，精勤方便，正智、正念，調伏世間貪憂。
- (6c) 是名比丘正念。
- (07) 是故汝等勤攝其心，正智、正念。今菴羅女來，是故誡汝。」
- (08) 時菴羅女詣世尊所，稽首禮足，卻住一面。
- (09) 爾時，世尊為菴羅女種種說法，示、教、照、喜；示、教、照、喜已，默然而住。
- (10) 爾時，菴羅女整衣服，為佛作禮，合掌白佛：「唯願世尊與諸大眾，明日受我請中食！」爾時，世尊默然受請。

- (11) 菴羅女知世尊默然受請已，稽首禮足，還歸自家；設種種食，布置床座，晨朝遣使白佛時到。
- (12) 爾時，世尊與諸大眾，詣菴羅女舍，就座而坐。時菴羅女手自供養種種飲食。食訖，澡漱洗鉢竟。
- (13) 時菴羅女持一小床，坐於佛前，聽佛說法。
- (14) 爾時，世尊為菴羅女說隨喜偈：
- 施者人愛念，多眾所隨從，名稱日增高，遠近皆悉聞。
處眾常和雅，離慳無所畏。是故智慧施，斷慳永無餘。
上生忉利天，長夜受快樂，盡壽常修德，娛樂難陀園，
百種諸天樂，五欲悅其心。彼於此人間，聞佛所說法，
為善逝弟子，樂彼受化生。
- (15) 爾時，世尊為菴羅女種種說法，示、教、照、喜，示、教、照、喜已，從座起而去。

(印七八四)(光六三六)(大六二二)

經文(四二七)【S20】

- (01) 如是我聞：一時，佛住波羅奈仙人住處鹿野苑中。
- (02) 爾時，世尊告諸比丘：「世間言美色、世間美色者，能令多人集聚觀看者不？」
- (03) 諸比丘白佛：「如是，世尊！」
- (04) 佛告比丘：「若世間美色、世間美色者，又能種種歌舞伎樂，復極令多眾聚集看不？」
- (05) 比丘白佛：「如是，世尊！」
- (06) 佛告比丘：「若有世間美色、世間美色者，在於一處，作種種歌舞，伎樂戲笑，復有大眾雲集一處。若有士夫不愚、不癡，樂樂、背苦，貪生、畏死，有人語言：士夫！汝當持滿油鉢，於世間美色者所及大眾中過。使一能殺人者，拔刀隨汝，若失一滲油者，輒當〔斷〕汝命。云何比丘！彼持油鉢士夫，能不念油鉢、不念殺人者，觀彼伎女及大眾不？」
- (07) 比丘白佛：「不也，世尊！所以者何？世尊！彼士夫自見其後有拔刀者，常作是念：我若落油一滲，彼拔刀者當截我頭。唯一其心，繫念油鉢，於世間美色及大眾中，徐步而過，不敢顧眄。」

- (08) 「如是比丘！若有沙門、婆羅門，正身自重，一其心念，不顧聲、色，善攝一切心法，住身念處者，則是我弟子、隨我教者。
- (09) 云何為比丘正身自重，一其心念，不顧聲、色，攝持一切心法，住身念處？
- (10a) 如是比丘，〔身身觀念住〕，精勤方便，正智、正念，調伏世間貪憂。
- (10b) 受、心、法法觀念住，亦復如是。
- (11) 是名比丘正身自重，一其心念，不顧聲、色，善攝心法，住四念處。」
- (12) 爾時，世尊即說偈言：
- 專心正念，護持油鉢，自心隨護，未曾至方。
甚難得過，勝妙微細，諸佛所說，言教利劍，
當一其心，專精護持。非彼凡人，放逸之事，
能入如是，不放逸教。
- (13) 佛說此經已，諸比丘聞佛所說，歡喜奉行。

(印七八五)(光六三七)(大六二三)

經文(四二八)【S3, 16】

- (01) 如是我聞：一時，佛住舍衛國祇樹給孤獨園。
- (02) 爾時，尊者鬱低迦來詣佛所，稽首佛足，退坐一面，白佛言：
- 「善哉世尊！為我說法。我聞法已，當獨一靜處，專精思惟，不放逸住。思惟所以：善男子剃除鬚髮，正信非家，出家學道，如上廣說，乃至不受後有。」
- (03) 佛告鬱低迦：「如是！如是！如汝所說，但於我所說法，不悅我心；彼所事業亦不成就，雖隨我後而不得利，反生障闕。」
- (04) 鬱低迦白佛：「世尊所說，我則能令世尊心悅，自業成就，不生障闕。唯願世尊為我說法，我當獨一靜處，專精思惟，不放逸住，如上廣說，乃至不受後有。」
- (05) 如是第二、第三請。
- (06) 爾時，世尊告鬱低迦：「汝當先淨其初業，然後修習梵行。」
- (07) 鬱低迦白佛：「我今云何淨其初業，修習梵行？」
- (08) 佛告鬱低迦：「汝當先淨其戒，直其見，具足三業，然後修四念處。何等為四？

(9a) 內身身觀念住，專精方便，正智、正念，調伏世間貪憂；如是外身、內外身身觀念住。

(9b) 受、心、法法觀念住，亦如是廣說。」

(10) 時鬱低迦聞佛所說，歡喜隨喜，從座起而去。

(11) 時鬱低迦聞佛教授已，獨一靜處，專精思惟，不放逸住；思惟所以：善男子剃除鬚髮，著袈裟衣，正信非家，出家學道，乃至不受後有。

(印七八六)

(12) 如鬱低迦所問，如是異比丘所問，亦如上說。

(印七八七)(光六三八)(大六二四)

經文(四二九)【S15】

(01) 如是我聞：一時，佛住舍衛國祇樹給孤獨園。

(02) 時有異比丘，名婆醯迦，來詣佛所，稽首禮足，退坐一面，白佛言：「世尊！善哉世尊！為我說法」，如前《鬱低迦修多羅》廣說。

(3a) 差別者：「如是婆醯迦比丘！初業清淨，身身觀念住者，超越諸魔。

(3b) 受、心、法法觀念住者，超越諸魔。」

(04) 時婆醯迦比丘聞佛說法教誡已，歡喜隨喜，作禮而去。獨一靜處，專精思惟，不放逸住，乃至不受後有。

(印七八八)(光六三九)(大六二五)

(05) 第二經亦如上說。

(06) 差別者，如是比丘超越生死。

(印七八九)(光六四〇)(大六二六)

經文(四三〇)

(01) 如是我聞：一時，佛住舍衛國祇樹給孤獨園。

(02) 爾時，尊者阿那律陀詣佛所，稽首禮足，退坐一面，白佛言：「世尊！若有比丘住於學地，未得上進安隱涅槃而方便求，是聖弟子當云何於正法律修、習、多修習，得盡諸漏，乃至自知不受後有？」

- (3a) 佛告阿那律：「若聖弟子住於學地，未得上進安隱涅槃而方便求，彼於爾時，當內身身觀念住，精勤方便，正智、正念，調伏世間貪憂。
- (3b) 如是受、心、法法觀念住，精勤方便，正智、正念，調伏世間貪憂。
- (04) 如是聖弟子多修習已，得盡諸漏，乃至自知不受後有。」
- (05) 爾時，尊者阿那律陀，聞佛所說，歡喜隨喜，作禮而去。

(印七九〇)(光六四一)(大六二七)

經文(四三一)【S21】

- (01) 如是我聞：一時，佛住巴連弗邑雞林精舍。
- (02) 時尊者優陀夷、尊者阿難陀，亦住巴連弗邑雞林精舍。
- (03) 爾時，尊者優陀夷詣尊者阿難所，共相問訊，慰勞已，退坐一面，語尊者阿難：「如來、應供、等正覺所知所見，為諸比丘說聖戒，令不斷、不缺、不擇、不離、不戒取、善究竟、善持，智者所歎、所不憎惡。何故如來、應、等正覺所見，為諸比丘說聖戒，不斷、不缺乃至智者所歎、所不憎惡？」
- (04) 尊者阿難語優陀夷：「為修四念處故。何等為四？」
- (05) 謂身身觀念住，受、心、法法觀念住。」
- (06) 時二正士共論議已，各還本處。

(印七九一)(光六四二)(大六二八)

經文(四三二)

- (01) 如是我聞：一時，佛住巴連弗邑雞林精舍。
- (02) 爾時，尊者阿難、尊者跋陀羅，亦在彼住。時尊者跋陀羅問尊者阿難言：「頗有法修、習、多修習，得不退轉耶？」
- (03) 尊者阿難語尊者跋陀羅：「有法修、習、多修習，能令行者得不退轉，謂四念處。何等為四？」
- (04) 〔謂〕身身觀念住，受、心、法法觀念住。」
- (05) 時二正士共論說已，各還本處。

(印七九二)(光六四三)(大六二九)

經文(四三三)

- (01) 如是我聞：一時，佛住巴連弗邑雞林精舍。

- (02) 爾時，尊者阿難、尊者跋陀羅，亦在彼住。時尊者跋陀羅問尊者阿難：「頗有法修、習、多修習，令不淨眾生而得清淨，轉增光澤耶？」
- (03) 尊者阿難語尊者跋陀羅：「有法修、習、多修習，能令不淨眾生而得清淨，轉增光澤，謂四念處。〔何等為四？〕
- (04) 〔謂〕身身觀念住，受、心、法法觀念住。」
- (05) 時二正士共論議已，各還本處。

(印七九三)(光六四四)(大六三〇)

經文(四三四)

- (01) 如是我聞：一時，佛住巴連弗邑雞林精舍。
- (02) 爾時，尊者阿難、尊者跋陀羅，亦在彼住。
- (03) 時尊者跋陀羅問尊者阿難：「頗有法修、習、多修習，能令未度彼岸眾生得度彼岸？」
- (04) 尊者阿難語尊者跋陀羅：「有法修、習、多修習，能令未度彼岸眾生得度彼岸，謂四念處。〔何等為四？〕
- (05) 謂身身觀念住，受、心、法法觀念住。」
- (06) 時二正士共論議已，各還本處。

(印七九四)(光六四五)(大六三一)

經文(四三五)

- (01) 如是我聞：一時，佛住巴連弗邑雞林精舍。
- (02) 爾時，尊者阿難、尊者跋陀羅，亦在彼住。
- (03) 尊者跋陀羅問尊者阿難：「頗有法修、習、多修習，得阿羅漢？」
- (04) 尊者阿難語尊者跋陀羅：「有法修、習、多修習，而得阿羅漢，謂四念處。何等為四？」
- (05) 謂身身觀念住，受、心、法法觀念住。」
- (06) 時二正士共論議已，各還本處。

(印七九五)(光六四六)(大六三二)

經文(四三六)

- (01) 如是我聞：一時，佛住巴連弗邑雞林精舍。
- (02) 爾時，世尊告諸比丘：「所說一切法、一切法者，謂四念處，是名正說。何等為四？」

(03) 謂身身觀念住，受、心、法法觀念住。」

(04) 佛說此經已，諸比丘聞佛所說，歡喜奉行。

(印七九六)(光六四七)(大六三三)

經文(四三七)【S17】

(01) 如是我聞：一時，佛住巴連弗邑雞林精舍。

(02) 爾時，世尊告諸比丘：「若比丘於四念處，修、習、多修習，名賢聖、出離。何等為四？」

(03) 謂身身觀念住，受、心、法法觀念住。」

(04) 佛說此經已，諸比丘聞佛所說，歡喜奉行。

(印七九七)

(05) 如出離，如是正盡苦、究竟苦邊、得大果、得大福利、得甘露法、究竟甘露、甘露法作證，如上廣說。

(印七九八～八〇四)(光六四八)(大六三四)

經文(四三八)【S34】

(01) 如是我聞：一時，佛住巴連弗邑雞林精舍。

(02) 爾時，世尊告諸比丘：「若比丘於四念處，修、習、多修習，未淨眾生令得清淨，已淨眾生令增光澤。何等為四？」

(03) 謂身身觀念住，受、心、法法觀念住。」

(04) 佛說此經已，諸比丘聞佛所說，歡喜奉行。

(印八〇五)

(05) 如淨眾生，如是未度彼岸者〔令度〕、得阿羅漢、得辟支佛、得阿耨多羅三藐三菩提，亦如上說。

(印八〇六～八〇九)(光六四九)(大六三五)

經文(四三九)

(01) 如是我聞：一時，佛住巴連弗邑雞林精舍。

(02) 爾時，世尊告諸比丘：「當為汝說修四念處。何等為修四念處？」

(03) 若比丘！如來、應、等正覺、明行足、善逝、世間解、無上士、調御丈夫、天人師、佛、世尊，出興于世；演說正法，上語亦善、中語亦善、下語亦善，善義、善味，純一滿淨，梵行顯示。

(04) 若族姓子、族姓女，從佛聞法，得淨信心，如是修學：見在家和合欲樂之過，煩惱結縛，樂居空閑，出家學道，不樂在家，

處於非家，欲一向清淨，盡其形壽，純一滿淨，鮮白梵行。我當剃除鬚髮，著袈裟衣，正信非家，出家學道。

- (05) 作是思惟已，即便放捨錢財、親屬，剃除鬚髮，著袈裟衣，正信非家，出家學道。
- (06) 正其身行，護口四過，正命清淨，習賢聖戒。
- (7a) 守諸根門，護心正念。眼見色時，不取形相；若於眼根住不律儀，世間貪憂、惡不善法常漏於心，而〔令〕於眼起正律儀。
- (7b) 耳、鼻、舌、身、意起正律儀，亦復如是。
- (08) 彼以賢聖戒律成就，善攝根門，來往、周旋、顧視、屈伸、坐臥、眠覺、語默，住智正智。
- (09) 彼成就如此聖戒，守護根門，正智、正念，寂靜遠離，空處、樹下、閑房獨坐，正身正念，繫心安住。
- (10a) 斷世〔貪憂〕，離貪欲，淨除貪欲。
- (10b) 斷世瞋恚、睡眠、掉悔、疑蓋，離瞋恚、睡眠、掉悔、疑蓋，淨除瞋恚、睡眠、掉悔、疑蓋。
- (10c) 斷除五蓋：惱心、慧力羸、諸障閼分、不趣涅槃者。
- (11a) 是故內身身觀念住，精勤方便，正智、正念，調伏世間貪憂。如是外身、內外身。
- (11b) 受、心、法法觀念住，亦如是說。
- (12) 是名比丘修四念處。」
- (13) 佛說此經已，諸比丘聞佛所說，歡喜奉行。

(印八一〇)(光六五〇)(大六三六)

經文(四四〇)【S46】

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「當修四念處。」如上廣說。
- (3a) 差別者：「乃至如是出家已，住於靜處，攝受波羅提木叉律儀，行處具足，於細微罪生大怖畏，受持學戒。
- (3b) 離殺、斷殺、不樂殺生，乃至一切業跡如前說。衣鉢隨身，如鳥兩翼。
- (3c) 如是學戒成就，修四念處。」
- (04) 佛說此經已，諸比丘聞佛所說，歡喜奉行。

(印八一)(光六五一)(大六三七)

經文（四四一）【S13】

- (01) 如是我聞：一時，佛在王舍城迦蘭陀竹園。
- (02) 爾時，尊者舍利弗住摩竭提那羅聚落，疾病涅槃；純陀沙彌瞻視供養。
- (03) 爾時，尊者舍利弗因病涅槃。
- (04) 時純陀沙彌供養尊者舍利弗已，取餘舍利，擔持衣鉢，到王舍城；舉衣鉢，洗足已，詣尊者阿難所，禮尊者阿難足已，卻住一面，白尊者阿難：「尊者當知！我和上尊者舍利弗已涅槃，我持舍利及衣鉢來。」
- (05) 於是尊者阿難聞純陀沙彌語已，往詣佛所，白佛言：「世尊！我今舉體離解，四方易韻，持辯閉塞。純陀沙彌來語我言：和上舍利弗已涅槃，持餘舍利及衣鉢來。」
- (06) 佛言：「云何阿難！彼舍利弗持所受戒身涅槃耶？定身、慧身、解脫身、解脫知見身涅槃耶？」
- (07) 阿難白佛言：「不也，世尊！」
- (08) 佛告阿難：「若法我自知，成等正覺所說，謂四念處、四正斷、四如意足、五根、五力、七覺支、八道支涅槃耶？」
- (09) 阿難白佛：「不也，世尊！雖不持所受戒身，乃至道品法而涅槃，然尊者舍利弗，持戒多聞，少欲知足，常行遠離，精勤方便，攝念安住，一心正受；捷疾智慧、深利智慧、超出智慧、分別智慧、大智慧、廣智慧、甚深智慧、無等智慧、智寶成就；能〔示〕、能教、能照、能喜捨、能讚歎，為眾說法。是故世尊！我為法故，為受法者故，愁憂苦惱。」
- (10) 佛告阿難：「汝莫愁憂苦惱！所以者何？若〔生〕、若起、若作、有為、敗壞之法，何得不壞？欲令不壞者，無有是處。」
- (11) 我先已說：一切所愛念種種諸物、適意之事，一切皆是乖離之法，不可常保。
- (12a) 譬如大樹，根、莖、枝、葉、華、果茂盛，大枝先折。
- (12b) 如大寶山，大巖先崩。
- (13) 如是如來大眾眷屬，其大聲聞先般涅槃。
- (14) 若彼方有舍利弗住者，於彼方我則無事，然其彼方，我則不空，以有舍利弗故，我先已說故。
- (15) 汝今阿難！如我先說，所可愛念種種適意之事，皆是別離之法。是故汝今莫大愁毒。

- (16) 阿難！當知如來不久亦當過去。
- (17) 是故阿難！當作自洲而自依，當作法洲而法依，當作不異洲、不異依。」
- (18) 阿難白佛：「世尊！云何自洲以自依？云何法洲以法依？云何不異洲、不異依？」
- (19a) 佛告阿難：「若比丘，〔內〕身身觀念處，精勤方便，正智、正念，調伏世間貪憂；如是外身、內外身。
- (19b) 受、心、法法觀念處，亦如是說。
- (20) 阿難！是名自洲以自依，法洲以法依，不異洲、〔不異依〕。」
- (21) 佛說此經已，諸比丘聞佛所說，歡喜奉行。

(印八一二)(光六五二)(大六三八)

經文(四四二)【S14】

- (01) 如是我聞：一時，佛住摩偷羅國跋陀羅河側傘蓋菴羅樹林中。
- (02) 尊者舍利弗、目犍連涅槃未久。
- (03) 爾時，世尊月十五日布薩時，於大眾前敷座而坐。
- (04) 爾時，世尊觀察眾會已，告諸比丘：「我觀大眾，見已虛空，以舍利弗、大目犍連般涅槃故。我聲聞唯此二人，善能說法，教誡教授，辯說滿足。
- (05) 有二種財：錢財及法財。錢財者，從世人求；法財者，從舍利弗、大目犍連求。如來已離〔施財〕及法財。
- (06) 汝等莫以舍利弗、目犍連涅槃故，愁憂苦惱。
- (7a) 譬如大樹，根、莖、枝、葉、華、果茂盛，大枝先折。
- (7b) 亦如寶山，大巖先崩。
- (08) 如是如來大眾之中，舍利弗、目犍連二大聲聞先般涅槃。
- (09) 是故，比丘！汝等勿生愁憂苦惱！何有生法、起法、作法、〔有〕為法、壞敗之法而不磨滅？欲令不壞，無有是處。
- (10) 我先已說：一切可愛之物，皆歸離散；我今不久，亦當過去。
- (11) 是故汝等當知：自洲以自依，法洲以法依，不異洲、不異依。
- (12a) 謂內身身觀念住，精勤方便，正智、正念，調伏世間貪憂；如是外身、內外身。
- (12b) 受、心、法法觀念住，精勤方便，正智、正念，調伏世間貪憂。
- (13) 是名自洲以自依，法洲以法依，不異洲、〔不異依〕。

(14) 佛說此經已，諸比丘聞佛所說，歡喜奉行。

(印八一三)(光六五三)(大六三九)

正斷相應

經文（四四三）

- （01）如是我聞：一時，佛住舍衛國祇樹給孤獨園。
- （02）爾時，世尊告諸比丘：「有四正斷。何等為四？」
- （03）一者、斷斷，二者、律儀斷，三者、隨護斷，四者、修斷。」
- （04）佛說此經已，諸比丘聞佛所說，歡喜奉行。

（印一二九三三）（光五八九）（大八七五）

經文（四四四）

- （01）如是我聞：一時，佛住舍衛國祇樹給孤獨園。
- （02）爾時，世尊告諸比丘：「有四正斷。何等為四？」
- （03）一者、斷斷，二者、律儀斷，三者、隨護斷、四者、修斷。」
- （04）爾時，世尊即說偈言：
斷斷及律儀，隨護與修習，如此四正斷，諸佛之所說。
- （05）佛說此經已，諸比丘聞佛所說，歡喜奉行。

（印一二九三四）（光五九〇）（大八七六）

經文（四四五）

- （01）如是我聞：一時，佛住舍衛國祇樹給孤獨園。
- （02）爾時，世尊告諸比丘：「有四正斷。何等為四？」
- （03）一者、斷斷，二者、律儀斷，三者、隨護斷，四者、修斷。
- （4a）云何為斷斷？謂〔比丘〕已起惡不善法斷，生欲方便，精勤攝受，是為斷斷。
- （4b）云何律儀斷？未起惡不善法不起，生欲方便，精勤攝受，是名律儀斷。
- （4c）云何隨護斷？未起善法令起，生欲方便，精勤攝受，是名隨護斷。
- （4d）云何修斷？已起善法增益修習，生欲方便，精勤攝受，是為修斷。」
- （05）佛說此經已，諸比丘聞佛所說，歡喜奉行。

（印一二九三五）（光五九一）（大八七七）

經文（四四六）

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「有四正斷。何等為四？」
- (03) 一者、斷斷，二者、律儀斷，三者、隨護斷，四者、修斷。
- (4a) 云何為斷斷？謂比丘已起惡不善法斷，生欲方便，〔精勤攝受〕，是為斷斷。
- (4b) 云何律儀斷？未起惡不善法不起，生欲方便，精勤攝受，是名律儀斷。
- (4c) 云何隨護斷？未起善法令起，生欲方便，精勤攝受，是名隨護斷。
- (4d) 云何修斷？已起善法增益修習，生欲方便，精勤攝受，是名修斷。」
- (05) 爾時，世尊即說偈言：
- 斷斷及律儀，隨護與修習，如此四正斷，諸佛之所說。
- (06) 佛說此經已，諸比丘聞佛所說，歡喜奉行。

（印一二九三六）（光五九二）（大八七八）

經文（四四七）

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「有四正斷。何等為四？」
- (03) 一者、斷斷，二者、律儀斷，三者、隨護斷，四者、修斷。
- (4a) 云何斷斷？若比丘已起惡不善法斷，生欲方便，精勤攝受；未起惡不善法不起，生欲方便，精勤攝受；未生善法令起，生欲方便，精勤攝受；已生善法增益修習，生欲方便，精勤攝受，是名斷斷。
- (4b) 云何律儀斷？若比丘善護眼根，隱密、調伏、進向；如是耳、鼻、舌、身、意根，善護、隱密、調伏、進向，是名律儀斷。
- (4c) 云何隨護斷？若比丘於彼彼真實三昧相，善守護持，所謂青瘀相、脹相、膿相、壞相、食〔不淨〕相，修習守護，不令退沒，是名隨護斷。
- (4d) 云何修斷？若比丘修四念處等，是名修斷。」
- (05) 爾時，世尊即說偈言：
- 斷斷、律儀斷，隨護、修習斷，此四種正斷，正覺之所說。
比丘勤方便，得盡於諸漏。

(06) 佛說此經已，諸比丘聞佛所說，歡喜奉行。

(印一二九三七)

(07) 如四念處，如是四正斷、四如意足、五根、五力、七覺支、八道支、四道、四法句、〔止〕觀修習，亦如是說。

(印一二九三八～一二九四六)(光五九三)(大八七九)

經文(四四八)

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「猶如有人火燒頭衣，當云何救？」

(03) 比丘白佛言：「世尊！〔當〕起增上欲，慙懃方便，時救令滅。」

(04) 佛告比丘：「頭衣燒然，尚可暫忘，無常盛火，應盡斷。為斷無常火故，已生惡不善法當斷，起欲精勤，攝心令增長。

(05) 斷何等無常法故，已生惡不善法，為斷故起欲方便，攝心增進？謂色無常故，受、想、行、識無常當斷故，已生惡不善法令斷，起欲方便，攝心增進。」

(06) 廣說乃至佛說此經已，諸比丘聞佛所說，歡喜奉行。

(印一〇一八二)

(07) 如無常經，如是過去無常、未來無常、現在無常、過去未來無常、過去現在無常、未來現在無常、過去未來現在無常，八經亦如上說。

(印一〇一八三～一〇一八九)

(08) 如已生惡不善法當斷故，如是未生惡不善法令不生、未生善法令生、已生善法令增廣故，起欲方便，攝心增進，八經亦如上說。

(印一〇一九〇～一〇二一三)

(09) 如當斷無常三十二經，如是當知、當吐、當盡、當止、當捨、當滅、當沒，一一三十二經，廣說如上。

(印一〇二一四～一〇四三七)(光一八〇)(大一七八)

如意足相應

經文（四四九）【S15】

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「猶如有人火燒頭衣，當云何救？」
- (03) 比丘白佛言：「世尊！當起增上欲，慍懃方便，時救令滅。」
- (04) 佛告比丘：「頭衣燒燃，尚可暫忘，無常盛火當盡斷。為斷無常火故，當修欲定斷行成就如意足。」
- (05) 當斷何等法無常？
- (06) 謂當斷色無常，當斷受、想、行、識無常故，修欲定斷行成就如意足。」
- (07) 如經廣說，乃至佛說此經已，諸比丘聞佛所說，歡喜奉行。

（印一〇四三八）

- (08) 如無常，如是過去無常、未來無常、現在無常、過去未來無常、過去現在無常、未來現在無常、過去未來現在無常，八經亦如上說。

（印一〇四三九～一〇四四五）

- (09) 如修欲定，如是精進定、意定、思惟定，亦如是。

（印一〇四四六～一〇四六九）

- (10) 如當斷三十二經，如是當知、當吐、當盡、當止、當捨、當滅、當沒，一一三十二經，亦如上說。

（印一〇四七〇～一〇六九三）（光一八一）（大一七九）

經文（四五〇）

- (01) 如是我聞：一時，佛住俱睺彌國瞿師羅園。
- (02) 尊者阿難亦在彼住。
- (03) 時有異婆羅門，詣尊者阿難所，共相問訊，慰勞已，於一面坐，問尊者阿難：「何故於沙門瞿曇所修梵行？」
- (04) 尊者阿難語婆羅門：「為斷故。」
- (05) 復問：「尊者！何所斷？」
- (06) 答言：「斷愛。」
- (07) 復問：「尊者阿難！何所依而得斷愛？」
- (08) 答言：「婆羅門！依於欲而斷愛。」
- (09) 復問：「尊者阿難！豈非無邊際？」

- (10) 答言：「婆羅門！非無邊際，如有邊際，非無邊際。」
- (11) 復問：「尊者阿難！云何有邊際，非無邊際？」
- (12) 答言：「婆羅門！我今問汝，隨意答我。婆羅門！於意云何？汝先有欲，來詣精舍不？」
- (13) 婆羅門答言：「如是，阿難！」
- (14) 「如是，婆羅門！來至精舍已，彼欲息不？」
- (15) 「答言：「如是，尊者！」」
- (16) 「復問：「婆羅門！汝先有彼精進方便籌量，來詣精舍不？」」
- (17) 答言：「如是，尊者阿難！彼精進方便籌量，來詣精舍。」
- (18) 復問：「至精舍已，彼精進方便籌量息不？」
- (19) 答言：「如是，尊者！」
- (20) 阿難復語婆羅門：「如是婆羅門！如來、應、等正覺所知所見，說四如意足，以一乘道淨眾生，滅苦惱，斷憂悲。何等為四？」
- (21) 欲定斷行成就如意足，精進定、心定、思惟定斷行成就如意足。
- (22a) 如是聖弟子修欲定斷行成就如意足，依離、依無欲、依出要、依滅、向於捨，乃至斷愛；愛斷已，彼欲亦息。
- (22b) 修精進定、心定、思惟定斷行成就，依離、依無欲、依出要、依滅、向於捨，乃至愛盡；愛盡已，思惟則息。
- (23) 婆羅門！於意云何？此非邊際耶？」
- (24) 婆羅門言：「尊者阿難！此是邊際，非不邊際。」
- (25) 爾時婆羅門聞尊者阿難所說，歡喜隨喜，從座起去。

(印一六三七)(光五六〇)(大五六一)

根相應

經文（四五—）【S23】

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「有三根：未知當知根、知根、〔具〕知根。」
- (03) 爾時，世尊即說偈言：
- 覺知學地時，隨順直道進，精進勤方便，善自護其心；
如自知生盡，無礙道已知；以知解脫已，最後得〔具〕知，
不動意解脫，一切有能盡。諸根悉具足，樂於根寂靜，
持於最後身，降伏眾魔怨。
- (04) 佛說此經已，諸比丘聞佛所說，歡喜奉行。

（印八一四）（光六五四）（大六四二）

經文（四五二）【S1】

- (01) 如是我聞：一時，佛在舍衛國祇樹給孤獨園。
- (02) 爾時，世尊告諸比丘：「有五根，何謂為五？」
- (03) 謂信根、精進根、念根、定根、慧根。」
- (04) 佛說此經已，諸比丘聞佛所說，歡喜奉行。

（印八一五）（光六五五）（大六四三）

經文（四五三）【S2-3】

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「有五根。何等為五？」
- (03) 謂信根、精進根、念根、定根、慧根。
- (04) 若比丘於此〔五根〕如實善觀察者，於三結斷、知，謂身見、戒取、疑，是名須陀洹，不墮惡趣法，決定正向於正覺，七有天人往生，究竟苦邊。」
- (05) 佛說此經已，諸比丘聞佛所說，歡喜奉行。

（印八一六）（光六五六）（大六四四）

經文（四五四）【S4-5】

- (01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「於此五根如實觀察者，不起諸漏，心得離欲解脫，是名阿羅漢：諸漏已盡、所作已作、離諸重擔、逮得己利、盡諸有結、正智心善解脫。」

(03) 佛說此經已，諸比丘聞佛所說，歡喜奉行。

(印八一七)(光六五七)(大六四五)

經文(四五五)【S8】

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「有五根。何等為五？」

(03) 謂信根、精進根、念根、定根、慧根。

(4a) 信根者，當知是四不壞淨。

(4b) 精進根者，當知是四正斷。

(4c) 念根者，當知是四念處。

(4d) 定根者，當知是四禪。

(4e) 慧根者，當知是四聖諦。」

(05) 佛說此經已，諸比丘聞佛所說，歡喜奉行。

(印八一八)(光六五八)(大六四六)

經文(四五六)【S9-10】

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「有五根。何等為五？」

(03) 謂信根、精進根、念根、定根、慧根。

(04) 何等為信根？若比丘於如來所起淨信心，根本堅固，〔餘〕諸天魔、梵，沙門、婆羅門，及餘世間，無能沮壞其心者，是名信根。

(05) 何等為精進根？已生惡不善法令斷，生欲方便，攝心增進；未生惡不善法不起，生欲方便，攝心增進；未生善法令起，生欲方便，攝心增進；已生善法，住不忘，修習增廣，生欲方便，攝心增進，是名精進根。

(06) 何等為念根？若比丘內身身觀住，殷勤方便，正念、正智，調伏世間貪憂。〔如是〕外身、內外身。受、心、法法觀念住，亦如是說，是名念根。

(07) 何等為定根？若比丘離欲惡不善法，有覺、有觀，離生喜樂，乃至第四禪具足住，是名定根。

(08) 何等為慧根？若比丘苦聖諦如實知，苦集聖諦、苦滅聖諦、苦滅道跡聖諦如實知，是名慧根。」

(09) 佛說此經已，諸比丘聞佛所說，歡喜奉行。

(印八一九)(光六五九)(大六四七)

經文(四五七)【S3】

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：如上說。

(03) 差別者：「若比丘於此五根如實觀察已，於三結斷、知。何等為三？謂身見、戒取、疑。是名須陀洹，不墮惡趣，決定正向三菩提，七有天人往生，究竟苦邊。」

(04) 佛說此經已，諸比丘聞佛所說，歡喜奉行。

(印八二〇)(光六六〇)(大六四八)

經文(四五八)【S5】

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：如上說。

(03) 差別者：「若比丘於此五根如實觀察已，得盡諸漏離欲解脫，是名阿羅漢：諸漏已盡，所作已作，離諸重擔，逮得己利，盡諸有結，正智心得解脫。」

(04) 佛說此經已，諸比丘聞佛所說，歡喜奉行。

(印八二一)(光六六一)(大六四九)

經文(四五九)【S52】

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「有五根。何等為五？」

(03) 謂信根、精進根、念根、定根、慧根。

(4a) 此五根，一切皆為慧根所攝受。

(4b) 譬如堂閣眾材，棟為其首，皆依於棟，以攝持故。

(4c) 如是五根，慧為其首，以攝持故。」

(05) 佛說此經已，諸比丘聞佛所說，歡喜奉行。

(印八二六)(光六六六)(大六五四)

經文（四六〇）【S52】

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「有五根。何等為五？」
- (03) 謂信根、精進根、念根、定根、慧根。
- (4a) 信根者，當知是四不壞淨。
- (4b) 精進根者，當知是四正斷。
- (4c) 念根者，當知是四念處。
- (4d) 定根者，當知是四禪。
- (4e) 慧根者，當知是四聖諦。
- (05) 此諸功德，一切皆是慧為其首，以攝持故。」
- (06) 〔佛說此經已〕，諸比丘聞佛所說，歡喜奉行。

(印八二七)(光六六七)(大六五五)

經文（四六一）【S52】

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「有五根。何等為五？」
- (03) 〔謂〕信根、精進根、念根、定根、慧根。
- (4a) 若聖弟子成就慧根者，能修信根，依離、依無欲、依滅、向於捨，是名信根成就；信根成就，即是慧根。
- (4b) 如信根，如是精進根、念根、定根、慧根，亦如是說。
- (5a) 是故，〔成就〕此五根，慧根為其首，以攝持故。
- (5b) 譬如堂閣，棟為其首，眾材所依，以攝持故。
- (5c) 如是五根，慧為其首，以攝持故。」
- (06) 佛說此經已，諸比丘聞佛所說，歡喜奉行。

(印八二八)(光六六八)(大六五六)

經文（四六二）【S50】

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「有五根。何等為五？」
- (03) 〔謂〕信根、精進根、念根、定根、慧根。
- (4a) 若聖弟子成就信根者，作如是學：聖弟子！無始生死，無明所著，愛所繫，眾生長夜生死往來流馳，不知本際。有因故有生死，因永盡者則無生死。無明大闇聚障礙，誰般涅槃？唯苦滅、苦息、清涼、沒。

(4b) 如信根，如是精進根、念根、定根、慧根，亦如是說。

(5a) 此五根，慧為首，慧所攝持。

(5b) 譬如堂閣，棟為首，棟所攝持。」

(06) 佛說此經已，諸比丘聞佛所說，歡喜奉行。

(印八二九)(光六六九)(大六五七)

經文(四六三)

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「有五根：信根、精進根、念根、定根、慧根。

(3a) 何等為信根？謂聖弟子於如來所起信心，根本堅固，諸天魔、梵，沙門、婆羅門，及諸世間法所不能壞，是名信根。

(3b) 何等為精進根？謂四正斷。

(3c) 何等為念根？謂四念處。

(3d) 何等為定根？謂四禪。

(3e) 何等為慧根？謂四聖諦。

(4a) 此諸功德，皆以慧為首。

(4b) 譬如堂閣，棟為其首。」

(05) 佛說此經已，諸比丘聞佛所說，歡喜奉行。

(印八三〇)(光六七〇)(大六五八)

經文(四六四)【S50】

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「有五根。何等為五？

(03) 謂信根、精進根、念根、定根、慧根。

(4a) 何等為信根？若聖弟子於如來發菩提心，所得淨信心，是名信根。

(4b) 何等為精進根？於如來發菩提心，所起精進方便，是名精進根。

(4c) 〔何等為〕念根？於如來初發菩提心，所起念，〔是名〕念根。

(4d) 何等為定根？於如來初發菩提心，所起三昧，是名定根。

(4e) 何等為慧根？於如來初發菩提心，所起智慧，是名慧根。

(05) 所餘堂閣譬，如上說。」

(06) 佛說此經已，諸比丘聞佛所說，歡喜奉行。

(印八三一)(光六七一)(大六五九)

經文（四六五）

- （01）如是我聞：一時，佛住舍衛國祇樹給孤獨園。
- （02）爾時，世尊告諸比丘：「有五根。何等為五？」
- （03）謂信根、精進根、念根、定根、慧根。
- （04）於此五根修、習、多修習，過去、未來、現在一切苦斷。」
- （05）佛說此經已，諸比丘聞佛所說，歡喜奉行。

（印八三二）

- （06）如苦斷，如是究竟苦邊、苦盡、苦息、苦沒、度苦流、於縛得解、害諸色，過去、未來、現在一切漏盡，亦如是說。

（印八三三～八四〇）（光六七二）（大六六〇）

經文（四六六）【S7】

- （01）如是我聞：一時，佛住舍衛國祇樹給孤獨園。
- （02）爾時，世尊告諸比丘：如上說。
- （3a）差別者：「諸比丘若我於此信根、信根集、信根滅、信根滅道跡不如實知者，我終不得於諸天魔、梵，沙門、婆羅門中，為出、為離，心離顛倒，亦不得成阿耨多羅三藐三菩提。
- （3b）如信根，精進根、念根、定根、慧根，亦如是說。
- （4a）諸比丘！我於此信根，正智如實觀察故，信根集、信根滅、信根滅道跡正智如實觀察故，我於諸天魔、梵，沙門、婆羅門眾中，為出、為離，心離顛倒，成阿耨多羅三藐三菩提。
- （4b）如信根，精進、念、定、慧根，亦如是說。」
- （05）佛說此經已，諸比丘聞佛所說，歡喜奉行。

（印八二二）（光六六二）（大六五〇）

經文（四六七）【S21】

- （01）如是我聞：一時，佛住舍衛國祇樹給孤獨園。
- （02）爾時，世尊告諸比丘：如上說。
- （3a）差別者：「諸比丘！我此信根集、信根沒、信根味、信根患、信根離不如實知者，我不得於諸天魔、梵，沙門、婆羅門眾中，為解脫、為出、為離，心離顛倒，成阿耨多羅三藐三菩提。
- （3b）如是精進根、念根、定根、慧根，亦如是說。

- (4a) 諸比丘！我於信根、信根集、信根沒、信根味、信根患、信根離，如實知故，於諸天魔、梵，沙門、婆羅門眾中，為解脫、為出、為離，心離顛倒，得成阿耨多羅三藐三菩提。
- (4b) 〔如是精進根、念根、定根、慧根，亦如是說〕。」
- (05) 佛說此經已，諸比丘聞佛所說，歡喜奉行。
- (印八二三)(光六六三)(大六五一)

經文(四六八)【S12, 18】

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：如上說。
- (03) 差別者：「若比丘於此五根，若利、若滿足，得阿羅漢。
- (04) 若軟、若劣，得阿那含。
- (05) 若軟、若劣，得斯陀含。
- (06) 若軟、若劣，得須陀洹。
- (07) 〔如是〕滿足者成滿足事，不滿足者成不滿足事，於此五根不空無果。
- (08) 若於此五根一切無者，我說彼為外道凡夫之數。」
- (09) 佛說此經已，諸比丘聞佛所說，歡喜奉行。
- (印八二四)(光六六四)(大六五二)

經文(四六九)【S15, 16, 24】

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：如上說。
- (03) 差別者：「若比丘於彼五根，增上明利滿足者，得阿羅漢俱分解脫。
- (04) 若軟、若劣者，得身證。
- (05) 於彼若軟、若劣，得見到。
- (06) 於彼若軟、若劣，得信解脫。
- (07) 於彼若軟、若劣，得一種。
- (08) 於彼若軟、若劣，得斯陀含。
- (09) 於彼若軟、若劣，得家家。
- (10) 於彼若軟、若劣，得七有。
- (11) 於彼若軟、若劣，得法行。
- (12) 於彼若軟、若劣，得信行。

- (13) 是名比丘根波羅蜜因緣，知果波羅蜜；果波羅蜜因緣，知人波羅蜜。
- (14) 如是滿足者作滿足事，減少者作減少事，彼諸根則不空無果。
- (15) 若無此諸根者，〔我說彼為〕凡夫數。」
- (16) 佛說此經已，諸比丘聞佛所說，歡喜奉行。

(印八二五)(光六六五)(大六五三)

力相應

經文（四七〇）

- （01）如是我聞：一時，佛住舍衛國祇樹給孤獨園。
- （02）爾時，世尊告諸比丘：「有二種力。何等為二？」
- （03）謂數力及修力。
- （4a）何等為數力？
- （4b）謂聖弟子空閑、林中、樹下，作如是思惟：身惡行，現法、後世受於惡報。我若行身惡行者，我當自悔，教他亦悔我，大師亦當悔我，大德梵行亦當悔我，以法責我，惡名流布；身壞命終，當生惡趣泥犁中。如是現法、後報身惡行斷，修身善行。
- （4c）如身惡行，口、意惡行，亦如是說，是名數力。
- （5a）何等為修力？
- （5b）若比丘學於數力，聖弟子數力成就已，隨得修力；得修力已，修力滿足。
- （06）佛說此經已，諸比丘聞佛所說，歡喜奉行。

（印八四一）（光六七三）（大六六一）

經文（四七一）

- （01）如是我聞：一時，佛住舍衛國祇樹給孤獨園。
- （02）爾時，世尊告諸比丘：如上說。
- （03）差別者：「聖弟子學數力成就已，貪、恚、癡若節若盡。
- （04）如是聖弟子依於數力，〔盡〕立數力，隨得修力；得修力已，修力滿足。」
- （05）佛說此經已，諸比丘聞佛所說，歡喜奉行。

（印八四二）（光六七四）（大六六二）

經文（四七二）

- （01）如是我聞：一時，佛住舍衛國祇樹給孤獨園。
- （02）爾時，世尊告諸比丘：如上說。
- （03）差別者：「何等為修力？謂修四念處。」
- （04）佛說此經已，諸比丘聞佛所說，歡喜奉行。

（印八四三）

(05) 如四念處，如是修四正斷、四如意足、五根、五力、〔七覺分〕、八聖道分、四道、四法句、止觀，亦如是說。

(印八四四～八五二)(光六七五)(大六六三)

經文(四七三)

(01) 如是我聞：一時，佛住舍衛國祇樹給孤獨園。

(2a) 爾時，世尊告諸比丘：「有三種力。何等為三？」

(2b) 謂信力、精進力、慧力。」

(印八五三)

(3a) 「復次，三力。何等為三？」

(3b) 謂信力、念力、慧力。」

(印八五四)

(4a) 「復次，三力。何等為三？」

(4b) 謂信力、定力、慧力。」

(05) 佛說此經已，諸比丘聞佛所說，歡喜奉行。

(印八五五)(光六七六)(大六六四)

經文(四七四)

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「有三力，謂信力、精進力、慧力。

(03) 如是比丘！當作是學：我當成就信力、精進力、慧力。」

(04) 佛說此經已，諸比丘聞佛所說，歡喜奉行。

(印八五六)

(05) 如精進力，念力、定力亦如是說。

(印八五七～八五八)(光六七七)(大六六五)

經文(四七五)

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「有三力：信力、念力、慧力。

(03) 何等為信力？謂聖弟子於如來所，入於淨信，根本堅固，諸天魔、梵，沙門、婆羅門，及諸同法所不能壞，是名信力。

(04) 何等為精進力？謂修四正斷。

(05) 何等為慧力？謂四聖諦。」

(06) 佛說此經已，諸比丘聞佛所說，歡喜奉行。

(印八五九)

(07) 餘二力，如上說。

(印八六〇～八六一)(光六七八)(大六六六)

經文(四七六)

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「有四力。何等為四？」

(03) 謂信力、精進力、念力、慧力。」

(印八六二)

(04) 「復次，四力：信力、念力、定力、慧力。」

(印八六三)

(05) 「復次，四力：覺力、精進力、無罪力、攝力。」

(06) 此諸經，如上三力說。

(7a) 差別者：「何等為覺力？於善、不善法如實知，有罪、無罪，習近、不習近，卑法、勝法，黑法、白法，有分別法、無分別法，緣起法、非緣起法如實知，是名覺力。

(7b) 何等為精進力？謂四正斷，如前廣說。

(7c) 何等為無罪力？謂無罪身、口、意，是名無罪力。

(7d) 何等為攝力？謂四攝事——惠施、愛語、行利、同利。」

(08) 佛說此經已，諸比丘聞佛所說，歡喜奉行。

(印八六四)(光六七九)(大六六七)

經文(四七七)

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：如上說。

(3a) 差別者：「若最勝施者，謂法施。

(3b) 最勝愛語者，謂善男子樂聞應時說法。

(3c) 行利最勝者，〔謂〕不信者，能令入信，建立於信；立戒者以淨戒，慳者以施，惡智者以正智令入建立。

(3d) 同利最勝者，謂阿羅漢以阿羅漢，阿那含以阿那含，斯陀含以斯陀含，須陀洹以須陀洹，淨戒者以〔淨戒〕而授於彼。」

(04) 佛說此經已，諸比丘聞佛所說，歡喜奉行。

(印八六五)(光六八〇)(大六六八)

經文（四七八）

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：如上說。
- (3a) 差別者：「若所有法是眾之所取，一切皆是四攝事。或有一取施者，或一取愛語者，或一取行利者，或一取同利者。
- (3b) 過去世時，過去世眾〔已〕有所取者，亦是四攝事。
- (3c) 未來世眾當有所取者，亦是四攝事，或一取施者，或一取愛語〔者〕，或一取行利者，或一取同利〔者〕。」
- (04) 爾時，世尊即說偈言：
- 布施及愛語，或有行利者，同利諸行生，各隨其所應，
以此攝世間，猶車因釭運。世無四攝事，母恩子養忘，
亦無父等尊，謙下之奉事。以有四攝事，隨順之法故，
是故有大士，德被於世間。
- (05) 佛說此經已，諸比丘聞佛所說，歡喜奉行。

（印八六六）（光六八一）（大六六九）

經文（四七九）

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「有四力。何等為四？
- (03) 謂覺力、精進力、無罪力、攝力，如上說。
- (04) 若比丘成就此四力者，得離五恐怖。何等五？
- (05) 謂不活恐怖、惡名恐怖、眾中恐怖、死恐怖、惡趣恐怖，是名五恐怖。」
- (06) 佛說此經已，諸比丘聞佛所說，歡喜奉行。

（印八六七）（光六八二）（大六七〇）

經文（四八〇）

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：如上說。
- (3a) 差別者：「聖弟子成就此四力者，當作是學：我不畏不活，我何緣畏不活？若身行不淨行、口不淨行、意不淨行，作諸邪貪、不信、懈怠、不精進、失念、不定、惡慧、慳、不攝者，彼應畏不活。我有四力，謂覺力、精進力、無罪力、攝力，有此四力成就故，不應畏。

(3b) 如不活畏，如是惡名畏、眾中畏、死畏、惡趣畏，亦如上說。」

(04) 佛說此經已，諸比丘聞佛所說，歡喜奉行。

(印八六八)(光六八三)(大六七一)

經文(四八一)

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「有四力：覺力、精進力、無罪力、攝力。

(03) 何等為覺力？謂慧、大慧、深慧、難勝慧，是名覺力。

(04) 何等為精進力？若於不善法、不善數，黑、黑數，有罪、有罪數，不應親近、不應親近數；離此諸法已，若諸餘善、善數，白、白數，無罪、無罪數，應親近、應親近數，如此等修習增上精勤，欲方便堪能，正念、正知而學，是名精進力。

(05) 無罪力、攝力，如上修多羅說。」

(06) 佛說此經已，諸比丘聞佛所說，歡喜奉行。

(印八六九)(光六八四)(大六七二)

經文(四八二)

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「有五力。何等為五？

(03) 〔謂〕信力、精進力、念力、定力、慧力。」

(04) 佛說是經已，諸比丘聞佛所說，歡喜奉行。

(印八七〇)(光六八五)(大六七三)

經文(四八三)

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：如上說。

(03) 差別者：「諸比丘當作是學：我當勤加精進，成就信力、精進力、念力、定力、慧力。」

(04) 佛說此經已，諸比丘聞佛所說，歡喜奉行。

(印八七一)(光六八六)(大六七四)

經文(四八四)

(01) 如是我聞：一時，佛住舍衛國祇樹給孤獨園。

- (02) 爾時，世尊告諸比丘：如上說。
- (03) 差別者：「彼信力，當知是四不壞淨。
- (04) 精進力者，當知是四正斷。
- (05) 念力者，〔當知是〕四念處。
- (06) 定力者，當知是四禪。
- (07) 慧力者，當知是四聖諦。」
- (08) 佛說此經已，諸比丘聞佛所說，歡喜奉行。

(印八七二)(光六八七)(大六七五)

經文(四八五)

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：如上說。
- (03) 差別者：「是故諸比丘當作是學：我成就信力、精進力、念力、定力、慧力。」
- (04) 佛說此經已，諸比丘聞佛所說，歡喜奉行。

(印八七三)(光六八八)(大六七六)

經文(四八六)

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「有五學力。何等為五？」
- (03) 謂信力是學力，精進力是學力，慚力是學力，愧力是學力，慧力是學力。」
- (04) 佛說此經已，諸比丘聞佛所說，歡喜奉行。

(印八七四)(光六八九)(大六七七)

經文(四八七)

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：如上說。
- (03) 差別者：「諸比丘當作是學：我當成就信力是學力，成就精進力是學力，成就慚力是學力，成就愧力是學力，成就慧力是學力。」
- (04) 佛說此經已，諸比丘聞佛所說，歡喜奉行。

(印八七五)(光六九〇)(大六七八)

經文（四八八）

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：如上說。
- (03) 差別者：「何等信力是學力？於如來所，善入於信，根本堅固，諸天魔、梵，沙門、婆羅門，及餘同法所不能壞。
- (04) 何等為精進力是學力？謂四正斷，如前廣說。
- (05) 何等為慚力是學力？謂羞恥，恥於起惡不善法、諸煩惱數，受諸有，熾然苦報，於未來世生老病死、憂悲惱苦，是名慚力是學力。
- (06) 何等為愧力是學力？謂諸可愧事而愧，愧起諸惡不善法、煩惱數，受諸有，熾然苦報，於未來世生老病死、憂悲惱苦，是名愧力是學力。
- (07) 何等為慧力是學力？謂聖弟子住於智慧，成就世間生滅智慧，賢聖、出厭離、決定正盡苦，是名慧力是學力。」
- (08) 佛說此經已，諸比丘聞佛所說，歡喜奉行。

（印八七六）（光六九一）（大六七九）

經文（四八九）

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：如上所說。
- (03) 差別者：「是故諸比丘當作是學：我當成就信力是學力，精進力、慚力、愧力、慧力是學力。」
- (04) 佛說此經已，諸比丘聞佛所說，歡喜奉行。

（印八七七）（光六九二）（大六八〇）

經文（四九〇）

- (01) 如是我聞：一時，佛住舍衛國祇樹給孤獨園。
- (2a) 爾時，世尊告諸比丘：「若比丘於善法，若變、若退、若不久住者，他人審以五種白法來呵責汝。何等為五？
- (2b) 言：汝不以信入於善法，若依信者，能離不善法，修諸善法。汝無精進、無慚、無愧、無慧入於善法故，若依慧者，能離諸不善法，修諸善法。
- (3a) 若比丘於正法不變、不退、久住者，他人當以五種白法來慶慰汝。何等為五？

(3b) 正信入於善法，若依信者，離不善法，修諸善法；精進、慚、愧、慧入於善法，若依慧者，離不善法，修諸善法。」

(04) 佛說此經已，諸比丘聞佛所說，歡喜奉行。

(印八七八)(光六九三)(大六八一)

經文(四九一)

(01) 如是我聞：一時，佛住舍衛國祇樹給孤獨園。

(2a) 爾時，世尊告諸比丘：「若比丘還戒者、退戒者，他人當以五種白法來呵責汝。何等為五？」

(2b) 若比丘不以信入於善法，若依信者，離不善法，修諸善法；不以精進、慚、愧、慧入於善法，若依慧者，離不善法，修諸善法。

(03) 若比丘盡其壽命，純一滿淨，梵行清白者，他人當以五種白法來慶慰汝，如上說。」

(04) 佛說此經已，諸比丘聞佛所說，歡喜奉行。

(印八七九)(光六九四)(大六八二)

經文(四九二)

(01) 如是我聞：一時，佛住舍衛國祇樹給孤獨園。

(2a) 爾時，世尊告諸比丘：「若比丘，若不欲令惡不善法生者，唯有信善法；若信〔退減〕者，不信永住，諸不善法則生。

(2b) 乃至欲令惡不善法不生者，唯有精進、慚、愧、慧。若精進、慚、愧、慧力退減，惡慧永住者，惡不善法則生。

(3a) 若比丘依於信者，則離不善法，修諸善法。

(3b) 依精進、慚、愧、慧者，則離不善法，修諸善法。」

(04) 佛說此經已，諸比丘聞佛所說，歡喜奉行。

(印八八〇)(光六九五)(大六八三)

經文(四九三)

(01) 如是我聞：一時，佛住舍衛國祇樹給孤獨園。

(2a) 爾時，世尊告諸比丘：「若比丘於色生厭、離欲、滅盡、不起、解脫，是名阿羅訶、三藐三佛陀。

(2b) 受、想、行、識，亦如是說。

- (3a) 若復比丘！於色生厭、離欲、〔滅盡〕、不起、解脫者，是名阿羅漢慧解脫。
- (3b) 受、想、行、識，亦如是說。
- (04) 諸比丘！如來、應、等正覺，阿羅漢慧解脫，有何種種別異？」
- (05) 諸比丘白佛：「世尊是法根、法眼、法依，唯願為說，諸比丘聞已，當受奉行。」
- (06) 佛告比丘：「諦聽！善思！當為汝說。如來、應、等正覺者，先未聞法，能自覺知，現法自知，得三菩提；於未來世，能說正法覺諸聲聞，所謂四念處、四正斷、四如意足、五根、五力、七覺分、八聖道分。是名如來、應、等正覺，所未得法能得，未制梵行能制，能善知道，善說道，為眾將導；然後聲聞成就隨法，隨道，樂奉大師教誡教授，善於正法。是名如來、應、等正覺，阿羅漢慧解脫，種種別異。
- (07) 復次，五學力、如來十力。
- (8a) 何等為〔五〕學力？
- (8b) 謂信力、精進力、念力、定力、慧力。
- (09) 何等為如來十力？
- (10a) 謂如來處非處如實知，是名如來初力。若成就此力者，如來、應、等正覺得先佛最勝處智，轉於梵輪，於大眾中能師子吼而吼。
- (10b) 復次，如來於過去、未來、現在，業法受、因事報如實知，是名第二如來力。如來、應、等正覺成就此力，得先佛〔最勝處智〕，能轉梵輪，於大眾中作師子吼而吼。
- (10c) 復次，如來、應、等正覺，〔禪定〕、解脫、三昧、正受，染惡、清淨處淨如實知，是名如來第三力。若此力成就，如來、應、等正覺得先佛最勝處智，能轉梵輪，於大眾中師子吼而吼。
- (10d) 復次，如來知眾生種種諸根差別如實知，是名如來第四力。若成就此力，如來、應、等正覺得先佛最勝處智，能轉梵輪，於大眾中師子吼而吼。
- (10e) 復次，如來悉知眾生種種意解如實知，是名第五如來力。若此力成就，如來、應、等正覺得先佛最勝處智，能轉梵輪，於大眾中師子吼而吼。

- (10f) 復次，如來悉知世間眾生種種諸界如實知，是名第六如來力。若於此力成就，如來、應、等正覺得先佛最勝處智，能轉梵輪，於大眾中師子吼而吼。
- (10g) 復次，如來於一切至處道如實知，是名第七如來力。若此力成就，如來、應、等正覺得先佛最勝處智，能轉梵輪，於大眾中師子吼而吼。
- (10h) 復次，如來於過去宿命種種事憶念，從一生至百千生，從一劫至百千劫，我爾時於彼生，如是族、如是姓、如是名、如是食、如是苦樂覺、如是長壽、如是久住、如是壽分齊，我於彼處死此處生，此處死〔彼處生〕，如是行、如是因，如是方宿命所更，悉如實知，是名第八如來力。若此力成就，如來、應、等正覺得先佛最勝處智，能轉梵輪，於大眾中師子吼而吼。
- (10i) 復次，如來以天眼淨過於人眼，見眾生死時、生時，妙色、惡色，下色、上色，向於惡趣、向於善趣，隨業法受，悉如實知。此眾生身惡業成就，口、意惡業成就，謗毀賢聖，受邪見業，以是因緣，身壞命終墮惡趣，生地獄中。此眾生身善行，口、意善行，不謗賢聖，正見業法受，彼因、彼緣，身壞命終，生善趣天上，悉如實知，是名第九如來力。若此力成就，如來、應、等正覺得先佛最勝處智，能轉梵輪，於大眾中師子吼而吼。
- (10j) 復次，如來諸漏已盡，無漏心解脫，慧解脫，現法自知身作證：我生已盡、梵行已立、所作已作、自知不受後有。是名為第十如來力。若此力成就，如來、應、等正覺得先佛最勝處智，能轉梵輪，於大眾中師子吼而吼。
- (11) 如此十力，唯如來成就，是名如來與聲聞種種差別。」
- (12) 佛說此經已，諸比丘聞佛所說，歡喜奉行。

(印八八一)(光六九六)(大六八四)

經文(四九四)

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「譬如嬰兒，父母生已，付其乳母，隨時摩拭，隨時沐浴，隨時乳哺，隨時消息。若乳母不謹慎者，兒或以草、以土諸不淨物，著其口中，乳母當即教令除去。能時除卻者善，兒不能自卻者，乳母當以左手持其頭，右手探其

哽；嬰兒當時雖苦，乳母要當苦探其哽，為欲令其子長夜安樂故。

- (03) 佛告諸比丘：若嬰兒長大有所識別，復持草土諸不淨物著口中不？」
- (04) 比丘白佛：「不也，世尊！嬰兒長大，有所別知，尚不以腳觸諸不淨物，況著口中！」
- (05) 佛告比丘：「嬰兒小時，乳母隨時料理消息，及其長大智慧成就，乳母放捨，不勤消息，以其長大不自放逸故。
- (06) 如是比丘！若諸聲聞始學，智慧未足，如來以法隨時教授而消息之。若久學智慧深固，如來放捨，不復隨時殷勤教授，以其智慧成就不放逸故。是故，聲聞五種學力，如來成就十種智力，如上廣說。」
- (07) 佛說此經已，諸比丘聞佛所說，歡喜奉行。

(印八八二)(光六九七)(大六八五)

經文(四九五)

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「如來有六種力，若六種力成就，如來、應、等正覺得先佛最勝處智，能轉梵輪，於大眾中師子吼而吼。
- (3a) 謂處非處如實知，如來初力。
- (3b) 復次，過去、未來、現在，以〔業〕法受如實知，如上廣說，是名第二如來力。
- (3c) 復次，如來〔禪定〕、解脫、三昧、正受如實知，如上廣說，是名如來第三力。
- (3d) 復次，如來過去種種宿命之事如實知；如上廣說，是名如來第四力。
- (3e) 復次，如來天眼淨過於人眼，見諸眾生死此生彼，如上廣說，是名如來第五力。
- (3f) 復次，如來結漏已盡，無漏心解脫，慧解脫，如上廣說，乃至於眾中師子吼而吼，是名如來第六力。」
- (04) 佛說此經已，諸比丘聞佛所說，歡喜奉行。

(印八八三)(光六九八)(大六八六)

經文（四九六）

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：如上說。
- (3a) 差別者：「若有來問我者，如來處非處力，如如來處非處智力，所知見覺成等正覺，為彼記說。
- (3b) 若復來問如來自以〔業〕受智力，如如來自以〔業〕受智力，所知見覺，成等正覺，為彼記說，是名第二如來智力。
- (3c) 若有來問如來禪定、解脫、三昧、正受智力，如如來禪定、解脫、三昧、正受，為彼記說。
- (3d) 若有來問宿命所更智力，如如來宿命所更，所知見覺，為彼記說。
- (3e) 若有來問如來天眼智力，如如來天眼所見，為彼記說。
- (3f) 若有來問如來漏盡智力，如如來漏盡智力，所知見覺，為彼記說。」
- (04) 佛說此經已，諸比丘聞佛所說，歡喜奉行。

（印八八四）（光六九九）（大六八七）

經文（四九七）

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「有七力。何等為七？」
- (03) 〔謂〕信力、精進力、慚力、愧力、念力、定力、慧力。」
- (04) 爾時，世尊即說偈言：
- 信力精進力，慚力及愧力，正念定慧力，是說名七力。
- 成就七力者，得盡諸有漏。
- (05) 佛說此經已，諸比丘聞佛所說，歡喜奉行。

（印八八五）（光七〇〇）（大六八八）

經文（四九八）

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：有七力，如上說。
- (03) 差別者：「是故，比丘！當如是學：我當成就信力；如是精進力、慚力、愧力、念力、定力、慧力，亦當學。」
- (04) 佛說此經已，諸比丘聞佛所說，歡喜奉行。

（印八八六）（光七〇一）（大六八九）

經文（四九九）

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：有七力，如上說。
- (03) 差別者，爾時世尊即說偈言：
- 信力精進力，及說慚愧力，念力定慧力，是名為七力。
- 七力成就者，疾斷諸有漏。
- (04) 佛說此經已，諸比丘聞佛所說，歡喜奉行。
- （印八八七）（光七〇二）（大六九〇）

經文（五〇〇）

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「有七力。何等為七？」
- (03) 〔謂〕信力、精進力、慚力、愧力、念力、定力、慧力。
- (04) 何等為信力？於如來所起信心，深入堅固，諸天魔、梵，沙門、婆羅門，及餘同法所不能壞，是名信力。
- (05) 何等為精進力？謂四正斷，如上廣說。
- (06) 何等為慚力？謂恥惡不善法，如上說。
- (07) 何等為愧力？於可愧事愧，愧起惡不善法，如上說。
- (08) 何等為念力？謂四念處，如上說。
- (09) 何等為定力？謂四禪，如上說。
- (10) 何等為慧力？謂四聖諦，如上說。」
- (11) 佛說此經已，諸比丘聞佛所說，歡喜奉行。
- （印八八八）（光七〇三）（大六九一）

經文（五〇一）

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「有八力。何等為八？」
- (03) 謂自在王者力、斷事大臣力、結恨女人力、啼泣嬰兒力、毀訾愚人力、審諦黠慧力、忍辱出家力、計數多聞力。」
- (04) 佛說此經已，諸比丘聞佛所說，歡喜奉行。
- （印八八九）（光七〇四）（大六九二）

經文（五〇二）

- (01) 如是我聞：一時，佛住舍衛國祇樹給孤獨園。

- (02) 爾時，世尊告諸比丘：如上說。
- (3a) 差別者：「謂自在王〔者〕力者，王者現自在威力。
- (3b) 斷事大臣力者，大臣現斷事之力。
- (3c) 結恨女人力者，女人之法，現結恨力。
- (3d) 啼泣嬰兒力者，嬰兒之法，現啼泣力。
- (3e) 毀咎愚人力者，愚人之法，觸事毀咎。
- (3f) 審諦黠慧力者，智慧之人，常現審諦。
- (3g) 忍辱出家力者，出家之人，常現忍辱。
- (3h) 計數多聞力者，多聞之人，常現思惟計數。」
- (04) 佛說此經已，諸比丘聞佛所說，歡喜奉行。

(印八九〇)(光七〇五)(大六九三)

經文(五〇三)

- (01) 如是我聞：一時，佛住舍衛國祇樹給孤獨園。
- (02) 爾時，尊者舍利弗詣世尊所，稽首禮足，退坐一面，白佛言：
「世尊！漏盡比丘有幾力？」
- (03) 佛告舍利弗：「漏盡比丘有八力。何等為八？」
- (4a) 謂漏盡比丘心順趣於離、流注於離、浚輸於離，順趣於出、流注於出、浚輸於出，順趣涅槃、流注涅槃、浚輸涅槃。
- (4b) 若見五欲，猶見火坑；如是見已，於欲念、欲受、欲著，心不永住。
- (4c) 修四念處；
- (4d) 四正斷；
- (4e) 四如意足；
- (4f) 五根、五力；
- (4g) 七覺分；
- (4h) 八聖道分。」
- (05) 佛說此經已，尊者舍利弗聞佛所說，歡喜奉行。

(印八九一)(光七〇六)(大六九四)

- (07) 如尊者舍利弗問經，如是異比丘問、佛問諸比丘經，亦如上說。
- (印八九二～八九三)(光七〇七～七〇八)(大六九五～六九六)

經文(五〇四)

- (01) 如是我聞：一時，佛住舍衛國祇樹給孤獨園。

- (02) 爾時，世尊告諸比丘：「有九力。何等為九力？」
(03) 謂信力、精進力、慚力、愧力、念力、定力、慧力、數力、修力。」
(04) 佛說此經已，諸比丘聞佛所說，歡喜奉行。
(印八九四)(光七〇九)(大六九七)

經文(五〇五)

- (01) 如是我聞：一時，佛住舍衛國祇樹給孤獨園。
(02) 爾時，世尊告諸比丘：「有九力。何等為九？」
(03) 謂信力、精進力、慚力、愧力、念力、定力、慧力、數力、修力。
(04) 何等為信力？於如來所，起正信心，深入堅固，如上說。
(05) 何等為精進力？謂四正斷，如上說。
(06) 何等為慚力？如上說。
(07) 何等為愧力？如上說。
(08) 何等為念力？謂內身身觀住，如上說。
(09) 何等為定力？謂四禪。
(10) 何等為慧力？謂四聖諦。
(11) 何等為數力？謂聖弟子，若於閑房、樹下，作如是學：身、口、惡行者，於現法、後世當受惡報，如上廣說。
(12) 何等為修力？謂修四念處，如前說。」
(13) 佛說此經已，諸比丘聞佛所說，歡喜奉行。
(印八九五)(光七一〇)(大六九八)

經文(五〇六)

- (01) 如是我聞：一時，佛住舍衛國祇樹給孤獨園。
(02) 爾時，世尊告諸比丘：「有十力。何等為十？」
(03) 自在王者力、斷事大臣力、機關工巧力、刀劍賊盜力、怨恨女人力、啼泣嬰兒力、毀訾愚人力、審諦黠慧力、忍辱出家力、計數多聞力。」
(04) 佛說此經已，諸比丘聞佛所說，歡喜奉行。
(印八九六)(光七一一)(大六九九)

經文（五〇七）

- (01) 如是我聞：一時，佛住舍衛國祇樹給孤獨園。
(02) 爾時，世尊告諸比丘：如上說。
(3a) 差別者：「謂自在王力者，王者現自在威力。
(3b) 斷事大臣力者，大臣現斷事之功力。
(3c) 機關工巧力〔者〕，造機關者現其工巧力。
(3d) 刀劍盜賊力〔者〕，盜賊必現刀劍力。
(3e) 結恨女人力者，女人之法，現結恨力。
(3f) 啼泣嬰兒力者，嬰兒之法，現啼泣力。
(3g) 毀訾愚人力者，愚人之法，觸事毀訾。
(3h) 審諦黠慧力者，智慧之人，常現審諦。
(3i) 忍辱出家力者，出家之人，常現忍辱。
(3j) 計數多聞力者，凡思惟計數，現多聞之力。」
(04) 佛說此經已，諸比丘聞佛所說，歡喜奉行。

（印八九七）（光七一二）（大七〇〇）

經文（五〇八）

- (01) 如是我聞：一時，佛住舍衛國祇樹給孤獨園。
(02) 爾時，世尊告諸比丘：「有十種如來力，若此力成就，如來、應、等正覺，得先佛最勝處，能轉梵輪，於大眾中師子吼而吼。何等為十？
(3a) 謂如來處非處如實知，是名初力。
(3b) 乃至漏盡，如上說。」
(04) 佛說此經已，諸比丘聞佛所說，歡喜奉行。

（印八九八）（光七一三）（大七〇一）

經文（五〇九）

- (01) 如是我聞：一時，佛住舍衛國祇樹給孤獨園。
(02) 爾時，世尊告諸比丘：如上說。
(3a) 差別者：「若有來問如來處非處智力，如如來處非處智力，所
知所見所覺，成等正覺，為彼記說。
(3b) 如是乃至漏盡智力，廣說如上。」
(04) 佛說此經已，諸比丘聞佛所說，歡喜奉行。

（印八九九）（光七一四）（大七〇二）

經文（五一〇）

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「若所有法，彼彼意解作證，悉皆如來無畏智所生。若比丘來為我聲聞，不諂、不偽、質直心生，我則教誡、教授，為其說法。
- (03) 晨朝為彼教誡、教授說法，至日中時得勝進處；若日暮時為彼教誡、教授說法，至晨朝時得勝進處。
- (04) 如是教授已，彼生正直心：實則知實，不實知不實，上則知上，無上則知無上；當知、當見、當得、當覺者，皆悉了知，斯有是處，謂五學力、十種如來力。
- (5a) 何等為五學力？
- (5b) 謂信力、精進力、念力、定力、慧力。
- (6a) 如來十種力。何等為十？
- (6b) 謂是處非處如實知，如上十力廣說。
- (7a) 若有來問處非處智力者，如如來處非處智，等正覺所知所見所覺，為彼記說。
- (7b) 乃至漏盡智力，亦如是說。
- (8a) 諸比丘！處非處智力者，我說是定非不定。
- (8b) 乃至漏盡智者，我說是定非不定。
- (09) 定者正道，非定者邪道。」
- (10) 佛說此經已，諸比丘聞佛所說，歡喜奉行。

（印九〇〇）（光七一五）（大七〇三）

覺支相應

經文（五一一）【S22】

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「有七覺分。何等為七？」
- (03) 謂念覺分，乃至捨覺分。」
- (04) 佛說此經已，諸比丘聞佛所說，歡喜奉行。

（印九二五）（光七四〇）（大七二八）

經文（五一二）【S27】

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「當修七覺分。何等為修七覺分？」
- (03) 謂念覺分，乃至捨覺分。
- (4a) 若比丘修念覺分，依遠離、依無欲、依滅、向於捨。
- (4b) 如是修擇法、精進、喜、猗、定、捨覺分，依遠離、依無欲、依滅、向於捨。」
- (05) 佛說此經已，諸比丘聞佛所說，歡喜奉行。

（印九二六）（光七四一）（大七二九）

經文（五一三）【S41】

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：如上說。
- (03) 差別者：「諸比丘！過去已如是修七覺分，未來亦當如是修七覺分。」
- (04) 佛說此經已，諸比丘聞佛所說，歡喜奉行。

（印九二七）（光七四二）（大七三〇）

經文（五一四）【S10】

- (01) 如是我聞：一時，佛住舍衛國祇樹給孤獨園。
- (2a) 爾時，世尊告諸比丘：「若比丘念覺分清淨、鮮白，無有支節，離諸煩惱，未起不起，除佛調伏教授。
- (2b) 乃至捨覺分，亦如是說。
- (3a) 諸比丘！念覺分清淨、鮮白，無有支節，離諸煩惱，未起而起，佛所調伏教授非餘。

(3b) 乃至捨覺分，亦如是說。」

(04) 佛說此經已，諸比丘聞佛所說，歡喜奉行。

(印九二八)(光七四三)(大七三一)

經文(五一五)【S10】

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：如上說。

(03) 差別者：「未起不起，除善逝調伏教授；未起而起，是則善逝調伏教授非餘。」

(04) 佛說此經已，諸比丘聞佛所說，歡喜奉行。

(印九二九)(光七四四)(大七三二)

經文(五一六)【S52】

(01) 如是我聞：一時，佛住舍衛國祇樹給孤獨園。

(02) 時有眾多比丘，晨朝著衣持鉢，入舍衛城乞食。時眾多比丘作是念：今日太早，乞食時未至，我等且過諸外道精舍。

(03) 眾多比丘即入外道精舍，與諸外道共相問訊慰勞，問訊慰勞已，於一面坐已。

(04) 諸外道問比丘言：「沙門瞿曇為諸弟子說法：斷五蓋；〔煩惱覆心，令慧力贏〕、為障礙分、不轉趣涅槃；住四念處，修七覺意。我等亦復為諸弟子說：斷五蓋；〔煩惱覆心，令慧力贏〕、為障礙分、不轉趣涅槃；善住四念處，修七覺分。我等與彼沙門瞿曇，有何等異？俱能說法。」

(05) 時眾多比丘聞外道所說，心不喜悅，反呵罵，從座起去。入舍衛城乞食已，還精舍，舉衣鉢，洗足已，往詣佛所，稽首佛足，退坐一面。以諸外道所說，具白世尊。

(06) 爾時，世尊告眾多比丘：「彼外道說是語時，汝等應反問言：諸外道！五蓋者種應有十，七覺者種應有十四。何等為五蓋之十、七覺之十四？」

(07) 如是問者，彼諸外道則自駭散，說諸外道法，瞋恚、憍慢，毀訾、嫌恨，不忍心生，或默然低頭，失辯潛思。所以者何？

(08) 我不見諸天魔、梵，沙門、婆羅門，天、人眾中，聞我所說，歡喜隨順者，唯除如來及聲聞眾於此聞者。

(09) 諸比丘！何等為五蓋之十？

- (10a) 謂有內貪欲、有外貪欲：彼內貪欲者，即是蓋，非智、非等覺、不轉趣涅槃；彼外貪欲即是蓋，非智、非等覺、不轉趣涅槃。
- (10b) 謂〔有〕瞋恚、有瞋恚相：若瞋恚及瞋恚相，即是蓋，非智、非等覺、不轉趣涅槃。
- (10c) 有睡、有眠：彼睡、彼眠即是蓋，非智、非等覺、不轉趣涅槃。
- (10d) 有掉、有悔：彼掉、彼悔即是蓋，非智、非等覺、不轉趣涅槃。
- (10e) 有疑善法、有疑不善法：彼善法疑、不善法疑即是蓋，非智、非等覺、不轉趣涅槃。
- (11) 是名五蓋說十。
- (12) 何等為七覺分說十四？
- (13a) 有內法心念住、有外法心念住：彼內法念住，即是念覺分，是智、是等覺、能轉趣涅槃；彼外法念住，即是念覺分，是智、是等覺、能轉趣涅槃。
- (13b) 有擇善法、擇不善法：彼善法擇，即是擇法覺分，是智、是等覺、能轉趣涅槃；彼不善法擇，即是擇法覺分，是智、是等覺、能轉趣涅槃。
- (13c) 有精進斷不善法、有精進長養善法：彼斷不善法精進，即是精進覺分，是智、是等覺、能轉趣涅槃；彼長養善法精進，即是精進覺分，是智、是等覺、能轉趣涅槃。
- (13d) 有喜、有喜處：彼喜即是喜覺分，是智、是等覺、能轉趣涅槃；彼喜處亦即是喜覺分，是智、是等覺、能轉趣涅槃。
- (13e) 有身猗息、有心猗息：彼身猗息即是猗覺分，是智、是等覺、能轉趣涅槃；彼心猗息即是猗覺分，是智、是等覺、能轉趣涅槃。
- (13f) 有定、有定相：彼定即是定覺分，是智、是等覺、能轉趣涅槃；彼定相即是定覺分，是智、是等覺、能轉趣涅槃。
- (13g) 有捨善法、有捨不善法：彼善法捨即是捨覺分，是智、是等覺、能轉趣涅槃；彼不善法捨即是捨覺分，是智、是等覺、能轉趣涅槃。
- (14) 是名七覺分說為十四。」

(15) 佛說此經已，眾多比丘聞佛所說，歡喜奉行。

(印九一〇)(光七二五)(大七一三)

經文(五一七)【S53】

(01) 如是我聞：一時，佛住舍衛國祇樹給孤獨園。

(02) 時有眾多比丘，如上說。

(03) 差別者：「有諸外道出家作如是說者，當復問言：若心微劣、猶豫者，爾時應修何等覺分？何等為非修時？若復掉心者，掉心、猶豫者，爾時復修何等覺分？何等為非時？」

(04) 如是問者，彼諸外道心則駭散，說諸異法，心生忿恚，憍慢、毀訾，嫌恨、不忍，或默然低頭，失辯潛思。所以者何？

(05) 我不見諸天魔、梵，沙門、婆羅門，天、人眾中，聞我所說，歡喜隨喜者，唯除如來及聲聞眾於此聞者。

(6a) 諸比丘！若爾時其心微劣、其心猶豫者，不應修猗覺分、定覺分、捨覺分。所以者何？

(6b) 微劣心生、微劣猶豫，以此諸法，增其微劣故。

(6c) 譬如小火，欲令其燃，增以焦炭，云何比丘！非為增炭令火滅耶？」

(6d) 比丘白佛：「如是，世尊！」

(6e) 「如是比丘！微劣猶豫，若修猗覺分、定覺分、捨覺分者，此則非時，增懈怠故。

(7a) 若掉心起、若掉心猶豫，爾時不應修擇法覺分、精進覺分、喜覺分。所以者何？

(7b) 掉心起、掉心猶豫，以此諸法，能令其增。

(7c) 譬如熾火，欲令其滅，足其乾薪，於意云何？豈不令火增熾燃耶？」

(7d) 比丘白佛：「如是，世尊！」

(7e) 佛告比丘：「如是掉心生、掉心猶豫，修擇法覺分、精進覺分、喜覺分，增其掉心。

(8a) 諸比丘！若微劣心生、微劣猶豫，是時應修擇法覺分、精進覺分、喜覺分。所以者何？

(8b) 微劣心生、微劣猶豫，以此諸法，示、教、照、喜。

(8c) 譬如小火，欲令其燃，足其乾薪，云何比丘！此火寧熾燃不？」

(8d) 比丘白佛：「如是，世尊！」

- (8e) 佛告比丘；「如是微劣心生、微劣猶豫，當於爾時修擇法覺分、精進覺分、喜覺分，示、教、照、喜。
- (9a) 若掉心生、掉心猶豫，修猗覺分、定覺分、捨覺分。所以者何？
- (9b) 掉心生、掉心猶豫，此等諸法，能令內住一心攝持。
- (9c) 譬如燃火，欲令其滅，足其焦炭，彼火則滅。
- (9d) 如是比丘！〔掉心生〕、掉心猶豫，修擇法覺分，精進、喜〔覺分〕，則非時；修猗、定、捨覺分，自此則〔是〕時，此等諸法，內住一心攝持。
- (10) 念覺分者，一切兼助。」
- (11) 佛說此經已，諸比丘聞佛所說，歡喜奉行。

(印九一一)(光七二六)(大七一四)

經文(五一八)【S24】

- (01) 如是我聞：一時，佛住舍衛國祇樹給孤獨園。
- (2a) 爾時，世尊告諸比丘：「若不正思惟者，未起貪欲蓋則起，已起貪欲蓋重生令增廣。
- (2b) 未起瞋恚、睡眠、掉悔、疑蓋則起，已起瞋恚、睡眠、掉悔、疑蓋重生令增廣。
- (2c) 未起念覺支不起，已起念覺支則退。
- (2d) 未起擇法、精進、猗、喜、定、捨覺支不起，已起擇法、精進、猗、喜、定、捨覺支則退。
- (3a) 若比丘正思惟者，未起貪欲蓋不起，已起貪欲蓋令滅。
- (3b) 未起瞋恚、睡眠、掉悔、疑蓋不起，已起瞋恚、睡眠、掉悔、疑蓋則斷。
- (3c) 未起念覺支則起，已起者重生令增廣。
- (3d) 未起擇法、精進、猗、喜、定、捨覺支則起，已起者重生令增廣。」
- (04) 佛說此經已，諸比丘聞佛所說，歡喜奉行。

(印九〇一)(光七一六)(大七〇四)

經文(五一九)【S37】

- (01) 如是我聞：一時，佛住舍衛國祇樹給孤獨園。
- (2a) 爾時，世尊告諸比丘：「有五退法。何等為五？
- (2b) 謂貪欲、瞋恚、睡眠、掉悔、疑蓋，是則退法。

- (3a) 若修習七覺支，多修習令增廣，是則不退法。何等為七？
- (3b) 謂念覺支、擇法覺支、精進覺支、猗覺支、喜覺支、定覺支、捨覺支，是名不退法。」
- (04) 佛說此經已，諸比丘聞佛所說，歡喜奉行。

(印九〇二)(光七一七)(大七〇五)

經文(五二〇)【S40】

- (01) 如是我聞：一時，佛住舍衛國祇樹給孤獨園。
- (2a) 爾時，世尊告諸比丘：「有五法，能為黑闇、能為無目、能為無智、能羸智慧、非明、非等覺、不轉趣涅槃。何等為五？
- (2b) 謂貪欲、瞋恚、睡眠、掉悔、疑。
- (2c) 如此五法，能為黑闇、能為無目、能為無智、非明、非正覺、不轉趣涅槃。
- (3a) 若有七覺支，能作大明、能為目、增長智慧、為明、等正覺、轉趣涅槃。何等為七？
- (3b) 謂念覺支、擇法覺支、精進覺支、猗覺支、喜覺支、定覺支、捨覺支。
- (3c) 「能作大明」、為目、增長智慧、為明、為正覺、轉趣涅槃。」
- (04) 佛說此經已，諸比丘聞佛所說，歡喜奉行。

(印九〇三)(光七一八)(大七〇六)

經文(五二一)【S38】

- (01) 如是我聞：一時，佛住舍衛國祇樹給孤獨園。
- (2a) 爾時，世尊告諸比丘：「有五障、五蓋，煩惱於心、能羸智慧、障闕之分、非明、非正覺、不轉趣涅槃。何等為五？
- (2b) 謂貪欲蓋、瞋恚蓋、睡眠蓋、掉悔蓋、疑蓋。
- (2c) 如此五蓋，為覆、為蓋，煩惱於心、令智慧羸、為障闕分、非明、非等覺、不轉趣涅槃。
- (3a) 若七覺支，非覆、非蓋，不惱於心、增長智慧、為明、為正覺、轉趣涅槃。何等為七？
- (3b) 謂念覺支等如上說，乃至捨覺支。
- (3c) 如此七覺支，非翳、非蓋，不惱於心、增長智慧、為明、為正覺、轉趣涅槃。」
- (04) 爾時，世尊即說偈曰：

貪欲瞋恚蓋，睡眠掉悔疑，如此五種蓋，增長諸煩惱。
此五覆世間，深著難可度，障蔽於眾生，令不見正道。
若得七覺支，則能為照明，唯此真諦言，等正覺所說。
念覺支為首，擇法正思惟，精進猗喜覺，三昧捨覺支；
如此七覺支，牟尼之正道，隨順大仙人，脫生死怖畏。

(05) 佛說此經已，諸比丘聞佛所說，歡喜奉行。

(印九〇四)(光七一九)(大七〇七)

經文(五二二)【S39】

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「若族姓子，捨諸世務，出家學道，剃除鬚髮，著袈裟，正信非家，出家學道。
- (03) 如是出家，而於其中，有愚癡士夫，依止聚落、城邑，晨朝著衣持鉢，入村乞食，不善護身，不守根門，不攝其念，觀察女人少壯好色而生染著。不正思惟，心馳取相，趣色欲想，為欲心熾盛，燒心、燒身，返俗還戒而自退沒。厭離俗務，出家學道而反染著，增諸罪業而自破壞，沉翳沒溺。
- (4a) 有五種大樹，其種至微，〔漸〕生長巨大，而能映障眾雜小樹，蔭翳萎悴，不得生長。何等〔為〕五？
- (4b) 謂捷遮耶樹、迦裨多羅樹、阿濕波他樹、優曇鉢羅樹、尼拘留他樹。
- (4c) 如是五種〔大〕樹，種子至微，而漸漸長大，蔭覆諸節，能令諸節蔭覆墮臥。
- (5a) 〔有五種心樹，種子至微，以增長故，令善心蔭覆墮臥。〕何等為五？
- (5b) 謂貪欲蓋漸漸增長，〔瞋恚〕、睡眠、掉悔、疑蓋漸漸增長。
- (5c) 〔如是五種心樹〕，以增長故，令善心蔭覆墮臥。
- (6a) 若修、習七覺支，多修習已，轉成不退。何等為七？
- (6b) 謂念覺支，擇法、精進、猗、喜、定、捨覺支。
- (6c) 如是七覺支，修、習、多修習已，轉成不退轉。」
- (07) 佛說此經已，諸比丘聞佛所說，歡喜奉行。

(印九〇五)(光七二〇)(大七〇八)

經文（五二三）

- (01) 如是我聞：一時，佛住舍衛國祇樹給孤獨園。
- (02) 「若比丘專一其心，側聽正法，能斷五法，修習七法，令其轉進滿足。
- (3a) 何等為斷五法？
- (3b) 謂貪欲蓋、瞋恚蓋、睡眠蓋、掉悔蓋、疑蓋。
- (3c) 是名五法斷。
- (4a) 何等修習七法？
- (4b) 謂念覺支、擇法覺支、精進覺支、猗覺支、喜覺支、定覺支、捨覺支。
- (4c) 修此七法，轉進滿足。」
- (05) 佛說此經已，諸比丘聞佛所說，歡喜奉行。

（印九〇六）（光七二一）（大七〇九）

經文（五二四）

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「聖弟子清淨信心，專精聽法者，能斷五法，修習七法，令其滿足。
- (3a) 何等為五？
- (3b) 謂貪欲蓋、瞋恚、睡眠、掉悔、疑，此蓋則斷。
- (4a) 何等七法？
- (4b) 謂念覺支，擇法、精進、猗、喜、定、捨覺支，此七法修習滿足。
- (05) 淨信者謂心解脫，智者謂慧解脫。貪欲染心者，不得、不樂；無明染心者，慧不清淨。
- (06) 是故，比丘！離貪欲者，心解脫；離無明者，慧解脫。若彼比丘離貪欲，心解脫，得身作證；離無明，慧解脫。是名比丘斷愛縛、〔轉結〕、慢無間等、究竟苦邊。」
- (07) 佛說此經已，諸比丘聞佛所說，歡喜奉行。

（印九〇七）（光七二二）（大七一〇）

經文（五二五）【S56】

- (01) 如是我聞：一時，佛住王舍城耆闍崛山中。

- (02) 時有無畏王子，日日步涉，仿佯遊行，來詣佛所，與世尊面相問訊，慰勞已，退坐一面，白佛言：「世尊！有沙門、婆羅門作如是見，作如是說：無因、無緣眾生煩惱，無因、無緣眾生清淨。世尊復云何？」
- (03) 佛告無畏：「沙門、婆羅門為其說，不思而說，愚癡不辨不善，非知思，不知量，作如是說：無因、無緣眾生煩惱，無因、無緣眾生清淨。所以者何？」
- (04) 有因、有緣眾生煩惱，有因、有緣眾生清淨故。
- (05) 〔何因、何緣眾生煩惱？〕
- (6a) 謂眾生貪欲增上，於他財物、他眾具而起貪，言此物於我有者好，不離愛樂。
- (6b) 於他眾生而起恨心、兇心，計校欲打、欲縛、欲伏，加諸不道，為造眾難，不捨瞋恚。
- (6c) 身睡眠，心懈怠。
- (6d) 心掉動，內不寂靜。
- (6e) 心常疑惑，過去疑、未來疑、現在疑。
- (07) 無畏！如是因、如是緣，〔眾生煩惱〕。」
- (08) 無畏白佛：「瞿曇！一分之蓋，足煩惱心，況復一切！」
- (09) 無畏白佛：「瞿曇！何因、何緣眾生清淨？」
- (10a) 佛告無畏：「若〔沙門〕、婆羅門有一勝念，決定成就，久時所作，久時所說，能隨憶念，當於爾時習念覺支；修念覺已，〔念覺支〕滿足。
- (10b) 〔念覺支〕滿足已，則於選擇、分別、思惟，爾時擇法覺支修習；修擇法覺支已，擇法覺支滿足。
- (10c) 彼選擇、分別、思量法已，則精進方便，精進覺支於此修習；修精進覺支已，精進覺支滿足。
- (10d) 彼精進方便已，則歡喜生，離諸食想，修喜覺支；修喜覺支已，則喜覺支滿足。
- (10e) 喜覺支滿足已，身心猗息，則修猗覺支；修猗覺支已，〔猗覺支〕滿足。
- (10f) 身猗息已則愛樂，愛樂已心定，則修定覺支；修定覺支已，〔定覺支〕滿足。
- (10g) 〔定覺支〕滿足已，貪憂滅則捨心生，修捨覺支；修捨覺支已，捨覺支滿足。

- (11) 如是無畏！此因此緣，眾生清淨。」
- (12) 無畏白〔佛〕：「瞿曇！若一分滿足，令眾生清淨，況復一切！」
- (13) 無畏白佛：「瞿曇！當何名此經？云何奉持？」
- (14) 佛告無畏：「王子！當名此為《覺支經》。」
- (15) 無畏白佛：「瞿曇！此為最勝覺分！瞿曇！我是王子，安樂亦常求安樂，而希出入。今來上山，四體疲極，得聞瞿曇說《覺支經》，悉忘疲勞。」
- (16) 〔佛說此經〕已，王子無畏聞佛所說，歡喜隨喜，從座起，稽首禮佛足而去。

(印九〇八)(光七二三)(大七一—)

經文(五二六)【S56】

- (01) 如是我聞：一時，佛住王舍城耆闍崛山。如上說。
- (02) 差別者：「有沙門、婆羅門，作如是見、如是說：無因、無緣眾生無智無見，無因、無緣眾生智見」，如是廣說。
- (03) 乃至無畏王子聞佛所說，歡喜隨喜，禮佛足而去。

(印九〇九)(光七二四)(大七一二)

經文(五二七)【S51, 2】

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「有五蓋、七覺分，有食、無食，我今當說。諦聽！善思！當為汝說。」
- (03) 譬如身依食而立非不食，如是五蓋依於食而立非不食。
- (4a) 貪欲蓋以何為食？
- (4b) 謂〔觸淨〕相，於彼不正思惟，未起貪欲令起，已起貪欲能令增廣。
- (4c) 是名欲愛蓋之食。
- (5a) 何等為瞋恚蓋食？
- (5b) 謂障礙相，於彼不正思惟，未起瞋恚蓋令起，已起瞋恚蓋能令增廣。
- (5c) 是名瞋恚蓋食。
- (6a) 何等為睡眠蓋食？
- (6b) 有五法。何等為五？微弱、不樂、欠呿、多食、懈怠。於彼不正思惟，未起睡眠蓋令起，已起睡眠蓋能令增廣。

- (6c) 是名睡眠蓋食。
- (7a) 何等為掉、悔蓋食？
- (7b) 有四法。何等為四？謂親屬覺、人眾覺、天覺、本所經娛樂覺。
自憶念、他人令憶念而生覺。於彼起不正思惟，未起掉、悔令起，已起掉、悔令其增廣。
- (7c) 是名掉悔蓋食。
- (8a) 何等為疑蓋食？
- (8b) 有三世。何等為三？謂過去世、未來世、現在世。於過去世猶豫，未來世猶豫，現在世猶豫。於彼起不正思惟，未起疑蓋令起，已起疑蓋能令增廣。
- (8c) 是名疑蓋食。
- (09) 譬如身依於食而得長養非不食，如是七覺分依食而住，依食長養非不食。
- (10a) 何等為念覺分不食？
- (10b) 為四念處不思惟，未起念覺分不起，已起念覺分令退。
- (10c) 是名念覺分不食。
- (11a) 何等為擇法覺分不食？
- (11b) 謂於善法〔選擇〕、於不善法選擇，於彼不思惟，未起擇法覺分令不起，已起擇法覺分令退。
- (11c) 是名擇法覺分不食。
- (12a) 何等為精進覺分不食？
- (12b) 謂四正斷，於彼不思惟，未起精進覺分令不起，已起精進覺分令退。
- (12c) 是名精進覺分不食。
- (13a) 何等為喜覺分不食？
- (13b) 有喜、有喜處法，於彼不思惟，未起喜覺分不起，已起喜覺分令退。
- (13c) 是名喜覺分不食。
- (14a) 何等為猗覺分不食？
- (14b) 有身猗息及心猗息，於彼不思惟，未生猗覺分不起，已生猗覺分令退。
- (14c) 是名猗覺分不食。
- (15a) 何等為定覺分不食？
- (15b) 有四禪，於彼不思惟，未起定覺分不起，已起定覺分令退。

- (15c) 是名定覺分不食。
- (16a) 何等為捨覺分不食？
- (16b) 有三界，謂斷界、無欲界、滅界。於彼不思惟，未起捨覺分不起，已起捨覺分令退。
- (16c) 是名捨覺分不食。
- (17) 〔譬如身依食而立非不食，如是五蓋依於食而立非不食。〕
- (18a) 何等為貪欲蓋不食？
- (18b) 謂不淨觀，於彼思惟，未起貪欲蓋不起，已起貪欲蓋令斷。
- (18c) 是名貪欲蓋不食。
- (19a) 何等為瞋恚蓋不食？
- (19b) 彼慈心〔思惟已〕，未生瞋恚蓋不起，已生瞋恚蓋令滅。
- (19c) 是名瞋恚蓋不食。
- (20a) 何等為睡眠蓋不食？
- (20b) 彼明照〔思惟已〕，未生睡眠蓋不起，已生睡眠蓋令滅。
- (20c) 是名睡眠蓋不食。
- (21a) 何等為掉悔蓋不食？
- (21b) 彼寂止〔思惟已〕，未生掉悔蓋不起，已生掉悔蓋令滅。
- (21c) 是名掉悔蓋不食。
- (22a) 何等為疑蓋不食？
- (22b) 彼緣起法〔思惟已〕，未生疑蓋不起，已生疑蓋令滅。
- (22c) 是名疑蓋不食。
- (23) 譬如身依食而住，依食而立，如是七覺分依食而住，依食而立。
- (24a) 何等為念覺分食？
- (24b) 謂四念處思惟已，未生念覺分令起，已生念覺分轉生令增廣。
- (24c) 是名念覺分食。
- (25a) 何等為擇法覺分食？
- (25b) 有擇善法、有擇不善法，彼思惟已，未生擇法覺分令起，已生擇法覺分重生令增廣。
- (25c) 是名擇法覺分食。
- (26a) 何等為精進覺分食？
- (26b) 彼四正斷〔思惟已〕，未生精進覺分令起，已生精進覺分重生令增廣。
- (26c) 是名精進覺分食。
- (27a) 何等為喜覺分食？

- (27b) 有喜、有喜處，彼〔思惟已〕，未生喜覺分令起，已生喜覺分重生令增廣。
- (27c) 是名喜覺分食。
- (28a) 何等為猗覺分食？
- (28b) 有身猗息、心猗息，〔思惟已〕，未生猗覺分令起，已生猗覺分重生令增廣。
- (28c) 是名猗覺分食。
- (29a) 何等為定覺分食？
- (29b) 謂有四禪，〔思惟已〕，未生定覺分令生起，已生定覺分重生令增廣。
- (29c) 是名定覺分食。
- (30a) 何等為捨覺分食？
- (30b) 有三界。何等〔為〕三？謂斷界、無欲界、滅界。彼〔思惟已〕，未生捨覺分令起，已生捨覺分重生令增廣。
- (30c) 是名捨覺分食。」
- (31) 佛說此經已，諸比丘聞佛所說，歡喜奉行。

(印九一二)(光七二七)(大七一五)

經文(五二八)

- (01) 如是我聞：一時，佛住舍衛國祇樹給孤獨園。
- (2a) 爾時，世尊告諸比丘：「於內法中，我不見一法，未生惡不善法令生，已生惡不善法重生令增廣，未生善法不生，已生則退，所謂不正思惟。
- (2b) 諸比丘！不正思惟者，未生貪欲蓋令生，已生者重生令增廣；未生瞋恚、睡眠、掉悔、疑蓋令生，已生者重生令增廣。未生念覺分不生，已生者令退；未生擇法、精進、喜、猗、定、捨覺分〔令不生〕，〔已生者〕令退。
- (3a) 我不見一法，能令未生惡不善法不生，已生者令斷，未生善法令生，已生者重生令增廣，〔所謂〕正思惟。
- (3b) 比丘！正思惟者，未生貪欲蓋令不生，已生者令斷；未生瞋恚、睡眠、掉悔、疑蓋令不生，已生者令斷。未生念覺分令生，已生者重生令增廣；未生擇法、精進、喜、猗、定、捨覺分令生，已生者重生令增廣。」

(04) 佛說此經已，諸比丘聞佛所說，歡喜奉行。

(印九一三)(光七二八)(大七一六)

經文(五二九)【S49-50】

(01) 如是我聞：一時，佛住舍衛國祇樹給孤獨園。

(2a) 爾時，世尊告諸比丘：「於外法中，我不見一法，未生惡不善法令生，已生者重生令增廣，未生善法令不生，已生者令退，如惡知識、惡伴黨。

(2b) 惡知識、惡伴黨者，未生貪欲蓋令生，已生者重生令增廣；未生瞋恚、睡眠、掉悔、疑蓋令生，已生者重生令增廣。未生念覺分令不生，已生者令退；未生擇法、精進、喜、猗、定、捨覺分令不生，已生者令退。

(3a) 諸比丘！我不見一法，未生惡不善法令不生，已生者令斷，未生善法令生，已生者重生令增廣，所謂善知識、善伴黨、善隨從者。

(3b) 若善知識、善伴黨、善隨從者，未生貪欲蓋令不生，已生者令斷；未生瞋恚、睡眠、掉悔、疑蓋令不生，已生者令斷。未生念覺分令生，已生者重生令增廣；未生擇法、精進、喜、猗、定、捨覺分令生，已生者重生令增廣。」

(04) 佛說此經已，諸比丘聞佛所說，歡喜奉行。

(印九一四)(光七二九)(大七一七)

經文(五三〇)【S3】

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「善哉！比丘〔依〕人聞法，諸年少比丘供養奉事諸尊長老。所以者何？

(03) 年少比丘供養奉事長老比丘者，時時得聞深妙之法。聞深法已，二正事成就，身正及心正。

(04) 爾時，修念覺分，修念覺分已，念覺分滿足；念覺滿足已，於法選擇，分別於法，思量於法，爾時方便修擇法覺分；乃至捨覺分修習滿足。」

(05) 佛說此經已，諸比丘聞佛所說，歡喜奉行。

(印九二〇)(光七三五)(大七二三)

經文（五三一）【S3】

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「若比丘持戒、修德、慚愧，成真實法，見此人者，多得果報。若復聞者，若隨憶念者，隨出家者，多得功德，況復親近、恭敬、奉事！所以者何？」
- (03) 親近、奉事如是人者，時時得聞深妙之法，得聞深法已，成就二正，身正及心正。
- (04) 方便修習定覺分，修習已修習滿足，乃至捨覺分修習滿足。」
- (05) 佛說此經已，諸比丘聞佛所說，歡喜奉行。

(印九二一)(光七三六)(大七二四)

經文（五三二）

- (01) 如是我聞：一時，佛住舍衛國祇樹給孤獨園。
- (2a) 爾時，世尊告諸比丘：「說不善積聚者，所謂五蓋，是為正說。所以者何？」
- (2b) 純一不善聚者，謂五蓋故。何等為五？謂貪欲蓋、瞋恚蓋、睡眠蓋、掉悔蓋、疑蓋。
- (3a) 說善積聚者，謂七覺分，是為正說。所以者何？」
- (3b) 純一滿淨者，是七覺分故。何等為七？謂念覺分、擇法覺分、精進覺分、喜覺分、猗覺分、定覺分、捨覺分。」
- (04) 佛說此經已，諸比丘聞佛所說，歡喜奉行。

(印九二二)(光七三七)(大七二五)

經文（五三三）

- (01) 如是我聞：一時，佛住王舍城夾谷精舍。
- (02) 爾時，尊者阿難亦在彼住。時尊者阿難，獨一靜處，禪思思惟，作如是念：半梵行者，所謂善知識、善伴黨、善隨從，非惡知識、惡伴黨、惡隨從。
- (03) 時尊者阿難從禪覺，往詣佛所，稽首禮足，退坐一面，白佛言：「世尊！我獨一靜處，禪思思惟，作是念：半梵行者，所謂善知識、善伴黨、善隨從，非惡知識、惡伴黨、惡隨從。」
- (04) 佛告阿難：「莫作是言：半梵行者，謂善知識、善伴黨、善隨從，非惡知識、惡伴黨、惡隨從！所以者何？」

- (05)〔純一滿淨〕，梵行清白，所謂善知識、善伴黨、善隨從，非惡知識、惡伴黨、惡隨從。
- (6a)我為善知識故，有眾生於我所，取念覺分，依遠離、依無欲、依滅、向於捨。
- (6b)如是擇法覺分，精進、喜、猗、定、捨覺分，依遠離、依無欲、依滅、向於捨。
- (07)以是故當知，阿難！〔純一滿淨〕，梵行清白，謂善知識、善伴黨、善隨從，非惡知識、非惡伴黨、非惡隨從。」
- (08)佛說此經已，諸比丘聞佛所說，歡喜奉行。

(印九二三)(光七三八)(大七二六)

經文(五三四)【S16】

- (01)如是我聞：一時，佛在力士聚落人間遊行，於拘夷那竭城希連河中間住；於聚落側，告尊者阿難：「令四重裓疊，敷世尊鬱多羅僧，我今背疾，欲小臥息。」
- (02)尊者阿難即受教敕，四重裓疊敷鬱多羅僧已，白佛言：「世尊！已四重裓疊敷鬱多羅僧，唯世尊知時。」
- (03)爾時，世尊厚裓僧伽梨枕頭，右脅而臥，足足相累，繫念明相，正念、正智，作起覺想，告尊者阿難：「汝說七覺分！」
- (4a)時尊者阿難即白佛言：「世尊！所謂念覺分，世尊自覺成等正覺說，依遠離、依無欲、依滅、向於捨。
- (4b)擇法、精進、喜、猗、定、捨覺分，世尊自覺成等正覺說，依遠離、依無欲、依滅、向於捨。」
- (05)佛告阿難：「汝說精進耶？」
- (06)阿難白佛：「我說精進，世尊！說精進，善逝！」
- (07)佛告阿難：「唯精進修、習、多修習，得阿耨多羅三藐三菩提。」說是語已，正坐端身繫念。
- (08)時有異比丘即說偈言：
- 樂聞美妙法，忍疾告人說。比丘即說法，轉於七覺分。
 善哉尊阿難，明解巧便說，有勝白淨法，離垢微妙說：
 念擇法精進，喜猗定捨覺，此則七覺分，微妙之善說。
 聞說七覺分，深達正覺味，身嬰大苦患，忍疾端坐聽。
 觀為正法王，常為人演說，猶樂聞所說，況餘未聞者！
 第一大智慧，十力所禮者，彼亦應疾疾，來聽說正法。

諸多聞通達，契經阿毘曇，善通法律者，應聽況餘者！
聞說如實法，專心點慧聽，於佛所說法，得離欲歡喜，
歡喜身猗息，心自樂亦然。心樂得正受，正觀有事行，
厭惡三趣者，離欲心解脫。厭惡諸有趣，不集於人天，
無餘猶燈滅，究竟般涅槃。聞法多福利，最勝之所說，
是故當專思，聽大師所說。

(09) 異比丘說此偈已，從座起而去。

(印九二四)(光七三九)(大七二七)

經文(五三五)

(01) 如是我聞：一時，佛住舍衛國祇樹給孤獨園。

(02) 時有異比丘來詣佛所，稽首禮足，退坐一面，白佛言：「世尊
謂覺分，世尊！云何為覺分？」

(03) 佛告比丘：「所謂覺分者，謂七道品法。然諸比丘七覺分，漸
次而起，修習滿足。」

(04) 異比丘白佛：「世尊！云何覺分漸次而起，修習滿足？」

(5a) 佛告比丘：「若比丘內身身觀住，彼內身身觀住時，攝心繫念
不忘，彼當爾時念覺分方便修習，方便修習念覺分已，修習滿
足。滿足念覺分已，於法選擇、分別、思量，當於爾時修擇法
覺分方便，修方便已，修習滿足。如是乃至捨覺分修習滿足。
如內身身觀念住，如是外身、內外身。」

(5b) 受、心、法法觀念住，當於爾時專心繫念不忘；乃至捨覺分亦
如是說。

(06) 如是住者，漸次覺分起，漸次起已，修習滿足。」

(07) 佛說此經已，諸比丘聞佛所說，歡喜奉行。

(印九三〇)(光七四五)(大七三三)

經文(五三六)【S57】

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「如上說」。

(03) 差別者：「若比丘如是修習七覺分已，當得二種果：現法得漏
盡〔有餘涅槃〕，或得阿那含果。」

(04) 佛說此經已，諸比丘聞佛所說，歡喜奉行。

(印九三一)(光七四六)(大七三四)

經文（五三七）

- （01）如是我聞：一時，佛住舍衛國祇樹給孤獨園。
- （02）如上說。
- （03）差別者：「如是比丘修習七覺分已，多修習已，得四種果、四種福利。何等為四？謂須陀洹果、斯陀含果、阿那含果、阿羅漢果。」
- （04）佛說此經已，異比丘聞佛所說，歡喜奉行。

（印九三二）（光七四七）（大七三五）

經文（五三八）【S3】

- （01）如是我聞：一時，佛住舍衛國祇樹給孤獨園。如上說。
- （02）差別者：「若比丘修習七覺分，多修習已，當得七種果、七種福利。何等為七？」
- （3a）是比丘得現法智證樂。
- （3b）若命終時，〔得無餘涅槃〕。
- （3c）及命終時而得五下分結盡，中般涅槃。
- （3d）若不得中般涅槃，而得生般涅槃。
- （3e）若不得生般涅槃，而得無行般涅槃。
- （3f）若不得無行般涅槃，而得有行般涅槃。
- （3g）若不得有行般涅槃，而得上流般涅槃。」
- （04）佛說此經已，異比丘聞佛所說，歡喜奉行。

（印九三三）（光七四八）（大七三六）

經文（五三九）

- （01）如是我聞：一時，佛住舍衛國祇樹給孤獨園。
- （02）爾時，世尊告諸比丘：「所謂覺分。何等為覺分？」
- （03）諸比丘白佛：「世尊是法根、法眼、法依，唯願為說，諸比丘聞已，當受奉行。」
- （04）〔佛告諸比丘〕：「七覺分者，謂七道品法。諸比丘！此七覺分漸次起，漸次起已，修習滿足。」
- （05）諸比丘白佛：「云何七覺分漸次起，漸次起已，修習滿足？」
- （6a）「若比丘身身觀念住，彼身身觀念住已，專心繫念不忘，當於爾時方便修念覺分，方便修念覺分已，修習滿足。謂修念覺分已，於法選擇，當於爾時修擇法覺分方便，修擇法覺分方便已，

修習滿足。如是精進、喜、猗、定、捨覺分，亦如是說。如內身，如是外身、內外身。

(6b) 受、心、法法觀念住，專心繫念不忘，當於爾時方便修念覺分，方便修念覺分已，修習滿足；乃至捨覺分，亦如是說。

(07) 是名比丘七覺分漸次起，漸次起已，修習滿足。」

(08) 佛說此經已，諸比丘聞佛所說，歡喜奉行。

(印九三四)(光七四九)(大七三七)

經文(五四〇)

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：如上說。

(03) 差別者：「此七覺分修、習、多修習，當得二果：得現法智有餘涅槃，及阿那含果。」

(04) 佛說此經已，諸比丘聞佛所說，歡喜奉行。

(印九三五)(光七五〇)(大七三八)

經文(五四一)

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：如上說。

(03) 差別者：「若比丘修習七覺分，多修習已，當得四果。何等為四？」

(04) 謂須陀洹果、斯陀含果、阿那含果、阿羅漢果。」

(05) 佛說此經已，諸比丘聞佛所說，歡喜奉行。

(印九三六)(光七五一)(大七三九)

經文(五四二)

(01) 如是我聞：一時，佛住舍衛國祇樹給孤獨園。如上說。

(02) 差別者：「若比丘修習此七覺分，多修習已，當得七果。何等為七？」

(3a) 謂現法智有餘涅槃。

(3b) 及命終時，〔得無餘涅槃〕。

(3c) 若不爾者，五下分結盡，得中般涅槃。

(3d) 若不爾者，得生般涅槃。

(3e) 若不爾者，得無行般涅槃。

- (3f) 若不爾者，得有行般涅槃。
(3g) 若不爾者，得上流般涅槃。」
(04) 佛說此經已，諸比丘聞佛所說，歡喜奉行。

(印九三七)(光七五二)(大七四〇)

經文(五四三)【S8】

- (01) 如是我聞：一時，佛住巴連弗邑。
(02) 爾時，尊者優波摩、尊者阿提目多，住巴連弗邑雞林精舍。
(03) 爾時，尊者阿提目多，晡時從禪覺，詣尊者優波摩所，共相問訊慰勞已，退坐一面，問尊者優波摩：「尊者能知七覺分方便，如是樂住正受，如是苦住正受？」
(04) 優波摩答言：「尊者阿提目多！比丘善知方便，修七覺分，如是樂住正受，如是苦住正受。」
(05) 復問：「云何比丘善知方便，修七覺分？」
(6a) 優波摩答言：「比丘方便修念覺分時，〔不〕知思惟，彼心不善解脫，不害睡眠，不善調伏〔掉悔〕。如〔此〕念覺處法，思惟精進方便，不得平等。
(6b) 如是擇法、精進、喜、猗、定、捨覺分，亦如是說。
(07) 若比丘念覺分方便時，先思惟，心善解脫，正害睡眠，調伏掉悔。如我於此念覺處法，思惟已，不勤方便而得平等。如是阿提目多！比丘知方便，修七覺分，如是樂住正受，如是不樂住正受。」
(08) 時二正士共論義已，各從座起而去。

(印九一六)(光七三一)(大七一九)

經文(五四四)

- (01) 如是我聞：一時，佛住舍衛國祇樹給孤獨園。
(02) 爾時，尊者阿那律，亦住舍衛國松林精舍。
(03) 時有眾多比丘，詣阿那律所，共相問訊慰勞，問訊慰勞已，退坐一面，語尊者阿那律：「尊者知方便修七覺分時生樂住不？」
(04) 尊者阿那律語諸比丘言：「我知比丘方便修七覺分時生樂住。」
(05) 諸比丘問尊者阿那律：「云何知比丘方便修七覺分時生樂住？」
(6a) 尊者阿那律語諸比丘：「比丘方便修念覺分，善知思惟，我心善解脫，善害睡眠，善調伏掉悔。如此念覺分處法，思惟已，

精勤方便，心不懈怠，身猗息，不動亂，繫心令住，不起亂念，一心正受。

(6b) 如是擇法、精進、〔喜〕、猗、定、捨覺分，亦如是說。

(07) 是名知比丘方便修七覺分時生樂住。」

(08) 時眾多比丘聞尊者阿那律所說，歡喜隨喜，從座起而去。

(印九一七)(光七三二)(大七二〇)

經文(五四五)【S42】

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「轉輪聖王出世之時，有七寶現於世間：金輪寶、象寶、馬寶、神珠寶、玉女寶、主藏臣寶、主兵臣寶。

(03) 如是如來出世，〔亦有七覺分寶現於世間〕。

(04) 所謂念覺分、擇法覺分、精進覺分、喜覺分、猗覺分、定覺分、捨覺分。」

(05) 佛說此經已，諸比丘聞佛所說，歡喜奉行。

(印九一八)(光七三三)(大七二一)

經文(五四六)

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「轉輪聖王出於世時，有七寶現於世間。

(3a) 云何轉輪聖王出於世時金輪寶現？

(3b) 有時剎利灌頂聖王，月十五日，沐浴清淨，受持齋戒，於樓閣上，大臣圍遶。有金輪寶從東方出，輪有千輻，齊轂圓輞，輪相具足，天真金寶。

(3c) 〔王作是念〕：古昔傳聞，剎利灌頂大王月十五日布薩時，沐浴清淨，受持福善，〔有輪寶現，今既如古有斯吉瑞，當知我是轉輪聖王。即以兩手承金輪寶，著左手中，右手旋轉而作是言：若是轉輪聖王金輪寶者，當復轉輪聖王古道而去。〕

(3d) 作是語訖，於是輪寶即從王前乘虛而逝，向於東方，遊古聖王正直之道。王及四兵，隨輪去住。東方諸國處處小王，見聖王來，皆稱善哉。善來大王！此是王國，此國安隱，人民豐樂，願於中止，教化國人，我則隨從。聖王答言：諸聚落主！汝今但當善化國人，有不順者，當來白我。當如法化，莫作非法，亦令國人善化非法。若如是者，則從我化。於是聖王從東海度

乘古聖王道至于南海；〔乘古聖王之道〕，度於南海至西海；
乘於古昔聖王之道，度於西海，至於北海。

- (3e) 南、西、北方諸小國王，奉迎啟請，亦如東方廣說。
- (3f) 於是金輪寶，聖王隨從，度於北海，還至王宮正治殿上，住虛空中，是為轉輪聖王出興于世，金輪寶現於世間。
- (4a) 云何為轉輪聖王出興于世，白象寶現於世間？
- (4b) 若剎利、灌頂大王〔純色〕之象，其色鮮好，七支拄地，聖王見已，心則欣悅。今此寶象來應於我，告善調象師，令速調此寶象，調已送來。象師受命，不盈一日，象即調伏，一切調伏相悉皆具足，猶如餘象經年調者，今此象寶一日調伏亦復如是。調已，送詣王所，上白大王：此象已調，唯王自知時。爾時，聖王觀察此象調相已備，即乘寶象，於晨旦時周行四海，至日中時還歸王宮，是名轉輪聖王出興于世，如此象寶現於世間。
- (5a) 何等為轉輪聖王出興于世，馬寶現於世間？
- (5b) 轉輪聖王所有馬寶，純一青色，烏頭、〔朱〕尾，聖王見馬，心生欣悅。今此神馬來應我故，付調馬師，令速調之，調已送來。馬師奉教，不盈一日，其馬即調，猶如餘馬經年調者，馬寶調伏亦復如是。知馬調已，還送奉王，白言：大王！此馬已調。爾時，聖王觀察寶馬調相已備，於晨旦時，乘此寶馬周行四海，至日中時還歸王宮，是名轉輪聖王出興于世，馬寶現於世間。
- (6a) 何等為轉輪聖王出興于世，摩尼珠寶現於世間？
- (6b) 若轉輪聖王所有寶珠，其形八楞，光澤明照，無諸顚隙，於王宮內常為燈明。轉輪聖王察試寶珠，陰雨之夜，將四種兵入於園林，持珠前導，光明照耀，面一由旬，是為轉輪聖王出興于世，摩尼寶珠現於世間。
- (7a) 何等為轉輪聖王出興于世，賢玉女寶現於世間？
- (7b) 轉輪聖王所有玉女，不黑、不白，不長、不短，不粗、不細，不肥、不瘦，支體端正，寒時體暖，熱時體涼，身體柔軟，如迦陵伽衣。身諸毛孔，出栴檀香，口鼻出息，作優鉢羅香。後臥先起，瞻王意色，隨宜奉事，軟言愛語，端心正念，發王道意，心無違越，況復身、口，是為轉輪聖王寶女。
- (8a) 云何為轉輪聖王主藏臣寶現於世間？

- (8b) 謂轉輪聖王主藏大臣，本行施故，生得天眼，能見伏藏，有主、無主，若水、若陸，若遠、若近，悉能見之。轉輪聖王須珍寶，即便告敕，隨王所須，輒以奉上。於是聖王有時試彼大臣，觀其所能，乘船遊海，告彼大臣：我須寶物。臣白王言：小住岸邊，當以奉上。王告彼臣：我今不須岸邊之寶，且須〔晝時〕與我。於是大臣即於水中，出四金瓮，金寶滿中，以奉聖王。王所須即取用之，若取足已，餘則還歸水中。聖王出世，則有如此主藏之臣現於世間。
- (9a) 云何聖王出興於世，有主兵之臣現於世間？
- (9b) 謂有主兵臣，聰明智辯，譬如世間善思量成就者。聖王所宜，彼則悉從，宜去、宜住，宜出、宜入，聖王四種兵行道里，頓止不令疲倦。悉知聖王宜所應作，現法、後世功德之事，以白聖王。轉輪聖王出興于世，有如是主兵之臣。
- (10) 如是如來、應、等正覺，出興於世，有七覺分現於世間。何等為七？
- (11) 謂念覺分、擇法覺分、精進覺分、喜覺分、猗覺分、定覺分、捨覺分。」
- (12) 佛說此經已，諸比丘聞佛所說，歡喜奉行。

(印九一九)(光七三四)(大七二二)

經文(五四七)【S4】

- (01) 如是我聞：一時，佛住舍衛國祇樹給孤獨園。
- (02) 爾時，尊者舍利弗告諸比丘：「有七覺分。何等為七？
- (03) 謂念覺分、擇法覺分、精進覺分、喜覺分、猗覺分、定覺分、捨覺分。
- (4a) 此七覺分，決定而得，不勤而得，我隨所欲覺分正受；若晨朝時、日中時、日暮時，若欲正受，隨其所欲多入正受。
- (4b) 譬如王、大臣，有種種衣服，置箱籠中，隨其所須，日中所須，日暮所須，隨欲自在。
- (4c) 如是比丘！此七覺分決定而得，不勤而得，隨意正受。
- (5a) 我此念覺分，清淨純白，起時知起，滅時知滅，沒時知沒；已起知已起，已滅知已滅。
- (5b) 如是擇法、精進、喜、猗、定、捨覺分，亦如是說。」

(06) 尊者舍利弗說此經已，諸比丘聞其所說，歡喜奉行。

(印九一五)(光七三〇)(大七一八)

經文(五四八)【S67】

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「當修不淨觀，多修習已，當得大果、大福利。

(03) 云何修不淨觀，多修習已，得大果、大福利？

(4a) 是比丘不淨觀俱，〔修〕念覺分，依遠離、依無欲、依滅、向於捨。

(4b) 修擇法、精進、喜、猗、定、捨覺分，依遠離、依無欲、依滅、向於捨。」

(05) 佛說此經已，諸比丘聞佛所說，歡喜奉行。

(印九三八)(光七五三)(大七四一)

經文(五四九)【S68】

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「若比丘修習隨死念，多修習已，得大果、大福利。

(03) 云何比丘修習隨死念，多修習已，得大果、大福利？

(4a) 是比丘〔隨死念俱，修念覺分〕，依遠離、依無欲、依滅、向於捨。

(4b) 乃至捨覺分，亦如是說。」

(05) 佛說此經已，諸比丘聞佛所說，歡喜奉行。

(印九三九)(光七五四)(大七四二)

經文(五五〇)【S54】

(01) 如是我聞：一時，佛住釋氏黃枕邑。

(02) 時眾多比丘，晨朝著衣持鉢，入黃枕邑乞食。時眾多比丘作是念：今日太早，乞食時未至，我等可過外道精舍。

(03) 爾時，眾多比丘即入外道精舍，與諸外道出家共相問訊慰勞已，於一面坐。

(4a) 諸外道出家言：「沙門瞿曇為諸弟子說如是法：〔斷五蓋：煩惱覆心、令慧力羸、為障礙分、不趣涅槃〕；〔善〕攝其心，

住四念處，心與慈俱，無怨、無嫉、亦無瞋恚，廣大無量，善修充滿；四方、四維、上下，一切世間，心與慈俱，無怨、無嫉、亦無瞋恚，廣大無量善修習充滿。

(4b) 如是修習悲、喜、捨心俱，亦如是說。

(4c) 我等亦復為諸弟子作如是說，我等與彼沙門瞿曇，有何等異？所謂俱能說法。」

(05) 時眾多比丘聞諸外道出家所說，心不喜悅，默然不呵，從座起去，入黃枕邑乞食已，還精舍，舉衣鉢，洗足已，詣佛所，稽首禮足，退坐一面。以彼外道出家所說，廣白世尊。

(06) 爾時，世尊告諸比丘：「如彼外道出家所說，汝等應問：修習慈心，為何所勝？修習悲、喜、捨心，為何所勝？

(07) 如是問時，彼諸外道出家，心則駭散，或說外異事，或瞋慢、毀訾，違背不忍，或默然萎熟低頭，失辯思惟而住。所以者何？

(08) 我不見諸天魔、梵，沙門、婆羅門，天、人眾中，聞我所說，隨順樂者，唯除如來及聲聞眾者。

(9a) 比丘！心與慈俱，多修習，於淨最勝；

(9b) 悲心修、習、多修習，空入處最勝；

(9c) 喜心修、習、多修習，識入處最勝；

(9d) 捨心修、習、多修習，無所有入處最勝。」

(10) 佛說此經已，諸比丘聞佛所說，歡喜奉行。

(印九四〇)(光七五五)(大七四三)

經文(五五一)【S62】

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「若比丘修習慈心，多修習已，得大果、大福利。

(03) 云何比丘！修習慈心，得大果、大福利？

(4a) 是比丘心與慈俱，修念覺分，依遠離、依無欲、依滅、向於捨。

(4b) 乃至修習捨覺分，依遠離、依無欲、依滅、向於捨。」

(05) 佛說此經已，諸比丘聞佛所說，歡喜奉行。

(印九四一)(光七五六)(大七四四)

經文(五五二)

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「若比丘修空入處，多修習已，得大果、大福利。

(03) 云何比丘修空入處，多修習已，得大果、大福利？

(4a) 是比丘心與空入處俱，修念覺分，依遠離、依無欲、依滅、向於捨。

(4b) 乃至修捨覺分，依遠離、依無欲、依滅、向於捨。」

(05) 佛說此經已，諸比丘聞佛所說，歡喜奉行。

(印九四二)

(06) 如修空入處，如是識入處、無所有入處、非想非非想入處——三經，亦如上說。

(印九四三～九四五)(光七五七)(大七四五)

經文(五五三)【S66】

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「若比丘修習安那般那念，多修習已，得大果、大福利。

(03) 云何修習安那般那念，多修習已，得大果、大福利？

(4a) 是比丘心與安那般那念俱，修念覺分，依遠離、依無欲、依滅、向於捨。

(4b) 乃至修捨覺分，依遠離、依無欲、依滅、向於捨。」

(05) 佛說此經已，諸比丘聞佛所說，歡喜奉行。

(印九四六)(光七五八)(大七四六)

經文(五五四)【S57-76】

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「若比丘修無常想，多修習已，得大果、大福利。

(03) 云何比丘修無常想，多修習已，得大果、大福利？

(4a) 是比丘〔心〕與無常想俱，修念覺分，依遠離、依無欲、依滅、向於捨。

(4b) 乃至得捨覺分，依遠離、依無欲、依滅、向於捨。」

(05) 佛說此經已，諸比丘聞佛所說，歡喜奉行。

(印九四七)

(06) 如無常想，如是無常苦想、苦無我想、觀食想、一切世間不可樂想、盡想、斷想、無欲想、滅想、患想、〔死想〕、不淨想、青瘀想、膿潰想、膨脹想、壞想、食〔不淨〕想、血想、分離想、骨想、空想，一一經如上說。

(印九四八～九六七)(光七五九)(大七四七)

聖道分相應/道支相應

經文（五五五）【S83, 90】

- (01) 如是我聞：一時，佛住舍衛國祇樹給孤獨園。
- (2a) 爾時，世尊告諸比丘：「於內法中，我不見一法，能令未生惡不善法生，已生者重生令增廣，如說不正思惟者。
- (2b) 諸比丘！不正思惟者，未起邪見令起，已起重生令增廣；如是邪志、邪語、邪業、邪命、邪方便、邪念、邪定，亦如是說。
- (3a) 諸比丘！於內法中，我不見一法，令未生惡不善法不生，已生惡不善法令滅，如說正思惟者。
- (3b) 諸比丘！正思惟者，未生邪見令不生，已生者令滅；如邪見、邪志、邪語、邪業、邪命、邪方便、邪念、邪定，亦如是說。」
- (04) 佛說此經已，諸比丘聞佛所說，歡喜奉行。

（印九九七）（光七八七）（大七七五）

經文（五五六）【S83, 90】

- (01) 如是我聞：一時，佛住舍衛國祇樹給孤獨園。
- (2a) 爾時，世尊告諸比丘：「於內法中，我不見一法，未生善法不生，已生善法令退，如說不正思惟者。
- (2b) 諸比丘！不正思惟者，未生正見令不生，已生正見令退；如是未生正志、正語、正業、正命、正方便、正念、正定令不生，已生者令退。
- (3a) 諸比丘！於內法中，我不見一法，令未生善法令生，已生善法重生令增廣，如說正思惟者。
- (3b) 諸比丘！正思惟者，未生正見令生，已生正見重生令增廣；如是未生正志、正語、正業、正命、正方便、正念、正定令生，已生者重生令增廣。」
- (04) 佛說此經已，諸比丘聞佛所說，歡喜奉行。

（印九九八）（光七八八）（大七七六）

經文（五五七）【S83, 90】

- (01) 如是我聞：一時，佛住舍衛國祇樹給孤獨園。

- (2a) 爾時，世尊告諸比丘：「於內法中，我不見一法，令未生惡不善法生，已生惡不善法重生令增廣，未生善法不生，已生者令退，所謂不正思惟。
- (2b) 諸比丘！不正思惟者，未生邪見令生，已生者重生令增廣，未生正見〔令〕不生，已生者令退；如是未生邪志、邪語、邪業、邪命、邪方便、邪念、邪定令生，已生者重生令增廣，未生正志、正語、正業、正命、正方便、正念、正定不生，已生者令退。
- (3a) 諸比丘！我於內法中，不見一法，未生惡不善法令不生，已生惡不善法令滅，未生善法令生，已生善法重生令增廣，如說正思惟。
- (3b) 諸比丘！正思惟者，令未生邪見不生，已生邪見令滅，未生正見令生，已生正見重生令增廣；如是未生邪志、邪語、邪業、邪命、邪方便、邪念、邪定令不生，已生者令滅，未生正志、正語、正業、正命、正方便、正念、正定令生，已生者重生令增廣。」
- (04) 佛說此經已，諸比丘聞佛所說，歡喜奉行。

(印九九九)(光七八九)(大七七七)

經文(五五八)【S83, 90】

- (01) 如是我聞：一時，佛住舍衛國祇樹給孤獨園。
- (2a) 爾時，世尊告諸比丘：「於外法中，我不見一法，令未生惡不善法生，已生惡不善法重生令增廣，如說惡知識、惡伴黨、惡隨從。
- (2b) 諸比丘！惡知識、惡伴黨、惡隨從者，能令未生邪見令生，已生邪見重生令增廣；如是未生邪志、邪語、邪業、邪命、邪方便、邪念、邪定令生，已生者重生令增廣。
- (3a) 諸比丘！外法中，我不見一法，令未生惡不善法不生，已生惡不善法令滅，如說善知識、善伴黨、善隨從。
- (3b) 諸比丘！善知識、善伴黨、〔善隨從者〕，能令未生邪見不生，已生邪見令滅；未生邪志、邪語、邪業、邪命、邪方便、邪念、邪定不生，已生者令滅。」
- (04) 佛說此經已，諸比丘聞佛所說，歡喜奉行。

(印一〇〇〇)(光七九〇)(大七七八)

經文（五五九）【S83, 90】

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「於外法中，我不見一法，能令未生善法生，已生善法重生令增廣，如說善知識、善伴黨、善隨從。
- (3a) 諸比丘！善知識、善伴黨、善隨從者，能令未生正見生，已生正見重生令增廣。
- (3b) 如是未生正志、正語、正業、正命、正方便、正念、正定令生，已生者重生令增廣。」
- (04) 佛說此經已，諸比丘聞佛所說，歡喜奉行。

(印一〇〇一)(光七九一)(大七七九)

經文（五六〇）【S83, 90】

- (01) 如是我聞：一時，佛住舍衛國祇樹給孤獨園。
- (2a) 爾時，世尊告諸比丘：「於外法中，我不見一法，能令未生惡不善法生，已生惡不善法重生令增廣，未生善法不生，已生善法令滅，如說惡知識、惡伴黨、惡隨從。
- (2b) 諸比丘！惡知識、惡伴黨、惡隨從者，能令未生邪見令生，已生邪見者重生令增廣，未生正見不生，已生正見令退。
- (2c) 如是未生邪志、邪語、邪業、邪命、邪方便、邪念、邪定令生，已生者重生令增廣，未生正志、正語、正業、正命、正方便、正念、正定令不生，已生者令退。
- (3a) 諸比丘！於外法中，我不見一法，能令未生〔惡不善法〕不生，已生惡不善法令滅，未生善法令生，已生善法重生令增廣，如說善知識、善伴黨、善隨從。
- (3b) 諸比丘！善知識、善伴黨、善隨從，能令未生邪見不生，已生邪見令滅，未生正見令生，已生正見重生令增廣。
- (3c) 如是未生邪志、邪語、邪業、邪命、邪方便、邪念、邪定令不生，已生者令滅，未生正志、正語、正業、正命、正方便、正念、正定令生，已生者重生令增廣。」
- (04) 佛說此經已，諸比丘聞佛所說，歡喜奉行。

(印一〇〇二)(光七九二)(大七八〇)

經文（五六一）

- (01) 如是我聞：一時，佛住舍衛國祇樹給孤獨園。

(2a) 爾時，世尊告諸比丘：「於內法中，我不見一法，能令未生惡不善法生，已生者重生令增廣，未生善法不生，已生者令退，如說不正思惟。

(2b) 諸比丘！不正思惟者，能令未生邪見生，已生邪見令重生增廣，未生正見不生，已生正見令退。

(3a) 諸比丘！於內法中，我不見一法，能令未生惡不善法不生，已生惡不善法令滅，未生善法令生，已生善法重生令增廣，如說正思惟。

(3b) 諸比丘！正思惟者，能令未生邪見不生，已生者令滅，未生正見令生，已生者重生令增廣。」

(04) 佛說此經已，諸比丘聞佛所說，歡喜奉行。

(印一〇〇三)

(05) 如說邪見、正見，如是邪志、正志，邪語、正語，邪業、正業，邪命、正命，邪方便、正方便，邪念、正念，邪定、正定，七經如上說。

(印一〇〇四～一〇一〇)

(06) 如內法八經，如是外法八經，亦如是說。

(印一〇一一～一〇一八)(光七九三)(大七八一)

經文(五六二)【S16-17】

(01) 如是我聞：一時，佛住舍衛國祇樹給孤獨園。

(2a) 爾時，世尊告諸比丘：「若比丘正見清淨、鮮白、無諸過患、離諸煩惱，未起不起，唯除佛所調伏。

(2b) 乃至正定，亦如是說。

(3a) 若正見清淨、鮮白、無諸過患、離諸煩惱，未起能起，〔是則佛所調伏教授非餘。〕

(3b) 乃至正定，亦如是說。」

(04) 佛說此經已，諸比丘聞佛所說，歡喜奉行。

(印九八七)

(05) 如除佛〔所調伏，如是除善逝所調伏〕，亦如上說。

(印九八八)(光七七八)(大七六六)

經文(五六三)

(01) 如是我聞：一時，佛住舍衛國祇樹給孤獨園。

- (2a) 爾時，世尊告諸比丘：「說不善聚者，謂五蓋，是為正說。所以者何？」
- (2b) 純一不善聚者，所謂五蓋。何等為五？謂貪欲蓋、瞋恚、〔睡眠〕、掉悔、疑蓋。
- (3a) 說善法聚者，所謂八聖道，是名正說。所以者何？」
- (3b) 純一滿淨善聚者，謂八聖道。何等為八？謂正見、正志、正語、正業、正命、正方便、正念、正定。」
- (04) 佛說此經已，諸比丘聞佛所說，歡喜奉行。

(印九八九)(光七七九)(大七六七)

經文(五六四)【S2】

- (01) 如是我聞：一時，佛住王舍城山谷精舍。
- (02) 時尊者阿難獨一靜處，作如是念：半梵行者，謂善知識、善伴黨、善隨從。
- (03) 乃至佛告阿難：「純一滿淨具梵行者，謂善知識。所以者何？」
- (4a) 我為善知識故，令諸眾生修習正見，依遠離、依無欲、依滅、向於捨。
- (4b) 乃至修正定，依遠離、依無欲、依滅、向於捨。」
- (05) 佛說此經已，尊者阿難聞佛所說，歡喜奉行。

(印九九〇)(光七八〇)(大七六八)

經文(五六五)【S4】

- (01) 如是我聞：一時，佛住舍衛國祇樹給孤獨園。
- (02) 爾時，尊者阿難，晨朝著衣持鉢，入舍衛城乞食。
- (03) 時有生聞婆羅門，乘白馬車，眾多年少翼從，白馬、白車、白鞵、白鞭，頭著白帽、白傘蓋，手持白拂，著白衣服、白瓔珞，白香塗身，翼從皆白；出舍衛城，欲至林中教授讀誦。眾人見之，咸言：「善乘！善乘！謂婆羅門乘。」
- (04) 時尊者阿難見婆羅門眷屬眾具，一切皆白。見已，入城乞食，還精舍，舉衣鉢，洗足已，往詣佛所，稽首禮足，退坐一面，白佛言：「世尊！今日晨朝，著衣持鉢，入舍衛城乞食，見生聞婆羅門，乘白馬、車，眷屬眾具一切皆白。眾人唱言：善乘！善乘！謂婆羅門乘。云何世尊！於正法律，為是世人乘，為是婆羅門乘？」

- (05) 佛告阿難：「是世人乘，非我法律婆羅門乘也。阿難！我正法律乘、天乘、婆羅門乘、大乘，能調伏煩惱軍者。諦聽！善思！當為汝說。
- (06) 阿難！何等為正法律乘、天乘、婆羅門乘、大乘，能調伏煩惱軍者？
- (07) 謂八正道，正見乃至正定。阿難！是名正法律乘、天乘、梵乘、大乘，能調伏煩惱軍者。」
- (08) 爾時，世尊即說偈言：
- 信、戒為法軌，慚愧為長縻，正念善護持，以為善御者，
捨、三昧為轅，智慧精進輪，無著忍辱鎧，安隱如法行。
直進不退還，永之無憂處，智士乘戰車，摧伏無智怨。
- (印九九一)(光七八一)(大七六九)

經文（五六六）【S30】

- (01) 如是我聞：一時，佛住舍衛國祇樹給孤獨園。
- (02) 爾時，迦摩比丘詣佛所，稽首佛足，退坐一面，白佛言：「世尊！所謂欲者，云何為欲？」
- (03) 佛告迦摩：「欲謂五欲功德。何等為五？謂〔眼識色〕，可愛、可意、可念、長養欲樂；如是耳、鼻、舌、身識觸，可愛、可意、可念、長養欲樂，是名為欲。然彼非欲，於彼貪著者，是名為欲。」
- (04) 爾時世尊即說偈言：
- 世間雜五色，彼非為愛欲，貪欲覺想者，是則士夫欲。
眾色常住世，行者斷心欲。
- (05) 迦摩比丘白佛言：「世尊！寧有道、有跡斷此愛欲不？」
- (06) 佛告比丘：「有八正道，能斷愛欲，謂正見、正志、正語、正業、正命、正方便、正念、正定。」
- (07) 佛說此經已，迦摩比丘聞佛所說，歡喜奉行。
- (印九七二)(光七六四)(大七五二)

經文（五六七）【S7】

- (01) 如是我聞：一時，佛住舍衛國祇樹給孤獨園。
- (02) 時有比丘名阿梨瑟吒，詣佛所，稽首佛足，退坐一面，白佛言：「世尊！所謂甘露者，云何名為甘露？」

- (03) 佛告阿梨瑟吒：「甘露者，〔涅槃界〕名說，然我為有漏盡者，現說此名。」
- (04) 阿梨瑟吒比丘白佛言：「世尊！有道、有跡，修、習、多修習，得甘露法不？」
- (05) 佛告比丘：「有，所謂八聖道分，謂正見乃至正定。」
- (06) 佛說此經已，諸比丘聞佛所說，歡喜奉行。

(印九七三)(光七六五)(大七五三)

經文(五六八)

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「無母子畏、有母子畏，愚癡無聞凡夫所說，而不能知無母子畏、有母子畏。」
- (03) 諸比丘！有三種無母子畏，愚癡無聞凡夫所說。何等為三？
- (4a) 諸比丘！有時兵兇亂起，殘害國土，隨流波迸，子失其母，母失其子，是名第一無母子畏，愚癡無聞凡夫所說。
- (4b) 復次，比丘！有時大火卒起，焚燒城邑、聚落，人民馳走，母子相失，是名第二無母子畏，愚癡無聞凡夫所說。
- (4c) 復次，比丘！有時山中大雨，洪水流出，漂沒聚落，人民馳走，母子相失，是名第三無母子畏，愚癡無聞凡夫所說。
- (5a) 然此等畏，是有母子畏，愚癡無聞凡夫說名無母子畏。彼有時兵兇亂起，殘害國土，隨流波迸，母子相失，或時於彼母子相見，是名第一有母子畏，愚癡無聞凡夫說名無母子畏。
- (5b) 復次，大火卒起，焚燒城邑、聚落，人民馳走，母子相失，或復相見，是名第二有母子畏，愚癡無聞凡夫說名無母子畏。
- (5c) 復次，山中大雨，洪水流出，漂沒聚落，此人馳走，母子相失，或尋相見，是名第三有母子畏，愚癡無聞凡夫說名無母子畏。
- (06) 比丘！有三種無母子畏，是我自覺成三菩提之所記說。何等為三？
- (7a) 若比丘！子若老時，無母能語子：汝莫老！我當代汝。其母老時，亦無子語母：〔今〕莫老！我代之老。是名第一無母子畏，我自覺成三菩提之所記說。
- (7b) 復次，比丘！有時子病，母不能語子：今莫病！我當代汝。母病之時，子亦不能語母：莫病！我當代母。是名第二無母子畏，我自覺成三菩提之所記說。

- (7c) 復次，子若死時，無母能語子：今莫死！我今代汝。母若死時，無子能語母：今莫死！我當代母。是名第三無母子畏，我自覺成三菩提之所記說。」
- (08) 諸比丘白佛：「有道、有跡，修、習、多修習，斷前三種有母子畏，斷後三種無母子畏不？」
- (09) 佛告比丘：「有道、有跡，斷彼三畏。何等為道？何等為跡？修、習、多修習，斷前三種有母子畏，斷後三種無母子畏？」
- (10) 謂八聖道分：正見、正志、正語、正業、正命、正方便、正念、正定。」
- (11) 佛說此經已，諸比丘聞佛所說，歡喜奉行。

(印九七八)(光七七〇)(大七五八)

經文(五六九)【S29】

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「有三受，無常、有為、心所、緣生。何等為三？謂樂受、苦受、不苦不樂受。」
- (03) 諸比丘白佛：「世尊！有道、有跡，修、習、多修習，斷此三受不？」
- (04) 佛告比丘：「有道、有跡，修、習、多修習，斷此三受。」
- (05) 「何等為道？何等為跡？修、習、多修習，斷此三受？」
- (06) 佛告比丘：「謂八聖道：正見、正志、正語、正業、正命、正方便、正念、正定。」
- (07) 佛說此經已，諸比丘聞佛所說，歡喜奉行。

(印九七九)(光七七一)(大七五九)

經文(五七〇)

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「世有三法，不可喜、不可愛、不可念。何等為三？謂老、病、死。此三法，不可喜、不可愛、不可念。」
- (3a) 世間若無此三法，不可喜、不可愛、不可念者，無有如來、應、等正覺出於世間，世間亦不知有如來說法，教誡教授。
- (3b) 以世間有此三法，不可喜、不可愛、不可念故，如來、應、等正覺出於世間，世間知有如來說法，教誡教授。」

- (04) 諸比丘白佛：「有道、有跡，斷此三法，不可喜、不可愛、不可念者不？」
- (05) 佛告比丘：「有道、有跡，修、習、多修習，斷此三法，不可喜、不可愛、不可念。」
- (06) 何等為道？何等為跡？修、習、多修習，斷此三法，不可喜、不可愛、不可念？」
- (07) 謂八聖道：正見、正志、正語、正業、正命、正方便、正念、正定。」
- (08) 佛說此經已，諸比丘聞佛所說，歡喜奉行。

(印九八〇)(光七七二)(大七六〇)

經文(五七一)【S13】

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「我當說學及無學。諦聽！善思念之。」
- (03) 何等為學？謂學正見成就，學正志、正語、正業、正命、正方便、正念、正定成就，是名為學。
- (04) 何等為無學？謂無學正見成就，無學正志、正語、正業、正命、正方便、正念、正定成就，是名無學。」
- (05) 佛說此經已，諸比丘聞佛所說，歡喜奉行。

(印九八一)

- (06) 如學、無學，如是正士、〔大士〕，亦如是說。

(印九八二)(光七七三)(大七六一)

經文(五七二)

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「我當說聖漏盡。」
- (03) 云何為聖漏盡？」
- (04) 謂無學正見成就，乃至無學正定成就，是名聖漏盡。」
- (05) 佛說此經已，諸比丘聞佛所說，歡喜奉行。

(印九八三)(光七七四)(大七六二)

經文(五七三)

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「我今當說八聖道分。何等為八？」

(03) 謂正見、正志、正語、正業、正命、正方便、正念、正定。」

(04) 佛說此經已，諸比丘聞佛所說，歡喜奉行。

(印九八四)(光七七五)(大七六三)

經文(五七四)

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「我今當說修八聖道，諦聽！善思！

(3a) 何等為修八聖道？

(3b) 是比丘修正見，依遠離、依無欲、依滅、向於捨。

(3c) 修正志、正語、正業、正命、正方便、正念、正定，依遠離、依無欲、依滅、向於捨。

(3d) 是名修八聖道。」

(04) 佛說此經已，諸比丘聞佛所說，歡喜奉行。

(印九八五)(光七七六)(大七六四)

經文(五七五)

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「我今當說比丘過去已修八聖道，未來當修八聖道。」

(03) 乃至諸比丘聞佛所說，歡喜奉行。

(印九八六)(光七七七)(大七六五)

經文(五七六)【S21】

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「有邪、有正，諦聽！善思！當為汝說。

(03) 何等為邪？謂邪見乃至邪定。

(04) 何等為正？謂正見乃至正定。

(05) 何等為正見？謂說有施、有說、有齋；有善行、有惡行、有善惡行果報；有此世、有他世；有父母、有眾生；有阿羅漢善到、善向，有此世、他世，自知作證具足住：我生已盡、梵行已立、所作已作、自知不受後有。

(06) 何等為正志？謂出要志、無恚志、不害志。

- (07) 何等為正語？謂離妄語、離兩舌、離惡口、離綺語。何等為正業？謂離殺、盜、淫。
- (08) 何等為正命？謂如法求衣服、飲食、臥具、湯藥，非不如法。
- (09) 何等為正方便？謂欲、精進、方便、出離、勤競、堪能、常行、不退。
- (10) 何等為正念？謂念、隨順念，不〔忘〕、不虛。
- (11) 何等為正定？謂住心不亂、堅固、攝持、寂止、三昧、一心。」
- (12) 佛說此經已，諸比丘聞佛所說，歡喜奉行。

(印一〇四一)(光七九六)(大七八四)

經文(五七七)

- (01) 如是我聞：一時，佛住舍衛國祇樹給孤獨園。
- (02) 時有生聞婆羅門，來詣佛所，稽首佛足，與世尊面相問訊慰勞已，退坐一面，白佛言：「瞿曇！所謂正見者。何等為正見？」
- (03) 佛告婆羅門：「正見有二種：有正見世俗、有漏、有取、轉向善趣，有正見是聖、出世間、無漏、不取、正盡苦、轉向苦邊。
- (4a) 何等為正見〔是〕世俗、有漏、有取、轉向善趣？
- (4b) 謂正見有施、有說、有齋，乃至自知不受後有。
- (4c) 婆羅門！是名正見〔是〕世俗、有漏、有取、向於善趣。
- (5a) 婆羅門！何等為正見是聖、出世間、無漏、不取、正盡苦、轉向苦邊？
- (5b) 謂聖弟子，苦、苦思惟，集、滅，道、道思惟，無漏思惟相應，於法選擇、分別、求覺、巧便、點慧、觀察。
- (5c) 是名正見是聖、出世間、無漏、不取、正盡苦、轉向苦邊。」
- (06) 佛說此經已，生聞婆羅門聞佛所說，歡喜隨喜，從座起去。

(印一〇四九)

- (07) 如正見，如是正志、正語、正業、正命、正方便、正念、正定，一一經如上說。

(印一〇五〇～一〇五六)(光八〇一)(大七八九)

經文(五七八)

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：如上說。

- (3a) 差別者：「何等為正見？謂正見有二種：有正見是世俗、有漏、有取、轉向善趣；有正見是聖、出世間、無漏、無取、正盡苦、轉向苦邊。
- (3b) 何等為正見〔是〕有漏、有取、向於善趣？若彼見有施、有說、乃至知世間有阿羅漢，不受後有，是名世間正見，〔是〕世俗、有漏、有取、向於善趣。
- (3c) 何等為正見是聖、出世間、無漏、不取、正盡苦、轉向苦邊？謂聖弟子，苦、苦思惟，集、滅，道、道思惟，無漏思惟相應，於法選擇、分別、推求、覺知、黠慧、開覺、觀察，是名正見是聖、出世間、無漏、不取、正盡苦、轉向苦邊。
- (4a) 何等為正志？謂正志〔有〕二種：有正志〔是〕世俗、有漏、有取、向於善趣；有正志是聖、出世間、無漏、不取、正盡苦、轉向苦邊。
- (4b) 何等為正志有世俗、有漏、有取、向於善趣？謂正志出要覺、無恚覺、不害覺，是名正志〔是〕世俗、有漏、有取、向於善趣。
- (4c) 何等為正志是聖、出世間、無漏、不取、正盡苦、轉向苦邊？謂聖弟子，苦、苦思惟，集、滅，道、道思惟，無漏思惟相應，〔於〕法分別、自決、意解、計數、立意，是名正志是聖、出世間、無漏、不取、正盡苦、轉向苦邊。
- (5a) 何等為正語？正語有二種：有正語世俗、有漏、有取、向於善趣；有正語是聖、出世間、無漏、不取、正盡苦、轉向苦邊。
- (5b) 何等為正語〔是〕世俗、有漏、有取、向於善趣？謂正語離妄語、兩舌、惡口、綺語，是名正語〔是〕世俗、有漏、有取、向於善趣。
- (5c) 何等正語是聖、出世間、無漏、不取、正盡苦、轉向苦邊？謂聖弟子，苦、苦思惟，集、滅，道、道思惟，除邪命〔貪〕口四惡行，諸餘口惡行〔數〕，於彼無漏遠離不著，固守攝持不犯、不度時節、不越限防，是名正語是聖、出世間、無漏、不取、正盡苦、轉向苦邊。
- (6a) 何等為正業？正業有二種：有正業世俗、有漏、有取、向於善趣；有正業是聖、出世間、無漏、不取、正盡苦、轉向苦邊。
- (6b) 何等為正業〔是〕世俗、有漏、有取、轉向善趣？謂離殺、盜、婬，是名正業〔是〕世俗、有漏、有取、轉向善趣。

- (6c) 何等為正業是聖、出世間、無漏、不取、正盡苦、轉向苦邊？
謂聖弟子，苦、苦思惟，集、滅，道、道思惟，除邪命〔貪〕
身三惡行，諸餘身惡行數，無漏心不樂著，固守執持不犯、不
度時節、不越限防，是名正業是聖、出世間、無漏、不取、正
盡苦、轉向苦邊。
- (7a) 何等為正命？正命有二種：有正命是世俗、有漏、有取、轉向
善趣；有正命是聖、出世間、無漏、不取、正盡苦、轉向苦邊。
- (7b) 何等為正命〔是〕世俗、有漏、有取、轉向善趣？謂如法求衣、
食、臥具、隨病湯藥，非不如法，是名正命〔是〕世俗、有漏、
有取、轉向善趣。
- (7c) 何等為正命是聖、出世間、無漏、不取、正盡苦、轉向苦邊？
謂聖弟子，苦、苦思惟，集、滅，道、道思惟，於諸邪命，無
漏不樂著，固守執持不犯、不越時節、不度限防，是名正命是
聖、出世間、無漏、不取、正盡苦、轉向苦邊。
- (8a) 何等為正方便？正方便有二種：有正方便〔是〕世俗、有漏、
有取、轉向善趣；有正方便是聖、出世間、無漏、不取、正盡
苦、轉向苦邊。
- (8b) 何等為正方便〔是〕世俗、有漏、有取、轉向善趣？謂欲、精
進、方便、超出、堅固建立、堪能造作、精進心法攝受、常不
休息，是名正方便〔是〕世俗、有漏、有取、轉向善趣。
- (8c) 何等為正方便是聖、出世間、無漏、不取、〔正〕盡苦、轉向
苦邊？謂聖弟子，苦、苦思惟，集、滅，道、道思惟，無漏〔思
惟相應〕，欲、精進、方便、勤踊、超出、建立堅固、堪能造
作、精進心法攝受、常不休息，是名正方便是聖、出世間、無
漏、不取、正盡苦、轉向苦邊。
- (9a) 何等為正念？正念有二種：有〔正念是〕世俗、有漏、有取、
轉向善趣；有正念是聖、出世間、無漏、不取、正盡苦、轉向
苦邊。
- (9b) 何等為正念〔是〕世俗、有漏、有取、轉向善趣？若念、隨念、
重念、憶念、不〔忘〕、不虛，是名正念〔是〕世俗、有漏、
有取、正向善趣。
- (9c) 何等為正念是聖、出世間、無漏、不取、轉向苦邊？謂聖弟子，
苦、苦思惟，集、滅，道、道思惟，無漏思惟相應，若念、隨

念、重念、憶念、不〔忘〕、不虛，是名正念是聖、出世間、無漏、不取、轉向苦邊。

(10a) 何等為正定？正定有二種：有正定世俗、有漏、有取、轉向善趣；有正定是聖、出世間、無漏、不取、正盡苦、轉向苦邊。

(10b) 何等為正定〔是〕世俗、有漏、有取、轉向善趣？若心住不亂、不動、攝受、寂止、三昧、一心，是名正定〔是〕世俗、有漏、有取、轉向善趣。

(10c) 何等為正定是聖、出世間、無漏、不取、正盡苦、轉向苦邊？謂聖弟子，苦、苦思惟，集、滅，道、道思惟，無漏思惟相應，〔心〕住不亂、不散、攝受、寂止、三昧、一心，是名正定是聖、出世間、無漏、不取、正盡苦、轉向苦邊。」

(11) 佛說此經已，諸比丘聞佛所說，歡喜奉行。

(印一〇四二)(光七九七)(大七八五)

經文(五七九)【S28】

(01) 如是我聞：一時，佛住舍衛國祇樹給孤獨園。

(02) 爾時，尊者舍利弗詣佛所，稽首佛足，退坐一面，白佛言：「世尊！所謂賢聖等三昧根本、眾具，云何為賢聖等三昧根本、眾具？」

(03) 佛告舍利弗：「謂七正道分，為賢聖等三昧，為根本，為眾具。何等為七？謂正見、正志、正語、正業、正命、正方便、正念。

(04) 舍利弗！於此七道分為基業已，得一其心，是名賢聖等三昧根本、眾具。」

(05) 佛說此經已，諸比丘聞佛所說，歡喜奉行。

(印九七四)(光七六六)(大七五四)

(06) 如上三經，如是佛問諸比丘三經，亦如是說。

(印九七五～九七七)(光七六七～七六九)(大七五五～七五七)

經文(五八〇)【S55】

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「如日出前相，謂明相初光。

(03) 如是比丘！正盡苦邊，究竟苦邊，前相者，所謂正見。

(04) 彼正見者，能起正志、正語、正業、正命、正方便、正念、正定。

(05) 起定正受故，聖弟子心正解脫貪欲、瞋恚、愚癡；如是心善解脫聖弟子，得正知見：我生已盡、梵行已立、所作已作、自知不受後有。」

(06) 佛說此經已，諸比丘聞佛所說，歡喜奉行。

(印九六八)(光七六〇)(大七四八)

經文(五八一)【S1】

(01) 如是我聞：一時，佛住舍衛國祇樹給孤獨園。

(2a) 爾時，世尊告諸比丘：「若無明為前相故，生諸惡不善法時，隨生無慚、無愧；無慚、無愧生已，隨生邪見。

(2b) 邪見生已，能起邪志、邪語、邪業、邪命、邪方便、邪念、邪定。

(3a) 若起明為前相，生諸善法時，慚、愧隨生；慚愧生已，能生正見。

(3b) 正見生已，起正志、正語、正業、正命、正方便、正念、正定，次第而起。

(04) 正定起已，聖弟子得正解脫貪欲、瞋恚、愚癡；如是聖弟子得正解脫已，得正知見：我生已盡、梵行已立、所作已作、自知不受後有。」

(05) 佛說此經已，諸比丘聞佛所說，歡喜奉行。

(印九六九)(光七六一)(大七四九)

經文(五八二)

(01) 如是我聞：一時，佛住舍衛國祇樹給孤獨園。

(2a) 爾時，世尊告諸比丘：「若比丘〔諸惡不善法生〕，一切皆以無明為根本，無明集、無明生、無明起。所以者何？

(2b) 無明者無知，於善、不善法不如實知，有罪、無罪，下法、上法，染污、不染污，分別、不分別，緣起、非緣起不如實知。不如實知故，起於邪見。

(2c) 起於邪見已，能起邪志、邪語、邪業、邪命、邪方便、邪念、邪定。

(3a) 若諸善法生，〔一切皆以〕明為根本，明集、明生、明起。〔所以者何？〕

- (3b) 明於善、不善法如實知，〔有〕罪、無罪，親近、不親近，卑法、勝法，穢污、白淨，有分別、無分別，緣起、非緣起，悉如實知。如實知者，是則正見。
- (3c) 正見者，能起正志、正語、正業、正命、正方便、正念、正定。
- (04) 正定起已，聖弟子得正解脫貪、恚、癡；貪、恚、癡解脫已，是聖弟子得正智見：我生已盡、梵行已立、所作已作、自知不受後有。」
- (05) 佛說此經已，諸比丘聞佛所說，歡喜奉行。

(印九七〇)(光七六二)(大七五〇)

經文(五八三)【S24】

- (01) 如是我聞：一時，佛住舍衛國祇樹給孤獨園。
- (2a) 爾時，世尊告諸比丘：「若在家、若出家而起邪事者，〔我所不說〕。所以者何？
- (2b) 若在家、出家而起邪事者，則不樂正法。
- (2c) 何等為邪事？謂邪見乃至邪定。
- (3a) 若在家、出家而起正事，我所讚歎。所以者何？
- (3b) 起正事者，則樂正法，善於正法。
- (3c) 何等為正事？謂正見乃至正定。」
- (04) 爾時，世尊即說偈言：
- 在家及出家，而起邪事者，彼則終不樂，無上之正法。
在家及出家，而起正事者，彼則常心樂，無上之正法。
- (05) 佛說此經已，諸比丘聞佛所說，歡喜奉行。

(印九七一)(光七六三)(大七五一)

經文(五八四)

- (01) 如是我聞：一時，佛住舍衛國祇樹給孤獨園。
- (2a) 爾時，世尊告諸比丘：「應離邪見，應斷邪見。若邪見不可斷者，我終不說應離斷邪見；以邪見可斷故，我說比丘當離邪見。若不離邪見者，邪見當作非義，不饒益苦。是故我說當離邪見。
- (2b) 如是邪志、邪語、邪業、邪命、邪方便、邪念、邪定，亦如是說。
- (3a) 諸比丘！離邪見已，當修正見。若不得修正見者，我終不說修習正見；以得修正見故，我說比丘應修正見。若不修正見者，

當作非義，不饒益苦，以不修正見作非義不饒益苦故。是故我說當修正見，以義饒益，常得安樂。是故，比丘！當修正見。

(3b) 如是正志、正語、正業、正命、正方便、正念、正定，亦如是說。」

(04) 佛說此經已，諸比丘聞佛所說，歡喜奉行。

(印九九二)(光七八二)(大七七〇)

經文(五八五)【S34】

(01) 如是我聞：一時，佛住舍衛國祇樹給孤獨園。

(02) 時有生聞婆羅門來詣佛所，與世尊面相問訊慰勞，問訊慰勞已，退坐一面，白佛言：「瞿曇！謂非彼岸及彼岸，瞿曇！云何非彼岸？云何彼岸？」

(3) 佛告婆羅門：「邪見者非彼岸，正見者是彼岸。」

(4a) 邪志、邪語、邪業、邪命、邪方便、邪念、邪定非彼岸。

(4b) 〔正志〕、正語、正業、正命、正方便、正念、正定是彼岸。」

(05) 爾時，世尊即說偈言：

希有諸人民，能度於彼岸；一切諸世間，徘徊遊此岸。

於此正法律，能善隨順者，斯等能度彼，生死難度岸。

(06) 時生聞婆羅門聞佛所說，歡喜隨喜，從座起去。

(印九九三)(光七八三)(大七七一)

(07) 如是異比丘問、尊者阿難問、佛問諸比丘，此三經亦如上說。

(印九九四～九九六)(光七八四～七八六)(大七七二～七七四)

經文(五八六)

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「有非法、是法。諦聽！善思！當為汝說。」

(03) 何等為非法、是法？謂邪見非法，正見是法；乃至邪定非法，正定是法。」

(04) 佛說此經已，諸比丘聞佛所說，歡喜奉行。

(印一〇一九)

(05) 如非法、是法，如是非律、正律，非聖、是聖，不善法、善法，非習法、習法，非善哉法、善哉法，黑法、白法，非義、正義，

卑法、勝法，有罪法、無罪法，應去法、不去法，一一經皆如上說。

(印一〇二〇～一〇二九)(光七九四)(大七八二)

經文(五八七)

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「若比丘心向邪者，違背於法，不樂於法；若向正者，心樂於法，不違於法。
- (3a) 何等為邪？謂邪見乃至邪定。
- (3b) 何等為正？謂正見乃至正定。」
- (04) 佛說此經已，諸比丘聞佛所說，歡喜奉行。

(印一〇四三)(光七九八)(大七八六)

經文(五八八)

- (01) 如是我聞：一時，佛住舍衛國祇樹祇孤獨園。
- (02) 爾時，世尊告諸比丘：「向邪者，違於法，不樂於法；向正者，樂於法，不違於法。
- (3a) 何等為向邪者，違於法，不樂於法？
- (3b) 謂邪見人，身業如所見，口業如所見，若思、若欲、若願、若為，彼皆隨順，一切得不愛果，不念、不可意果。所以者何？
- (3c) 以見惡故，謂邪見；邪見者，起邪志、邪語、邪業、邪命、邪方便、邪念、邪定，是〔名〕向邪者，違於法，不樂於法。
- (4a) 何等為向正者，樂於法，不違於法？
- (4b) 謂正見人，若身業隨所見，若口業，若思、若欲、若願、若為，悉皆隨順，得可愛、可念、可意果。所以者何？
- (4c) 以見正故，謂正見；正見者，能起正志、正語、正業、正命、正方便、正念、正定，是名向正者，樂於法，不違於法。」
- (05) 佛說此經已，諸比丘聞佛所說，歡喜奉行。

(印一〇四四)(光七九九)(大七八七)

經文(五八九)

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「向邪者，違於法，不樂於法；向正者，樂於法，不違於法。

- (3a) 何等為向邪者，違於法，不樂於法？
- (3b) 若邪見人，身業如所見，口業如所見，若思、若欲、若願、若為，彼皆隨順，一切得不愛果，不念、不可意果。所以者何？惡見謂邪見，邪見者起邪志、邪語、邪業、邪命、邪方便、邪念、邪定。
- (3c) 譬如苦果種著地中，隨時溉灌，彼得地味、水味、火味、風味，一切悉苦。所以者何？以種苦故。
- (3d) 如是邪見人，身業如所見，口業如所見，若思、若欲、若願、若為，悉皆隨順，彼一切得不愛、不念、不可意果。所以者何？惡見者謂邪見，邪見者能起邪志乃至邪定，是名向邪者，違於法，不樂於法。
- (4a) 何等為向正者，樂於法，不違於法？
- (4b) 若正見人，身業如所見，口業如所見，若思、若欲、〔若願〕、若為，悉皆隨順，彼一切得可愛、可念、可意果。所以者何？善見謂正見，正見者能起正志乃至正定。
- (4c) 譬如甘蔗、稻、麥、蒲桃種著地中，隨時溉灌，彼得地味、水味、火味、風味，彼一切味悉甜美。所以者何？以種子甜故。
- (4d) 如是正見人，身業如所見，口業如所見，若思、若欲、若願、若為，悉皆隨順，彼一切得可愛、可念、可意果。所以者何？善見者謂正見，正見者能起正志乃至正定，是名向正者，樂於法，不違於法。」
- (05) 佛說此經已，諸比丘聞佛所說，歡喜奉行。

(印一〇四五)

- (06) 世間、出世間，亦如是說，如上三經，亦皆說偈言：
- 鄙法不應近，放逸不應行，不應習邪見，增長於世間。
- 假使有世間，正見增上者，雖復百千生，終不墮惡趣。

- (07) 佛說此經已，諸比丘聞佛所說，歡喜奉行。

(印一〇四六～一〇四八)(光八〇〇)(大七八八)

經文(五九〇)【S23】

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「有邪及邪道，有正及正道。諦聽！善思！當為汝說。
- (3a) 何等為邪？謂地獄、畜生、餓鬼。

(3b) 何等為邪道？謂邪見乃至邪定。

(4a) 何等為正？謂人、天、涅槃。

(4b) 何等為正道？謂正見乃至正定。」

(05) 佛說此經已，諸比丘聞佛所說，歡喜奉行。

(印一〇五七)(光八〇二)(大七九〇)

經文(五九一)

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「有邪、有邪道，有正、有正道。諦聽！善思！當為汝說。

(3a) 何等為邪？謂地獄、畜生、餓鬼。

(3b) 何等為邪道？謂殺、盜、邪淫、妄語、兩舌、惡口、綺語、貪、恚、邪見。

(4a) 何等為正？謂人、天、涅槃。

(4b) 何等為正道？謂不殺、不盜、不邪淫、不妄語、不兩舌、不惡口、不綺語、無貪、無恚、正見。」

(05) 佛說此經已，諸比丘聞佛所說，歡喜奉行。

(印一〇五八)(光八〇三)(大七九一)

經文(五九二)

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：如上說。

(03) 差別者：「何等為惡趣道？謂殺父、殺母、殺阿羅漢、破僧、惡心出佛身血」，餘如上說。

(04) 佛說此經已，諸比丘聞佛所說，歡喜奉行。

(印一〇五九)(光八〇四)(大七九二)

經文(五九三)

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「有順流道、有逆流道。諦聽！善思！當為汝說。

(03) 何等為順流道？謂邪見乃至邪定。

(04) 何等為逆流道？謂正見乃至正定。」

(05) 佛說此經已，諸比丘聞佛所說，歡喜奉行。

(印一〇六〇)

(06) 如順流、逆流，如是退道、勝道，下道、上道，及三經道跡，亦如上說。

(印一〇六一～一〇六三)(光八〇五)(大七九三)

經文(五九四)【S5, 7】

(01) 如是我聞：一時，佛住拘睢彌國瞿師羅園。

(02) 爾時，尊者阿難亦在彼住。有異婆羅門，來詣尊者阿難所，與尊者阿難共相問訊慰勞，問訊慰勞已，退坐一面，白尊者阿難：「欲有所問，寧有閑暇為記說不？」

(03) 阿難答言：「隨汝所問，知者當答。」

(04) 婆羅門問：「尊者阿難！何故於沙門瞿曇所出家修梵行？」

(05) 阿難答言：「婆羅門！為斷故。」

(06) 復問：「斷何等？」

(07) 答言：「貪欲斷，瞋恚、愚癡斷。」

(08) 又問阿難：「有道、有跡，能斷貪欲、瞋恚、愚癡耶？」

(09) 阿難答言：「有，謂八聖道：正見、正志、正語、正業、正命、正方便、正念、正定。」

(10) 婆羅門言：「阿難！賢哉之道，賢哉之跡！修、習、多修習，能斷斯等貪欲、恚、癡。」

(11) 尊者阿難說是法時，彼婆羅門聞其所說，歡喜隨喜，從座起去。

(印一〇三〇)

(12) 如斷貪、恚、癡，如是調伏貪、恚、癡，及得〔涅槃〕，及厭離，及不趣涅槃，及沙門義，及婆羅門義，及解脫，及苦斷，及究竟苦邊，及正盡苦，一一經皆如上說。

(印一〇三一～一〇四〇)(光七九五)(大七八三)

經文(五九五)

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「有沙門及沙門法。諦聽！善思！當為汝說。」

(03) 何等為沙門法？謂八聖道：正見乃至正定。

(04) 何等為沙門？若成就此法者，是名沙門。」

(05) 佛說此經已，諸比丘聞佛所說，歡喜奉行。

(印一〇六四)(光八〇六)(大七九四)

經文(五九六)【S36】

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「有沙門法，沙門義。

(03) 何等為沙門法？謂八聖道：正見乃至正定。

(04) 何等為沙門義？謂貪欲永盡，瞋恚、愚癡永盡，一切煩惱永盡，
是名沙門義。」

(05) 佛說此經已，諸比丘聞佛所說，歡喜奉行。

(印一〇六五)(光八〇七)(大七九五)

經文(五九七)【S35】

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「有沙門法及沙門果。諦聽！善思！當
為汝說。

(03) 何等為沙門法？謂八聖道：正見乃至正定。

(04) 何等為沙門果？謂須陀洹果、斯陀含果、阿那含果、阿羅漢果。」

(05) 佛說此經已，諸比丘聞佛所說，歡喜奉行。

(印一〇六六)(光八〇八)(大七九六)

經文(五九八)

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「有沙門法及沙門果。諦聽！善思！當
為汝說。

(03) 何等為沙門法？謂八聖道：正見乃至正定。

(04) 何等為沙門果？謂須陀洹果、斯陀含果、阿那含果、阿羅漢果。

(05) 何等為須陀洹果？謂三結斷。

(06) 何等為斯陀含果？謂三結斷，貪、恚、癡薄。

(07) 何等為阿那含果？謂五下分結盡。

(08) 何等為阿羅漢果？謂貪、恚、癡永盡，一切煩惱永盡。」

(09) 佛說此經已，諸比丘聞佛所說，歡喜奉行。

(印一〇六七)(光八〇九)(大七九七)

經文（五九九）

- （01）如是我聞：一時，佛住舍衛國祇樹給孤獨園。
- （02）爾時，世尊告諸比丘：「有沙門法、沙門、沙門義。諦聽！善思！當為汝說。
- （03）何等為沙門法？謂八聖道：正見乃至正定。
- （04）何等為沙門？謂成就此法者。
- （05）何等為沙門義？謂貪欲永斷，瞋恚、癡永斷，一切煩惱永斷。」
- （06）佛說此經已，諸比丘聞佛所說，歡喜奉行。

（印一〇六八）（光八一〇）（大七九八）

經文（六〇〇）【S37-40】

- （01）如是我聞：一時，佛住舍衛國祇樹給孤獨園。
- （02）爾時，世尊告諸比丘：如上說。
- （03）差別者：「有沙門果。何等為沙門果？謂須陀洹果、斯陀含果、阿那含果、阿羅漢果。」
- （04）佛說此經已，諸比丘聞佛所說，歡喜奉行。

（印一〇六九）（光八一—）（大七九九）

- （05）〔如沙門法、沙門、沙門義、沙門果，如是婆羅門法、婆羅門、婆羅門義、婆羅門果，梵行法、梵行者、梵行義、梵行果〕，亦如上說。

（印一〇七〇～一〇八一）（光八一二）（大八〇〇）

安那般那念相應/入出息念相應

經文（六〇一）

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「有五法多所饒益，修安那般那念。何等為五？
- (3a) 住於淨戒，波羅提木叉律儀，威儀、行處具足，於微細罪能生怖畏，受持學戒，是名第一多所饒益，修習安那般那念。
- (3b) 復次，比丘！少欲、少事、少務，是名二法多所饒益，修習安那般那念。
- (3c) 復次，比丘！飲食知量，多少得中，不為飲食起求欲想，精勤思惟，是名三法多所饒益，修安那般那念。
- (3d) 復次，比丘！初夜後夜，不著睡眠，精勤思惟，是名四法多所饒益，修安那般那念。
- (3e) 復次，比丘！空閑林中，離諸憒鬧，是名五法〔多所〕饒益，修習安那般那念。」
- (04) 佛說此經已，諸比丘聞佛所說，歡喜奉行。

（印一〇八二）（光八一三）（大八〇一）

經文（六〇二）

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「當修安那般那念。若比丘修習安那般那念，多修習者，得身止息及心止息，有覺有觀寂滅，純一明分想修習滿足。」
- (03) 佛說此經已，諸比丘聞佛所說，歡喜奉行。

（印一〇八三）（光八一四）（大八〇二）

經文（六〇三）【S1】

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「修習安那般那念，若比丘修習安那般那念，多修習者，得身心止息，有覺有觀寂滅，純一明分想修習滿足。
- (03) 何等為修習安那般那念，多修習已，身心止息，有覺有觀寂滅，純一明分想修習滿足？

- (04) 是比丘，若依聚落、城邑止住，晨朝著衣持鉢，入村乞食，善護其身，守諸根門，善繫心住。乞食已，還住處，舉衣鉢，洗足已。或入林中、閑房、樹下，或空露地，端身正坐，繫念面前。
- (05) 斷世貪愛，離欲清淨，瞋恚、睡眠、掉悔、疑斷，度諸疑惑，於諸善法心得決定。遠離五蓋：煩惱於心，令慧力羸、為障礙分、不趣涅槃。念於內息，繫念善學；念於外息，繫念善學。
- (6a) 息長；
- (6b) 息短；
- (6c) 覺知一切身入息，於一切身入息善學；覺知一切身出息，於一切身出息善學；
- (6d) 覺知一切身行息入息，於一切身行息入息善學；覺知一切身行息出息，於一切身行息出息善學。
- (7a) 覺知喜；
- (7b) 覺知樂；
- (7c) 覺知心行；
- (7d) 覺知心行息入息，於覺知心行息入息善學，覺知心行息出息，於覺知心行息出息善學。
- (8a) 覺知心；
- (8b) 覺知心悅；
- (8c) 覺知心定；
- (8d) 覺知心解脫入息，於覺知心解脫入息善學，覺知心解脫出息，於覺知心解脫出息善學。
- (9a) 觀察無常；
- (9b) 觀察斷；
- (9c) 觀察無欲；
- (9d) 觀察滅入息，於觀察滅入息善學，觀察滅出息，於觀察滅出息善學。
- (10) 是名修安那般那念，身止息、心止息，有覺有觀寂滅，純一明分想修習滿足。」
- (11) 佛說此經已，諸比丘聞佛所說，歡喜奉行。

(印一〇八四)(光八一五)(大八〇三)

經文（六〇四）【S3-5】

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「當修安那般那念。安那般那念修、習、多修習者，斷諸覺想。」
- (03) 云何安那般那念修、習、多修習，斷諸覺想？
- (04) 若比丘依止聚落、城邑住，如上廣說，乃至於出息滅善學，是名安那般那念修、習、多修習，斷諸覺想。」
- (05) 佛說此經已，諸比丘聞佛所說，歡喜奉行。

(印一〇八五)

- (06) 如斷覺想，如是不動搖，得大果、大福利，〔得甘露〕、究竟甘露，得二果、四果、〔七果〕，一一經亦如上說。

(印一〇八六～一〇九二)(光八一六)(大八〇四)

經文（六〇五）【S6】

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「如我所說安那般那念，汝等修習不？」
- (03) 時有比丘，名阿梨瑟吒，於眾中坐，即從座起，整衣服，為佛作禮，右膝著地，合掌白佛言：「世尊！世尊所說安那般那念，我已修習。」
- (04) 佛告阿梨瑟吒：「比丘！汝云何修習我所說安那般那念？」
- (05) 比丘白佛：「世尊！我於過去諸行不顧念，未來諸行不生欣樂，於現在諸行不生染著。於內外對礙想，善正除滅。我已如是修世尊所說安那般那念。」
- (06) 佛告阿梨瑟吒：「比丘！汝實修我所說安那般那念，非不修。然其比丘！於汝所修安那般那念所，更有勝妙過其上者。」
- (07) 何等是勝妙過阿梨瑟吒所修安那般那念者？
- (08) 是比丘依止城邑、聚落，如前廣說，乃至於滅出息觀察善學，是名阿梨瑟吒比丘！勝妙過汝所修安那般那念者。」
- (09) 佛說此經已，諸比丘聞佛所說，歡喜奉行。

(印一〇九三)(光八一七)(大八〇五)

經文（六〇六）【S7】

- (01) 如是我聞：一時，佛住舍衛國祇樹給孤獨園。

- (02) 爾時，世尊於晨朝時，著衣持鉢，入舍衛城乞食。食已，還精舍，舉衣鉢，洗足已，持尼師檀，入安陀林，坐一樹下，晝日禪思。
- (03) 時尊者闍賓那，亦晨朝時，著衣持鉢，入舍衛城乞食。還舉衣鉢，洗足已，持尼師檀，入安陀林，於樹下坐禪。去佛不遠，正身不動，身心正直，勝妙思惟。
- (04) 爾時，眾多比丘，晡時從禪覺，往詣佛所，稽首禮佛足，退坐一面。
- (05) 佛語諸比丘：「汝等見尊者闍賓那不？去我不遠，正身端坐，身心不動，住勝妙住。」
- (06) 諸比丘白佛：「世尊！我等數見彼尊者正身端坐，善攝其身，不傾不動，專心勝妙。」
- (07) 佛告諸比丘：「若比丘修習三昧，身心安住，不傾不動，住勝妙住者，此比丘得此三昧，不勤方便，隨欲即得。」
- (08) 諸比丘白佛：「何等三昧？比丘得此三昧，身心不動，住勝妙住。」
- (09) 佛告諸比丘：「若比丘依止聚落，晨朝著衣持鉢，入村乞食已，還精舍，舉衣鉢，洗足已，入林中，若閑房、露坐，思惟繫念，乃至息滅觀察善學，是名三昧。若比丘端坐思惟，身心不動，住勝妙住。」
- (10) 佛說此經已，諸比丘聞佛所說，歡喜奉行。

(印一〇九四)(光八一八)(大八〇六)

經文(六〇七)【S11】

- (01) 如是我聞：一時，佛住一奢能伽羅林中。
- (02) 爾時，世尊告諸比丘：「我欲二月坐禪，諸比丘勿復往來，唯除送食比丘及布薩時。」
- (03) 爾時，世尊作是語已，即二月坐禪，無一比丘敢往來者，唯除送食及布薩時。
- (04) 爾時，世尊坐禪，二月過已，從禪覺，於比丘僧前坐，告諸比丘：「若諸外道出家來問汝等：沙門瞿曇於二月中，云何坐禪？汝應答言；如來二月，以安那般那念坐禪思惟住。所以者何？」
- (05) 我於此二月，念安那般那多住思惟：入息時念入息如實知；出息時念出息如實知。若長；若短；一切身覺入息念如實知，一

切身覺出息念如實知；身行休息入息念如實知，乃至滅出息念如實知。我悉知己，我時作是念，此則粗思惟住。我今於此思惟止息已，當更修餘微細修住而住。爾時，我息止粗思惟已，即更入微細思惟，多住而住。

- (06) 時有三天子，極上妙色，過夜來至我所。一天子作是言：沙門瞿曇時到。復有一天子言：此非時到，是時向至。第三天子言：非為時到，亦非時向至，此則修住，是阿羅訶寂滅耳。」
- (07) 佛告諸比丘：「若有正說聖住、天住、梵住、學住、無學住、如來住，學人所不得當得，不到當到，不證當證，無學人現法樂住者，謂安那般那念，此則正說。所以者何？」
- (08) 安那般那念者，是聖住、天住、梵住，乃至無學現法樂住。」
- (09) 佛說此經已，諸比丘聞佛所說，歡喜奉行。

(印一〇九五)(光八一九)(大八〇七)

經文(六〇八)【S9】

- (01) 如是我聞：一時，佛住金剛聚落，跋耆摩河側薩羅梨林中。
- (02) 爾時，世尊為諸比丘說不淨觀，讚歎不淨觀言：「諸比丘！修不淨觀、多修習者，得大果、大福利。」
- (03) 時諸比丘修不淨觀已，極厭患身，或以刀自殺，或服毒藥，或繩自絞，投巖自殺，或令餘比丘殺。
- (04) 有異比丘，極生厭患惡露不淨，至鹿林梵志子所，語鹿林梵志子言：「賢首！汝能殺我者，衣、鉢屬汝。」
- (05) 時鹿林梵志子，即殺彼比丘，持刀至跋耆摩河邊洗刀。
- (06) 時有魔天，住於空中，讚鹿林梵志子言：「善哉！善哉！賢首！汝得無量功德，能令諸沙門釋子持戒有德〔者〕，未度者度，未脫者脫，未穌息者令得穌息，未涅槃者令得涅槃；諸長利衣鉢雜物，悉皆屬汝。」
- (07) 時鹿林梵志子，聞讚歎已，增惡邪見，作是念：我今真實大作福德，令沙門釋子持戒功德者，未度者度，未脫者脫，未穌息者令得穌息，未涅槃者令得涅槃；衣鉢雜物，悉皆屬我。於是手執利刀，循諸房舍，諸經行處，別房、禪房，見諸比丘，作如是言：「何等沙門持戒有德，未度者我能令度，未脫者令脫，未穌息者令得穌息，未涅槃令得涅槃。」

- (08) 時有諸比丘厭患身者，皆出房舍，語鹿林梵志子言：「我未得度，汝當度我！我未得脫，汝當脫我！我未得穌息，汝當令我得穌息！我未得涅槃，汝當令我得涅槃！」
- (09) 時鹿林梵志子，即以利刀殺彼比丘，次第乃至殺六十人。
- (10) 爾時，世尊至十五日說戒時，於眾僧前坐，告尊者阿難：「何因、何緣，諸比丘轉少、轉減、轉盡？」
- (11) 阿難白佛言：「世尊為諸比丘說修不淨觀，讚歎不淨觀，諸比丘修不淨觀已，極厭患身，廣說乃至殺六十比丘。世尊！以是因緣故，令諸比丘轉少、轉減、轉盡。唯願世尊，更說餘法，令諸比丘聞已，勤修智慧，樂受正法，樂住正法！」
- (12) 佛告阿難：「是故，我今次第說住微細住，隨順開覺。已起、未起惡不善法，速令休息，如天大雨，起、未起塵，能令休息。如是比丘修微細住，諸起、未起惡不善法，能令休息。」
- (13a) 阿難！何等為微細住，多修習隨順開覺，已起、未起惡不善法，能令休息？
- (13b) 謂安那般那念住。」
- (14) 阿難白佛：「云何修習安那般那念住，隨順開覺，已起、未起惡不善法，能令休息？」
- (15) 佛告阿難：「若比丘依止聚落，如前廣說，乃至如滅出息念而學。」
- (16) 佛說此經已，尊者阿難聞佛所說，歡喜奉行。

(印一〇九七)(光八二一)(大八〇九)

經文(六〇九)【S8】

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「當修安那般那念。修安那般那念，多修習已，身不疲倦，眼亦不患，樂隨順觀住，樂覺知，不染著樂。」
- (03) 云何修安那般那念，身不疲倦，眼亦不患，樂隨觀住，樂覺知，不染著樂？
- (4a) 是比丘依止聚落，乃至觀滅出息時，如滅出息學，是名修安那般那念。身不疲倦，眼亦不患，樂隨觀住，樂覺知，不染著樂。
- (4b) 如是修安那般那念者，得大果、大福利。

- (5a) 是比丘欲求離欲惡不善法，有覺有觀，離生喜樂，初禪具足住，是比丘當修安那般那念。
- (5b) 如是修安那般那念，得大果、大福利。
- (6a) 是比丘欲求第二、第三、第四禪，慈、悲、喜、捨，空入處、識入處、無所有入處、非想非非想入處具足；三結盡，得須陀洹果；三結盡，貪、恚、癡薄，得斯陀含果；五下分結盡，得阿那含果；得無量種神通力，〔天耳智〕、他心智、宿命智、生死智、漏盡智者，如是比丘當修安那般那念。
- (6b) 如是〔修〕安那般那念，得大果、大福利。」
- (07) 佛說此經已，諸比丘聞佛所說，歡喜奉行。

(印一一〇二)(光八二六)(大八一四)

經文(六一〇)【中部，入出息念經】

- (01) 如是我聞：一時，佛住舍衛國祇樹給孤獨園夏安居。
- (02) 爾時，眾多上座聲聞，於世尊左右，樹下、窟中安居。
- (03) 時有眾多年少比丘，詣佛所，稽首佛足，退坐一面。
- (04) 佛為諸年少比丘種種說法，示、教、照、喜，示、教、照、喜已，默然住。
- (05) 諸年少比丘聞佛所說，歡喜隨喜，從座起，作禮而去。
- (06) 諸年少比丘往詣上座比丘所，禮諸上座足已，於一面坐。
- (07) 時諸上座比丘作是念：我等當攝受此諸年少比丘，或一人受一人，或一人受二、三、多人。作是念已，即便攝受，或一人受一人，或受二、三、多人，或有上座乃至受六十人。
- (08) 爾時，世尊十五日布薩時，於大眾前敷座而坐。
- (09) 爾時，世尊觀察諸比丘已，告比丘：「善哉！善哉！我今喜諸比丘行諸正事。是故，比丘！當勤精進，於此舍衛國，滿迦低月。」
- (10) 諸處人間比丘，聞世尊於舍衛國安居，滿迦低月；滿已，作衣竟，持衣鉢，於舍衛國人間遊行。漸至舍衛國，舉衣鉢，洗足已，詣世尊所，稽首禮足已，退坐一面。
- (11) 爾時，世尊為人間比丘種種說法，示、教、照、喜已，默然住。
- (12) 爾時人間比丘聞佛說法，歡喜隨喜，從座起，作禮而去。往詣上座比丘所，稽首禮足，退坐一面。

- (13) 時諸上座作是念：我等當受此人間比丘，或一人受一人，或二、三，乃至多人。即便受之，或一人受一人，或二、三，乃至有受六十人者。
- (14) 彼上座比丘受諸人間比丘，教誡教授，善知先後次第。
- (15) 爾時，世尊月十五日布薩時，於大眾前敷座而坐。觀察諸比丘眾，告諸比丘：「善哉！善哉！諸比丘！我欣汝等所行正事，樂汝等所行正事。」
- (16) 諸比丘！過去諸佛，亦有比丘眾所行正事，如今此眾；未來諸佛所有諸眾，亦當如是所行正事，如今此眾。所以者何？
- (17a) 今此眾中諸長老比丘，有得初禪、第二禪、第三禪、第四禪，慈、悲、喜、捨，空入處、識入處、無所有入處、〔非想非非想入〕處具足住。
- (17b) 有比丘三結盡，得須陀洹，不墮惡趣法，決定正向三菩提，七有天人往生，究竟苦邊。
- (17c) 有比丘三結盡，貪、恚、癡薄，得斯陀含。
- (17d) 有比丘五下分結盡，得阿那含，生般涅槃，不復還生此世。
- (17e) 有比丘得無量神通境界，〔天耳智〕、他心智、宿命智、生死智、漏盡智。
- (17f) 有比丘修不淨觀斷貪欲，修慈心斷瞋恚，修無常想斷我慢，修安那般那念斷覺想。
- (18) 云何比丘修安那般那念斷覺想？是比丘依止聚落，乃至觀滅出息，如觀滅出息學，是名修安那般那念斷覺想。」
- (19) 佛說此經已，諸比丘聞佛所說，歡喜奉行。
- (印一一〇三)(光八二七)(大八一五)

經文(六一一)【S12】

- (01) 如是我聞：一時，佛住迦毘羅越尼拘律樹園中。
- (02) 爾時，釋氏摩訶男，詣尊者迦磨比丘所，禮迦磨比丘足已，退坐一面，語迦磨比丘言：「云何尊者迦磨！學住者為即是如來住耶？為學住異、如來住異？」
- (03) 迦磨比丘答言：「摩訶男！學住異，如來住異。摩訶男！學住者，斷五蓋多住；如來住者，於五蓋已斷、已知，斷其根本，如截多羅樹頭，更不生長，於未來世成不生法。」

- (04) 一時，世尊住一奢能伽羅林中。爾時，世尊告諸比丘：我欲於此一奢能伽羅林中，二月坐禪，汝諸比丘勿使往來，唯除送食比丘及布薩時。廣說如前，乃至無學現法樂住。
- (05) 以是故知，摩訶男！學住異，如來住異。」
- (06) 釋氏摩訶男聞迦磨比丘所說，歡喜從座起去。

(印一〇九六)(光八二〇)(大八〇八)

經文(六一二)【S10】

- (01) 如是我聞：一時，佛住金毘羅聚落金毘林中。
- (02) 爾時，世尊告尊者金毘羅：「我今當說精勤修習四念處。諦聽！善思！當為汝說。」
- (03) 爾時，尊者金毘羅默然住。如是再三。
- (04) 爾時，尊者阿難語尊者金毘羅：「今大師告汝！」如是三說。
- (05) 尊者金毘羅語尊者阿難：「我已知，尊者阿難！我已知，尊者瞿曇！」
- (06) 爾時，尊者阿難白佛言：「是時，世尊！是時，善逝！唯願為諸比丘，說精勤修四念處，諸比丘聞已，當受奉行。」
- (7a) 佛告阿難：「諦聽！善思！當為汝說。若比丘入息念時，如入息學；乃至滅出息時，如滅出息學。爾時聖弟子念入息時，如念入息學，乃至身行止息出息時，如身行止息出息學，爾時聖弟子身身觀念住。爾時聖弟子身身觀念住已，如是知善內思惟。」
- (7b) 佛告阿難：「譬如有人乘車輿從東方顛沛而來。當於爾時，踐蹈諸土堆壟不？」
- (7c) 阿難白佛：「如是，世尊！」
- (7d) 佛告阿難：「如是聖弟子念入息時，如入息念學，如是乃至善內思惟。」
- (8a) 若爾時聖弟子覺知喜，乃至覺知意行息學，聖弟子受受觀念住；聖弟子受受觀念〔住〕已，如是知善內思惟。
- (8b) 譬如有人乘車輿從南方顛沛而來，云何阿難！當踐蹈土堆壟不？」
- (8c) 阿難白佛：「如是，世尊！」
- (8d) 佛告阿難：「如是聖弟子受受觀念住，知善內思惟。」

- (9a) 若聖弟子覺知心；欣悅心；定心；解脫心入息，如解脫心入息學，解脫心出息，如解脫心出息學，爾時聖弟子心心觀念住；如是聖弟子心心觀念住已，知善內思惟。
- (9b) 譬如有人乘車輿從西方來，彼當踐蹈土堆壘不？」
- (9c) 阿難白佛：「如是，世尊！」
- (9d) 佛告阿難：「如是聖弟子覺知心，乃至心解脫出息如心解脫出息學，如是聖弟子爾時心心觀念住，知善內思惟。
- (10a) 〔若聖弟子觀無常、斷、無欲、滅觀住學。〕爾時聖弟子法法觀念住；如是聖弟子法法觀念住已，知善內思惟。
- (10b) 阿難！譬如四衢道有土堆壘，有人乘車輿從北方顛沛而來，當踐蹈土堆壘不？」
- (10c) 阿難白佛：「如是，世尊！」
- (10d) 佛告阿難：「如是聖弟子法法觀念住，知善內思惟。
- (11) 阿難！是名比丘精勤方便，修四念處。」
- (12) 佛說此經已，尊者阿難聞佛所說，歡喜奉行。

(印一一〇一)(光八二五)(大八一三)

經文(六一三)【S13-16】

- (01) 如是我聞：一時，佛住金剛跋求摩河側薩羅梨林中。
- (02) 爾時，尊者阿難獨一靜處，思惟禪思，作如是念：頗有一法修、習、多修習，令四法滿足；四法滿足已，七法滿足；七法滿足已，二法滿足。
- (03) 時尊者阿難從禪覺已，往詣佛所，稽首禮足，退坐一面，白佛言：「世尊！我獨一靜處，思惟禪思，作是念：頗有一法多修習已，令四法滿足，乃至二法滿足；我今問世尊：寧有一法多修習已，能令乃至二法滿足耶？」
- (04) 佛告阿難：「有一法，多修習已，乃至能令二法滿足。何等為一法？謂安那般那念，多修習已，能令四念處滿足。四念處滿足已，七覺分滿足。七覺分滿足已，明、解脫滿足。
- (05) 云何修安那般那念，四念處滿足？是比丘依止聚落，乃至如減出息念學。阿難！如是聖弟子，入息念時如入息念學，出息念時如出息念學。
- (6a) 若長；
- (6b) 若短；

- (6c) 一切身行覺知入息念時，如入息念學，出息念時，如出息念學；
- (6d) 身行休息入息念時，如身行休息入息念學，身行休息出息念時，如身行休息出息念學。聖弟子爾時身身觀念住，異於身者，彼亦如是隨身比思惟。
- (7a) 若有時，聖弟子喜覺知；
- (7b) 樂覺知；
- (7c) 心行覺知；
- (7d) 心行息覺知入息念時，如心行息入息念學，心行息出息念時，如心行息出息念學。是聖弟子爾時受受觀念住，若復異受者，彼亦〔隨受〕比思惟。
- (8a) 有時聖弟子心覺知；
- (8b) 心悅；
- (8c) 心定；
- (8d) 心解脫覺知入息念時，如入息念學，心解脫出息念時，如心解脫出息念學。是聖弟子爾時心心觀念住，若有異心者，彼亦隨心比思惟。
- (9a) 若聖弟子有時觀無常；
- (9b) 斷；
- (9c) 無欲；
- (9d) 〔滅〕觀住學。是聖弟子爾時法法觀念住，異於法者，亦隨法比思惟。
- (10) 是名修安那般那念，滿足四念處。」
- (11) 阿難白佛：「如是修習安那般那念令四念處滿足，云何修四念處令七覺分滿足？」
- (12a) 佛告阿難：「若比丘身身觀念住，念住已繫念住不忘，爾時方便修念覺分；修念覺分已，念覺分滿足。念覺分滿足已，於法選擇、思量，爾時方便修擇法覺分；修擇法覺分已，擇法覺分滿足。於法選擇、分別、思量已，得精勤方便，爾時方便修習精進覺分；修精進覺分已，精進覺分滿足。方便精進已，則心歡喜，爾時方便修喜覺分；修喜覺分已，喜覺分滿足。歡喜已，身、心猗息，爾時方便修猗覺分；修猗覺分已，猗覺分滿足。身心樂已，得三昧，爾時修定覺分；修定覺分已，定覺分滿足。定覺分滿足已，貪憂則滅，得平等捨，爾時方便修捨覺分；修捨覺分已，捨覺分滿足。

- (12b) 受、心、法法念處，亦如是說。
- (13) 是名修四念處，滿足七覺分。」
- (14) 阿難白佛：「是名修四念處滿足七覺分，云何修七覺分滿足明、解脫？」
- (15) 佛告阿難：「若比丘修念覺分，依遠離、依無欲、依滅、向於捨；修念覺分已，滿足明、解脫，乃至修捨覺分，依遠離、依無欲、依滅、向於捨；如是修捨覺分已、明、解脫滿足。阿難！是名法法相類法法相潤。
- (16) 如是十三法，一法為增上，一法為門，次第增進，修習滿足。」
- (17) 佛說此經已，尊者阿難聞佛所說，歡喜奉行。
- (印一〇九八)(光八二二)(大八一〇)
- (18) 如是異比丘〔所問〕、佛問諸〔比丘〕，亦如上說。
- (印一〇九九～一一〇〇)(光八二三～八二四)(大八一～八一二)

學相應

經文（六一四）【S 增三. 89】

（01）如是我聞：一時，佛住舍衛國祇樹給孤獨園。

（02）爾時，世尊告諸比丘：「有三學。何等為三？」

（03）謂增上戒學、增上意學、增上慧學。」

（04）爾時，世尊即說偈言：

三學具足者，是比丘正行，增上戒心慧，三法勤精進。

勇猛堅固城，常守護諸根，如晝如其夜，如夜亦如晝，

如前如其後，如後亦如前，如上如其下，如下亦如上。

無量諸三昧，映一切諸方，是說為覺跡，第一清涼集。

捨離無明諍，其心善解脫，我為世間覺，明行悉具足。

正念不忘住，其心得解脫，身壞而命終，如燈盡火滅。

（05）佛說此經已，諸比丘聞佛所說，歡喜奉行。

（印一一〇四）（光八二八）（大八一六）

經文（六一五）【S 增三. 89】

（01）如是我聞：一時，佛住舍衛國祇樹給孤獨園。

（02）爾時，世尊告諸比丘：「〔有三學〕。何等為三？」

（03）謂增上戒學、增上意學、增上慧學。

（4a）何等為增上戒學？

（4b）若比丘住於戒，波羅提木叉律儀，威儀、行處具足，見微細罪則生怖畏，受持學戒。

（5a）何等為增上意學？

（5b）若比丘離欲惡不善法，乃至第四禪具足住。

（6a）何等為增上慧學？

（6b）是比丘此苦聖諦如實知，集、滅、道聖諦如實知，是名增上慧學。」

（07）爾時，世尊即說偈，如上所說。

（08）佛說此經已，諸比丘聞佛所說，歡喜奉行。

（印一一〇五）（光八二九）（大八一七）

經文（六一六）【S 增三. 82】

（01）如是我聞：一時，佛住舍衛國祇樹給孤獨園。

- (02) 爾時，世尊告諸比丘：「譬如田夫，有三種作田，隨時善作。何等為三？謂彼田夫隨時耕磨、隨時溉灌、隨時下種。彼田夫隨時耕磨、溉灌、下種已，不作是念：欲令今日生長，今日果實，今日成熟，若明日、後日也。諸比丘！然彼長者耕田、溉灌、下種已，不作是念：今日生長，果實成熟，若明日、若復後日。而彼種子已入地中，則自隨時生長，果實成熟。
- (03) 如是比丘於此三學，隨時善學，謂善戒學、善意學、善慧學已，不作是念：欲令我今日得不起諸漏，心善解脫，若明日，若後日。不作是念：自然神力，能令今日，若明日、後日，不起諸漏，心善解脫。彼已隨時增上戒學、增上意學、增上慧學已，隨彼時節，自得起諸漏，心善解脫。
- (04) 譬如比丘！伏雞生卵，若十乃至十二，隨時消息，冷暖愛護。彼伏雞不作是念：我今日，若明日、後日，當以口啄，若以〔爪〕刮，令其兒安隱得生。然其伏雞善伏其子，愛護隨時，其子自然安隱得生。
- (05) 如是比丘！善學三學，隨其時節，自得起諸漏，心善解脫。」
- (06) 佛說此經已，諸比丘聞佛所說，歡喜奉行。

(印一一一八)(光八三九)(大八二七)

經文(六一七) 【S 增三.81】

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「譬如驢隨群牛而行，而作是念：我作牛聲。然其彼形亦不似牛，色亦不似牛，聲出不似；隨大群牛，謂已是牛而作牛鳴，而去牛實遠。
- (03) 如是有一愚癡男子，違律犯戒，隨逐大眾，言：我是比丘！我是比丘！而不學習勝欲增上戒學、增上意學、增上慧學，隨逐大眾，自言我是比丘！我是比丘！其實去比丘大遠。」
- (04) 爾時，世尊即說偈言：
- 同蹄無角獸，四足具聲口，隨逐大群牛，常以為等侶，
形亦非牛類，不能作牛聲。如是愚癡人，不隨繫心念，
於善逝教誡，無欲勤方便，懈怠心輕慢，不獲無上道。
如驢在〔牛群〕，去牛常自遠，彼雖隨大眾，內行常自乖。
- (05) 佛說此經已，諸比丘聞佛所說，歡喜奉行。

(印一一一九)(光八四〇)(大八二八)

經文（六一八） 【S 增三. 83】

- (01) 如是我聞：一時，佛住跋耆聚落，尊者跋耆子侍佛左右。
- (02) 爾時，尊者跋耆子詣佛所，稽首禮足，退住一面，白佛言：「世尊！佛說過二百五十戒，令族姓子隨次半月來，說波羅提木叉修多羅，令諸族姓子〔隨學〕而學。然今世尊！我不堪能隨學而學。」
- (03) 佛告跋耆子：「汝堪能隨時學三學不？」
- (04) 跋耆子白佛言：「堪能，世尊！」
- (05) 佛告跋耆子：「汝當隨時增上戒學、增上意學、增上慧學。隨時精勤增上戒學、增上意學、增上慧學已，不久當得盡諸有漏，無漏心解脫，慧解脫，現法自知作證：我生已盡、梵行已立、所作已作、自知不受後有。」
- (06) 爾時，尊者跋耆子聞佛所說，歡喜隨喜，作禮而去。
- (07) 爾時，尊者跋耆子受佛教誡授已，獨一靜處，專精思惟，如上說，乃至心善解脫，得阿羅漢。

(印一一二〇)(光八四一)(大八二九)

經文（六一九） 【S 增三. 90】

- (01) 如是我聞：一時，佛住崩伽闍崩伽耆林中。
- (02) 爾時，世尊為諸比丘說戒相應法，讚歎制戒法。
- (03) 爾時，尊者迦葉氏，於崩伽聚落住。聞世尊說戒相應法、〔讚歎制戒時〕，心不忍、不喜，言：「此沙門極讚歎是戒，極制是戒！」
- (04) 爾時，世尊於崩伽聚落，隨所樂住已，向舍衛國去。次第遊行，至舍衛國祇樹給孤獨園。
- (05) 時尊者迦葉氏，世尊去後不久，心即生悔，我今失利，得大不利。於世尊所，說戒相應法、讚歎制戒時，於世尊所，心不忍、不喜，心不歡喜而作是言：沙門極制是戒，極讚歎是戒。
- (06) 時尊者迦葉氏，夜過晨朝，著衣持鉢，入崩伽聚落乞食。食已，還精舍，付嚼臥具，自持衣鉢，向舍衛城，次第遊行，至舍衛國。舉衣鉢，洗足已，詣世尊〔所〕，稽首禮足，白佛言：「悔過，世尊！悔過，善逝！我愚、我癡，不善、不辨。我聞世尊為諸比丘說戒相應法、讚歎制戒時，於世尊所，不忍、不喜，心不欣樂而作是言：是沙門極制是戒，讚歎是戒。」

- (07) 佛告迦葉氏：「汝何時於我所，心不忍、不喜，不生欣樂而作是言：此沙門極制是戒，讚歎是戒？」
- (08) 迦葉氏白佛言：「時世尊於崩伽闍聚落、崩伽耆林中，為諸比丘說戒相應法，讚歎是戒。我爾時於世尊所，心得不忍、不歡喜，心不欣樂而作是言：是沙門極制是戒，讚歎是戒。世尊！我今日自知罪悔、自見罪悔，唯願世尊！受我悔過，哀愍故！」
- (09) 佛告迦葉氏：「汝自知悔：愚癡、不善、不辨，聞我為諸比丘說戒相應法，讚歎制戒，而於我所不忍、不喜，心不欣樂而作是言：是沙門極制是戒，極歎是戒。汝今迦葉！自知悔、自見悔已，於未來世律儀戒生，〔我今受汝〕，哀愍故。」
- (10) 迦葉氏！如是悔者，善法增長，終不退減。所以者何？若有自知罪、自見罪而悔過者，於未來世律儀戒生，善法增長，不退減故。
- (11a) 正使迦葉！為上座〔長老〕者，不欲學戒、不重於戒、不歎制戒，如是比丘！我不讚歎。所以者何？若大師〔讚歎彼〕者，餘人則復與相習近、恭敬、親重；若餘人與相習近、親重者，則與同見，同彼所作；同彼所作者，長夜當得不饒益苦。是故我於彼長老，初不讚歎，以其初始不樂學戒故。
- (11b) 如長老，中年、少年，亦如是。
- (12a) 若是上座長老，初始重於戒學，讚歎制戒，如是長老我所讚歎，以其初始樂〔學戒〕故。大師所讚歎者，餘人亦當與相習近、親重，同其所見；同其所見故，於未來世，彼當長夜以義饒益。是故於彼長老比丘，常當讚歎，以初始樂學戒故。
- (12b) 中年、少年，亦復如是。」
- (13) 佛說此經已，諸比丘聞佛所說，歡喜奉行。

(印一一二一)(光八四二)(大八三〇)

經文(六二〇)

- (01) 如是我聞：一時，佛住舍衛國祇樹給孤獨園。
- (2a) 爾時，世尊告諸比丘：「若諸上座長老比丘，初始不樂學戒，不重於戒，見餘比丘初樂學戒、重於戒、讚歎制戒者，彼亦不隨時讚歎。我於此等比丘所，亦不讚歎，以其初始不樂學戒故。所以者何？若大師讚歎彼者，餘人當復習近、親重，同其所見；

以同其所見故，長夜當受不饒益苦。是故，我於〔彼長老，初不讚歎，以其初始不樂學戒故。〕

(2b) 中年、少年，亦復如是。

(03) 樂學戒者，如前說。」

(04) 佛說此經已，諸比丘聞佛所說，歡喜奉行。

(印一一二二)(光八四三)(大八三一)

經文(六二一)

(01) 如是我聞：一時，佛住舍衛國祇樹給孤獨園。

(2a) 爾時，世尊告諸比丘：「有比丘增上戒學，非增上意、增上慧學。

(2a) 有增上戒、增上意學，非增上慧學。

(2c) 聖弟子增上慧方便隨順成就住者，增上戒、增上意修習滿足。

(03) 如是聖弟子，增上慧方便隨順成就住者，無上慧壽而活。」

(04) 佛說此經已，諸比丘聞佛所說，歡喜奉行。

(印一一〇六)(光八三〇)(大八一八)

經文(六二二) 【S 增三. 87】

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「過二百五十戒，隨次半月來，說波羅提木叉修多羅。令彼自求學者而學，說三學能攝諸戒。何等為三？

(03) 謂增上戒學、增上意學、增上慧學。」

(04) 佛說此經已，諸比丘聞佛所說，歡喜奉行。

(印一一〇七)(光八三一)(大八一九)

經文(六二三) 【S 增三. 86】

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：如上說。

(3a) 差別者：「何等為增上戒學？

(3b) 謂比丘重於戒，戒增上；不重於定，定不增上；不重於慧，慧不增上。

- (3c) 於彼彼分細微戒，犯則隨悔。所以者何？我不說彼不堪能，若彼戒隨順梵行，饒益梵行，久住梵行，如是比丘戒堅固，戒師常住，戒常隨順生，受持而學。
- (3d) 如是知、如是見，斷三結，謂身見、戒取、疑。斷此三結，得須陀洹，不墮惡趣，決定正趣三菩提，七有天人往生，究竟苦邊，是名〔增上戒學〕。
- (4a) 何等為增上意學？
- (4b) 是比丘重於戒，戒增上；重於定，定增上；不重於慧，慧不增上。
- (4c) 於彼彼分細微戒，乃至受持學戒。
- (4d) 如是知、如是見，斷於五下分結，謂身見、戒取、疑、貪欲、瞋恚。斷此五下分結，受生般涅槃阿那含，不還此世，是名增上意學。
- (5a) 何等為增上慧學？
- (5b) 是比丘重於戒，戒增上；重於定，定增上；重於慧，慧增上。
- (5c) 彼如是知、如是見，欲有漏心解脫，有有漏心解脫，無明有漏心解脫，解脫知見：我生已盡、梵行已立、所作已作、自知不受後有，是名增上慧學。」
- (06) 佛說此經已，諸比丘聞佛所說，歡喜奉行。

(印一一〇八)(光八三二)(大八二〇)

經文(六二四) 【S 增三.85】

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「過二百五十戒，隨次半月來，說波羅提木叉修多羅。若彼善男子，自隨意所欲而學者，我為說三學，若學此三學，則攝受一切學戒。何等為三？
- (03) 謂增上戒學、增上意學、增上慧學。
- (4a) 何等為增上戒學？
- (4b) 是比丘重於戒，戒增上；不重於定，定不增上；不重於慧，慧不增上。
- (4c) 於彼彼分細微戒，乃至受持學戒。
- (4d) 如是知、如是見，斷三結，謂身見、戒取、疑。貪、恚、癡薄，成一種子道；彼地未等覺者，名斯陀含；彼地未等覺者，名家

家；彼地未等覺者，名七有；彼地未等覺者，名隨法行；彼地未等覺者，名隨信行，是名增上戒學。

(5a) 何等為增上意學？

(5b) 〔是〕比丘重於戒，戒增上；重於定，定增上；不重於慧，慧不增上。

(5c) 於彼彼分細微戒學，乃至受持學戒。

(5d) 如是知，如是見，斷五下分結，謂身見、戒取、疑、貪欲、瞋恚。斷此〔五下分結〕，能得中般涅槃；彼地未等覺者，得生般涅槃；彼地未等覺者，得無行般涅槃；彼地未等覺者，得有行般涅槃；彼地未等覺者，得上流般涅槃，是名增上意學。

(6a) 何等為增上慧學？

(6b) 是比丘重於戒，戒增上；重於定，定增上；重於慧，慧增上。

(6c) 如是知、如是見，欲有漏心解脫，有有漏心解脫，無明有漏心解脫，解脫知見：我生已盡、梵行已立、所作已作、自知不受後有，是名增上慧學。」

(07) 佛說此經已，諸比丘聞佛所說，歡喜奉行。

(印一一〇九)(光八三三)(大八二一)

經文(六二五)

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「若比丘具足戒住者，善攝持波羅提木叉，具足威儀、行處，見細微罪能生怖畏。比丘具足戒住，善攝持波羅提木叉，具足威儀、行處，見細微罪能生怖畏，等受學戒，令三學修習滿足。何等為三？

(03) 〔謂〕增上戒學、增上意學、增上慧學。

(4a) 何等為增上戒學？

(4b) 是比丘〔戒滿足〕，少定、少慧。

(4c) 於彼彼分細微戒，乃至受持戒學。

(4d) 彼如是知、如是見，斷三結，謂身見、戒取、疑。斷此三結，得須陀洹，不墮惡趣，決定正趣三菩提，七有天人往生，究竟苦邊。

(5a) 何等為增上意學？

(5b) 是比丘〔戒滿足〕，三昧滿足，少於慧。

(5c) 彼彼分細微戒，犯則隨悔，乃至受持學戒。

(5d) 如是知、如是見，斷五下分結，謂身見、戒取、疑、貪欲、瞋恚。斷此五下分結，得生般涅槃阿那含，不復還生此世，是名增上意學。

(6a) 何等為增上慧學？

(6b) 是比丘學戒滿足、定滿足、慧滿足。

(6c) 如是知、如是見，欲有漏心解脫，有有漏心解脫，無明有漏心解脫，解脫知見：我生已盡、梵行已立、所作已作、自知不受後有，是名增上慧學。」

(07) 佛說此經已，諸比丘聞佛所說，歡喜奉行。

(印一一一〇)(光八三四)(大八二二)

經文(六二六)

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「若比丘具足戒住，善攝波羅提木叉，具足威儀、行處，見微細罪能生怖畏，受持學戒住，滿足三學。何等為三？

(03) 謂增上戒〔學〕、增上意〔學〕、增上慧〔學〕。

(4a) 何等為增上戒〔學〕？

(4b) 是比丘戒滿足，少定，少慧。

(4c) 於彼彼分細微戒，乃至受持學戒。

(4d) 如是知、如是見，斷三結，貪、恚、癡薄，得一種子道；若彼地未等覺者，得斯陀含；彼地未等覺者，名家家；彼地未等覺者，得須陀洹；彼地未等覺者，得隨法行；彼地未等覺者，得隨信行，是名增上戒學。

(5a) 何等為增上意學？

(5b) 是比丘戒滿足，定滿足，少於慧。

(5c) 於彼彼分細微戒，乃至受持學戒。

(5d) 如是知，如是見，斷五下分結，謂身見、戒取、疑、貪欲、瞋恚。斷此五下分結，得中般涅槃；於彼未等覺者，得生般涅槃；於彼未等覺者，得無行般涅槃；於彼未等覺者，得有行般涅槃；於彼未等覺者，得上流般涅槃，是名增上意學。

(6a) 何等為增上慧學？

(6b) 是比丘學戒滿足、定滿足、慧滿足。

(6c) 如是知、如是見，欲有漏心解脫，有有漏心解脫，〔無明有漏〕心解脫，解脫知見：我生已盡、梵行〔已立〕、所作已作、自知不受後有，是名增上慧學。」

(07) 佛說此經已，諸比丘聞佛所說，歡喜奉行。

(印一一一一)(光八三五)(大八二三)

經文(六二七) 【S 增三. 84】

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「有〔三學〕。何等為三？

(03) 謂〔上戒學〕、上威儀學、上波羅提木叉學。」

(04) 爾時，世尊即說偈言：

學者學戒時，直道隨順行，專審勤方便，善自護其身。
得初漏盡智，次究竟無知，得無知解脫，知見悉已度，
成不動解脫，諸有結滅盡。彼諸根具足，諸根寂靜樂，
持此後邊身，摧伏眾魔怨。

(05) 佛說此經已，諸比丘聞佛所說，歡喜奉行。

(印一一一二)(光八三六)(大八二四)

經文(六二八) 【S 小部. 如是語. 46】

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「學戒多福利，住智慧為上，解脫堅固，念為增上。

(03) 若比丘學戒福利，智慧為上，解脫堅固，念增上已，令三學滿足。何等為三？

(04) 謂增上戒學、增上意學、增上慧學。」

(05) 爾時，世尊即說偈言：

學戒隨福利，專思三昧禪，智慧為最上，現生之最後，
牟尼持後邊，降魔度彼岸。

(06) 佛說此經已，諸比丘聞佛所說，歡喜奉行。

(印一一一三)(光八三七)(大八二五)

經文(六二九)

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：如上說。

- (3a) 差別者：「諸比丘！何等為學戒隨福利？」
- (3b) 謂大師為諸聲聞制戒，所謂攝僧，極攝僧，不信者信，信者增其信，調伏惡人，慚愧者得樂住，現法防護有漏，未來得正對治，令梵行久住。如大師已為聲聞制戒，謂攝僧乃至梵行久住，如是如是，學戒者行堅固戒、恆戒、常行戒、受持學戒，是名比丘戒福利。
- (4a) 何等智慧為上？
- (4b) 謂大師為聲聞說法，大悲哀愍，以義饒益，若安慰、若安樂、若安慰安樂。如是如是，大師為諸聲聞說法，大悲哀愍，以義饒益，安慰安樂；如是如是，於彼彼法、彼彼處，智慧觀察，是名比丘智慧為上。
- (5a) 何等為解脫堅固？
- (5b) 謂大師為諸聲聞說法，大悲哀愍，以義饒益，安慰安樂。如是如是，說彼彼法；如是彼處、如是彼處得解脫樂，是名比丘堅固解脫。
- (6a) 何等為比丘念增上？
- (6b) 未滿足戒身者，專心繫念安住；未觀察者，於彼彼處智慧繫念安住；已觀察者，於彼彼處重念安住；未觸法者，於彼彼處解脫念安住；已觸法者，於彼彼處解脫念安住，是名比丘正念增上。」
- (07) 爾時，世尊即說偈言：
- 學戒隨福利，專思三昧禪，智慧為最上，現生最後邊，
牟尼持後邊，降魔度彼岸。
- (08) 佛說是經已，諸比丘聞佛所說，歡喜奉行。
- (印一一一四)
- (09) 《尸婆迦修多羅》如後，佛當說。
- (10) 如是阿難陀比丘，及異比丘所問、佛問諸比丘，三經亦如上說。
- (印一一一五～一一一七)(光八三八)(大八二六)

經文(六三〇) 【S 增三. 88】

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「有三學。何等為三？」
- (03) 謂增上戒學、增上意學、增上慧學。
- (4a) 何等為增上戒學？

(4b) 若比丘住於戒，波羅提木叉，具足威儀、行處，見微細罪則生怖畏，受持學戒，是名增上戒學。

(5a) 何等為增上意學？

(5b) 若比丘離諸惡不善法，有覺有觀，離生喜樂，初禪具足住；乃至第四禪具足住，是名增上意學。

(6a) 何等為增上慧學？

(6b) 若比丘，此苦聖諦如實知，此苦集聖諦、此苦滅聖諦、此苦滅道跡聖諦如實知，是名增上慧學。」

(07) 佛說此經已，諸比丘聞佛所說，歡喜奉行。

(印一一二三)

(8a) 三學餘經，如前念處說。

(8b) 如禪，如是無量、無色。

(8c) 如四聖諦，如是四念處、四正斷、四如意足、五根、五力、七覺分、八聖道、四道、四法句、止觀修習，亦如是說。

(印一一二四～一一三五)(光八四四)(大八三二)

不壞淨相應/證淨相應

經文（六三一）【S30】

- (01) 如是我聞：一時，佛住毘舍離國獼猴池側重閣講堂。
- (02) 時有善調象師離車，名曰難陀，來詣佛所，稽首佛足，退坐一面。
- (03) 爾時，世尊告離車難陀言：「若聖弟子成就四不壞淨者，欲求壽命，即得壽命；求好色、力、樂、辯、自在即得。何等為四？」
- (04) 謂佛不壞淨成就，法、僧不壞淨，聖戒成就。
- (05) 我見是聖弟子，於此命終，生於天上，於天上得十種法。何等為十？得天壽、天色、天名稱、天樂、天自在、天色、聲、香、味、觸。
- (06) 若聖弟子於天上命終，來生人中者，我見彼十事具足。何等為十？人間壽命、人好色、名稱、樂、自在、色、聲、香、味、觸。我說彼多聞聖弟子，不由他信、不由他欲、不從他聞、不取他意、不因他思，我說彼有如實正慧知見。」
- (07) 爾時，難陀有從者白難陀言：「浴時已到，今可去矣。」
- (08) 難陀答言：「我今不須人間澡浴，我今於此勝妙法以自沐浴，所謂於世尊所得清淨信樂。」
- (09) 爾時離車調象師難陀，聞佛所說，歡喜隨喜，從座起，作禮而去。

(印一一三六)(光八四五)(大八三三)

經文（六三二）【S44】

- (01) 如是我聞：一時，佛住毘舍離國獼猴池側重閣講堂。
- (02) 爾時，世尊告諸比丘：「若聖弟子成就四不壞淨者，不於人中貧活而活，不寒乞自然富足。何等為四？」
- (03) 謂於佛不壞淨成就，法、僧不壞淨，〔聖戒〕成就。
- (04) 是故，比丘！當如是學：我當成就於佛不壞淨，法、僧不壞淨，聖戒成就。」
- (05) 佛說此經已，諸比丘聞佛所說，歡喜奉行。

(印一一三七)(光八四六)(大八三四)

經文（六三三）

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「若信人者，生五種過患。
- (3a) 彼人或時犯戒違律，為眾所棄。恭敬其人者，當作是念：此是我師，我所敬重，眾僧棄薄，我今何緣入彼塔寺！不入塔寺已，不敬眾僧；不敬眾僧已，不得聞法；不聞法已，退失善法，不得久住於正法中，是名信敬人〔故〕生初過患。
- (3b) 復次，敬信人者，所敬之人犯戒違律，眾僧為作不見舉。敬信彼人者，當作是念：此是我師，我所〔敬重〕，而今眾僧作不見舉，我今何緣復入塔寺！不入塔寺已，不敬眾僧；不敬眾僧已，不得聞法；不聞法已，退失善法，不得久住於正法中，是名敬信人故生第二過患。
- (3c) 復次，彼人若持衣鉢，餘方遊行。敬彼人者而作是念：我所敬人，著衣持鉢，人間遊行，我今何緣入彼塔寺！不入塔寺已，不得恭敬眾僧；不敬眾僧已，不得聞法；不聞法已，退失善法，不得久住於正法中，是名敬信人故生第三過患。
- (3d) 復次，彼所信敬人，捨戒還俗。敬信彼人者而作是念：彼是我師，我所敬重，捨戒還俗，我今不應入彼塔寺。不入寺已，不敬眾僧；不敬眾僧已，不得聞法；不聞法已，退失善法，不得久住於正法中，是名敬信人故生第四過患。
- (3e) 復次，彼所信敬人，身壞命終。敬信彼人者而作是念：彼是我師，我所敬重，今已命終，我今何緣入彼塔寺！不入寺故，不得敬僧；不敬僧已，不得聞法；不聞法故退失善法，不得久住於正法中，是名敬信人故生第五過患。
- (04) 是故諸比丘當如是學：我當成就於佛不壞淨，於法、僧不壞淨，聖戒成就。」
- (05) 佛說此經已，諸比丘聞佛所說，歡喜奉行。

（印一一四〇）（光八四九）（大八三七）

經文（六三四）【S31】

- (01) 如是我聞：一時，佛住舍衛國祇樹給孤獨園。
- (2a) 爾時，世尊告諸比丘：「有四種食，長養眾生四大，增長攝受。何等為四？
- (2b) 謂搏食、觸食、意思食、識食。

- (3a) 如是福德潤澤，為安樂食。何等為四？
 (3b) 謂於佛不壞淨，於法、僧不壞淨，聖戒成就。
 (04) 是故諸比丘當作是學：我當成就於佛不壞淨，於法、僧不壞淨，聖戒成就。」
 (05) 佛說此經已，諸比丘聞佛所說，歡喜奉行。
 (印一一四一)(光八五〇)(大八三八)

經文(六三五)【S32, 42】

- (01) 如是我聞：一時，佛住舍衛國祇樹給孤獨園。
 (02) 爾時，世尊告諸比丘：如上說。
 (03) 差別者：「於佛不壞淨成就者，為聞法，眾僧所念，聖戒成就。」
 (04) 佛說此經已，諸比丘聞佛所說，歡喜奉行。
 (印一一四二)(光八五一)(大八三九)
 (05) 次經亦如上說。
 (06) 差別者：「若於佛不壞淨成就者；法；僧；慳垢纏眾生離慳垢心，在家而住解脫心施、常行樂施、常樂於捨、行平等施；聖戒成就。」
 (07) 佛說此經已，諸比丘聞佛所說，歡喜奉行。
 (印一一四三)(光八五二)(大八四〇)
 (08) 次經亦如上說。
 (09) 差別者：「如是聖弟子，四種福德潤澤、善法潤澤、攝受稱量功德，不可稱量爾所〔福〕、爾所果、爾所福果集，然彼得眾多福利，是大功德聚數。
 (10) 譬如五河合流，謂恆河、耶菩那、薩羅由、伊羅跋提、摩醯，於彼諸水，無能度量百瓶、千瓶、百千萬瓶者，然彼水多，是大水聚數。
 (11) 如是聖弟子成就四功德潤澤者，無能度量其福多少，然彼多福，是大功德聚數。
 (12) 是故諸比丘當作是學：我當成就於佛不壞淨，於法、僧不壞淨，聖戒成就。」
 (13) 爾時，世尊即說偈言：
 眾吉之巨海，自淨能淨彼，汪洋而平流，實諸百川長。
 一切諸江河，群生之所依，悉歸於大海，此身亦復然，
 施戒修功德，百福流所歸。

(14)〔佛說此經已，諸比丘聞佛所說，歡喜奉行。〕

(印一一四四)(光八五三)(大八四一)

經文(六三六)【S12】

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「婆羅門者說虛偽道，愚癡、惡邪、不正趣向，非智等覺向於涅槃。彼作如是化諸弟子：於十五日，以胡麻屑、菴羅摩羅屑，沐浴身體，著新劫貝，頭垂長縷，牛屎塗地而臥於上。言：善男子！晨朝早起，脫衣舉著一處，裸其形體，向東方馳走，正使道路逢兇象、惡馬、狂牛、獬狗、棘刺、叢林、坑澗、深水，直前莫避，遇害死者，必生梵天。是名外道愚癡、邪見，非智等覺向於涅槃。」

(03) 我為弟子說平正路，非愚癡，向智慧等覺，向於涅槃，謂八聖道：正見乃至正定。」

(04) 佛說此經已，諸比丘聞佛所說，歡喜奉行。

(印一一四五)(光八五四)(大八四二)

經文(六三七)【S5】

(01) 如是我聞：一時，佛住舍衛國祇樹給孤獨園。

(02) 爾時，世尊告尊者舍利弗：「所謂流者，何等為流？」

(03) 舍利弗白佛言：「世尊所說流者，謂八聖道。」

(04) 復問舍利弗：「〔所謂〕入流分，何等為入流分？」

(05) 舍利弗白佛言：「世尊！有四種入流分。何等為四？謂親近善男子、聽正法、內正思惟、法次法向。」

(06) 復問舍利弗：「入流者，成就幾法？」

(07) 舍利弗白佛言：「有四分成就入流者。何等為四？謂於佛不壞淨、於法不壞淨、於僧不壞淨、聖戒成就。」

(8a) 佛告舍利弗：「如汝所說，流者謂八聖道。」

(8b) 入流分者有四種，謂親近善男子、聽正法、內正思惟、法次法向。

(8c) 入流者成就四法，謂於佛不壞淨、於法不壞淨、於僧不壞淨、聖戒成就。」

(09) 佛說此經已，尊者舍利弗聞佛所說，歡喜奉行。

(印一一四六)(光八五五)(大八四三)

經文（六三八）【S13, 4】

- (01) 如是我聞：一時，佛住舍衛國祇樹給孤獨園。
- (02) 爾時，尊者舍利弗詣尊者阿難所，問訊慰勞已，退住一面。尊者舍利弗語尊者阿難：「欲有所問，寧有閑暇為記說不？」
- (03) 尊者阿難語舍利弗：「隨意所問，知者當答。」
- (04) 舍利弗問尊者阿難：「為斷幾法，如來、應、等正覺所知所見，記說彼人得須陀洹，不墮惡趣法，決定向正覺，七有天人往生，究竟苦邊？」
- (05) 尊者阿難語尊者舍利弗：「斷四法、成就四法，如來、應、等正覺，記說彼人得須陀洹，不墮惡趣法，決定向三菩提，七有天人往生，究竟苦邊。何等為四？」
- (6a) 謂聖弟子，於佛不信住則已斷、已知，成就於佛不壞淨。
- (6b) 於法、僧不信，惡戒，彼則已斷、已知，成就法、僧不壞淨，及聖戒成就。
- (07) 如是四法斷、四法成就，如來、應、等正覺所知所見，記說彼人得須陀洹，不墮惡趣法，決定正向三菩提，七有天人往生，究竟苦邊。」
- (08) [尊者舍利弗語尊者阿難]：「如是！如是！四法斷、四法成就，如來、應、等正覺所知所見，記說彼人得須陀洹，決定正向三菩提，七有天人往生，究竟苦邊。」
- (09) 時二正士共論議已，展轉隨喜，從座起去。

(印一一四七)(光八五六)(大八四四)

經文（六三九）【S43】

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「若比丘於五恐怖、怨對休息，三事決定不生疑惑，如實知見賢聖正道，彼聖弟子能自記說：地獄、畜生、餓鬼惡趣已盡，得須陀洹，不墮惡趣法，決定正向三菩提，七有天人往生，究竟苦邊。」
- (03) 何等為五恐怖、怨對休息？
- (4a) 若殺生因緣罪，怨對恐怖生，若離殺生者，彼殺生罪怨對因緣生恐怖休息。
- (4b) 若偷盜、邪淫、妄語、飲酒罪，怨對因緣生恐怖，彼若離偷盜、邪淫、妄語、飲酒罪，怨對者因緣恐怖休息。

- (05) 是名罪怨對因緣生五恐怖休息。
- (06) 何等為三事決定，不生疑惑？
- (7a) 謂於佛決定離於疑惑。
- (7b) 於法、僧決定離疑惑。
- (08) 是名三法決定離疑惑。
- (09) 何等名為聖道如實知見？
- (10) 謂此苦聖諦如實知，此苦集聖諦、此苦滅聖諦、此苦滅道跡聖諦如實知。
- (11) 是名聖道如實知見。
- (12) 若於此五恐怖罪怨對休息，於三法決定離疑惑，於〔聖道〕如實知見，是聖弟子能自記說：我地獄盡，畜生、餓鬼惡趣盡，得須陀洹，不墮惡趣法，決定正趣三菩提，七有天人往生，究竟苦邊。」
- (13) 佛說此經已，諸比丘聞佛所說，歡喜奉行。

(印一一四八)(光八五七)(大八四五)

經文(六四〇)【S29, 28】

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：如上說。
- (03) 差別者：「何等為聖道如實知見？
- (04) 謂八聖道：正見乃至正定。」

(印一一四九)

- (05) 次經亦如是說。
- (06) 差別者：「何等為聖道如實知見？
- (07) 謂十二支緣起如實知見，如所說：是事有故是事有，是事起故是事起，如緣無明行，緣行識，緣識名色，緣名色六入處，緣六入處觸，緣觸受，緣受愛，緣愛取，緣取有，緣有生，緣生老病死、憂悲惱苦。
- (08) 是名聖弟子如實知見。」
- (09) 佛說此經已，諸比丘聞佛所說，歡喜奉行。

(印一一五〇)(光八五八)(大八四六)

經文(六四一)【S1】

- (01) 如是我聞：一時，佛住舍衛國祇樹給孤獨園。

- (2a) 爾時，世尊告諸比丘：「轉輪王七寶具足成就，人中四種神力，王四天下；身壞命終，生於天上。雖復轉輪聖王七寶具足，成就人間神力，王四天下，身壞命終得生天上，然猶未斷地獄、畜生、餓鬼惡趣之苦。所以者何？
- (2b) 以轉輪王不得於佛不壞淨，法、僧不壞淨，聖戒不成就故。
- (3a) 多聞聖弟子，持糞掃衣，家家乞食，草蓐臥具，而彼多聞聖弟子，解脫地獄、畜生、餓鬼惡趣之苦。所以者何？
- (3b) 以彼多聞聖弟子，於佛不壞淨，法、僧不壞淨，聖戒成就。
- (04) 是故諸比丘當作是學：於佛不壞淨，法、僧不壞淨，聖戒成就。」
- (05) 佛說此經已，諸比丘聞佛所說，歡喜奉行。

(印一一三八)(光八四七)(大八三五)

經文(六四二)【S16-17】

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「汝等當起哀愍心、慈悲心，若有人於汝等所說樂聞、樂受者，汝當為說四不壞淨，令入、令住。何等為四？
- (03) 於佛不壞淨、於法不壞淨、於僧不壞淨、於聖戒成就。所以者何？
- (04) 若四大——地、水、火、風有變易增損，此四不壞淨未嘗增損變異。
- (05) 彼無增損變異者，謂多聞聖弟子，於〔佛不壞淨，法、僧不壞淨、聖戒成就〕，若墮地獄、畜生、餓鬼者，無有是處。
- (06) 是故諸比丘當作是學：我當成就於佛不壞淨，法、僧不壞淨，聖戒成就；亦當建立餘人令成就。」
- (07) 佛說此經已，諸比丘聞佛所說，歡喜奉行。

(印一一三九)(光八四八)(大八三六)

經文(六四三)【S34】

- (01) 如是我聞：一時，佛住舍衛國祇樹給孤獨園。
- (02) 爾時，世尊告諸比丘：「有四種諸天天道，未淨眾生令淨，已淨者重令淨。何等為四？
- (03) 謂聖弟子，於佛不壞淨，於法、僧不壞淨，聖戒成就，是名四種諸天天道，未淨眾生令淨，已淨者重令淨。」

(04) 佛說此經已，諸比丘聞佛所說，歡喜奉行。

(印一一五一)(光八五九)(大八四七)

經文(六四四)【S35】

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「有四種諸天天道。何等為四？」

(3a) 謂聖弟子念如來事：如是如來、應、等正覺、明行足、善逝、世間解、無上士、調御丈夫、天人師、佛、世尊。於此如來事，生隨喜心，隨喜已心歡悅，心歡悅已身猗息，身猗息已覺受樂，覺受樂已三昧定。三昧定已，聖弟子作如是學：何等為諸天天道？復作是念：我聞無恚為上諸天天道。作是念：我從今日，於世間若怖、若安，不起瞋恚，我但當自受純一滿淨諸天天道。是名第一諸天天道，未淨眾生令淨，已淨者重令淨。

(3b) 復次，比丘！聖弟子念於法事：謂如來說正法律，現法、離諸熾然、不待時節、通達涅槃、即身觀察、緣自覺知。如是知法事已，心生隨喜，隨喜已身猗息，身猗息已覺受樂，覺受樂已三昧定。三昧定已，聖弟子作如是學：何等為諸天天道？復作是念：我聞無恚為上諸天天道。我從今日，於此世間，若怖、若安，不起瞋恚，我當受持純一滿淨諸天天道，是名第二諸天天道。

(3c) 復次，比丘！若於僧事起於正念：謂世尊弟子僧，正直、等向，所應恭敬、尊重、供養，無上福田。彼如是於諸僧事正憶念已，心生隨喜，心隨喜已得歡悅，歡悅已身猗息，身猗息已覺受樂，覺受樂已三昧定。三昧定已，彼聖弟子作如是學：何等諸天天道？復作是念：我聞諸天無恚為上諸天天道。我從今日，於諸世間，若怖、若安，不起瞋恚，我但當受持純一滿淨諸天天道，是名第三諸天天道。

(3d) 復次，比丘！謂聖弟子自念所有戒事，隨憶念言：我於此不缺戒、不汙戒、不雜戒、明智所歎戒、智者不厭戒，於如是等戒事正憶念已，心生隨喜，隨喜已歡悅，歡悅已身猗息，身猗息已覺受樂，覺受樂已三昧定。三昧定已，聖弟子作是念：何等為諸天天道？復作是念：我聞諸天無恚為上。我從今日，於諸世間，若怖、若安，不起瞋恚，我當受持純一滿淨諸天天道。是名第四諸天天道，未淨眾生令淨，已淨者重令淨。」

(04) 佛說此經已，諸比丘聞佛所說，歡喜奉行。

(印一一五二)(光八六〇)(大八四八)

經文(六四五)

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「有四種諸天天道，未淨眾生令淨，已淨者增其淨。何等為四？

(3a) 謂聖弟子念如來事：如是如來、應、等正覺、明行足、善逝、世間解、無上士、調御丈夫、天人師、佛、世尊。彼如是念如來事已，則斷惡貪，及斷心惡不善過。念如來故，心生隨喜，心隨喜已則歡悅，歡悅已身猗息，身猗息已覺受樂，覺受樂已三昧定。三昧定已，聖弟子作如是學：何等為諸天天道？復作是念：我聞無恚為上諸天天道。我從今日，於諸世間，若怖、若安，不起瞋恚，但當受持純一滿淨諸天天道。

(3b) 如是法、僧，聖戒成就，亦如是說。」

(04) 佛說此經已，諸比丘聞佛所說，歡喜奉行。

(印一一五三)(光八六一)(大八四九)

經文(六四六)

(01) 如是我聞：一時，佛住舍衛國祇樹給孤獨園。

(02) 爾時，世尊告諸比丘：「有四種諸天天道，未淨眾生令淨，已淨者增其淨。何等為四？

(3a) 謂聖弟子念如來事：如是如來、應、等正覺、明行足、善逝、世間解、無上士、調御丈夫、天人師、佛、世尊。彼聖弟子念如來事已，〔心離〕貪欲纏、瞋恚、愚癡纏；其心正直，念如來事，是聖弟子得法流水，得義流水，得念如來饒益隨喜。隨喜已生歡悅，歡悅已身猗息，身猗息已覺受樂，覺受樂已三昧定。三昧定已，是聖弟子作如是學：何等為諸天天道？復作是念：我聞無恚為上諸天天道，我從今日，於諸世間不起瞋恚，純一滿淨諸天天道。

(3b) 如是法、僧，聖戒成就，亦如是說。」

(04) 佛說此經已，諸比丘聞佛所說，歡喜奉行。

(印一一五四)(光八六二)(大八五〇)

經文（六四七）

- （01）如是我聞：一時，佛住舍衛國祇樹給孤獨園。
- （02）爾時，世尊告諸比丘：「我今當說《法鏡經》。諦聽！善思！當為汝說。何等為《法鏡經》？」
- （03）謂聖弟子於佛不壞淨，於法、僧不壞淨，聖戒成就，是名《法鏡經》。」
- （04）佛說此經已，諸比丘聞佛所說，歡喜奉行。

（印一一五五）（光八六三）（大八五一）

經文（六四八）【S8】

- （01）如是我聞：一時，佛住舍衛國祇樹給孤獨園。
- （02）時有眾多比丘，著衣持鉢，入舍衛城乞食。乞食時，聞難屠比丘命終、難陀比丘尼命終、善生優婆塞命終、善生優婆夷命終。
- （03）乞食已，還精舍，舉衣鉢，洗足已，詣佛所，稽首禮足，退坐一面，白佛言：「世尊！我今晨朝入舍衛城乞食，聞難屠比丘、難陀比丘尼、善生優婆塞、善生優婆夷命終。世尊！彼四人命終，應生何處？」
- （04）佛告諸比丘：「彼難屠比丘、難陀比丘尼，諸漏已盡，無漏心解脫，慧解脫，現法自知作證：我生已盡、梵行已立、所作已作、自知不受後有。
- （05）善生優婆塞、善生優婆夷，五下分結盡，得阿那含，生於天上而般涅槃，不復還生此世。」
- （06）爾時，世尊告諸比丘：「我今當為汝說《法鏡經》：於佛不壞淨，乃至聖戒成就，是名《法鏡經》。」
- （07）佛說此經已，諸比丘聞佛所說，歡喜奉行。

（印一一五六）（光八六四）（大八五二）

經文（六四九）【S9】

- （01）如是我聞：一時，佛住舍衛國祇樹給孤獨園。如上廣說。
- （02）差別者：有異比丘、異比丘尼、異優婆塞、異優婆夷命終，亦如上說。

（印一一五七）（光八六五）（大八五三）

經文（六五〇）【S10】

- (01) 如是我聞：一時，佛住那梨迦聚落繁耆迦精舍。
- (02) 爾時，那梨迦聚落多人命終。
- (03) 時有眾多比丘，著衣持鉢，入那梨迦聚落乞食。聞那梨迦聚落：
罽迦舍優婆塞命終，尼迦吒、佉楞迦羅、迦多梨沙、婆闍露、
優婆闍露、梨色吒、阿梨色吒、跋陀羅須跋陀羅、耶舍、耶輸
陀、耶舍鬱多羅，悉皆命終。
- (04) 聞已，還精舍，舉衣鉢，洗足已，詣佛所，稽首佛足，退坐一
面，白佛言：「世尊！我等眾多比丘，晨朝入那梨迦聚落乞食，
聞罽迦舍優婆塞等命終。世尊！彼等命終，當生何處？」
- (05) 佛告諸比丘：「彼罽迦舍等，已斷五下分結，得阿那含，於天
上般涅槃，不復還生此世。」
- (06) 諸比丘白佛：「世尊！復有過二百五十優婆塞命終，復有五百
優婆塞，於此那梨迦聚落命終。〔世尊！彼等命終，當生何
處？〕」
- (07) 佛告諸比丘：「〔此那梨迦聚落，過二百五十優婆塞命終，皆
三結盡，貪、恚、癡薄，得斯陀含，當受一生，究竟苦邊；復
有五百優婆塞，於此那梨迦聚落命終，三結盡，得須陀洹，不
墮惡趣法，決定正向三菩提，七有天人往生，究竟苦邊。〕
- (08) 汝等隨彼命終、彼命終而問者，徒勞耳！非是如來所樂答者。
夫生者有死，何足為奇！如來出世及不出世，法性常住。
- (08) 彼如來自知成等正覺，顯現、演說、分別、開示，所謂是事有
故是事有，是事起故是事起，緣無明有行，乃至緣生有老病死、
憂悲惱苦，如是苦陰集。無明滅則行滅，乃至生滅則老病死、
憂悲惱苦滅，如是苦陰滅。
- (09) 今當為汝說《法鏡經》，諦聽！善思！當為彼說。何等為《法
鏡經》？謂聖弟子於佛不壞淨，於法、僧不壞淨，聖戒成就。」
- (10) 佛說此經已，諸比丘聞佛所說，歡喜奉行。

（印一一五八）（光八六六）（大八五四）

經文（六五一）【S40】

- (01) 如是我聞：一時，佛住舍衛國祇樹給孤獨園。

- (02) 時有難提優婆塞，來詣佛所，稽首佛足，退坐一面，白佛言：「世尊！若聖弟子，於此五根一切時不成就者，為放逸、為不放逸？」
- (03) 佛告難提：「若於此五根一切時不成就者，我說此等為凡夫數。若聖弟子不成就者，為放逸，〔非〕不放逸。」
- (4a) 難提！若聖弟子，於佛不壞淨成就而不上求，不於空閑林中，若露地坐，晝夜禪思，精勤修習勝妙出離，饒益隨喜；彼不隨喜已歡喜不生，歡喜不生已身不猗息，身不猗息已苦覺則生，苦覺生已心不得定。心不得定者，是聖弟子名為放逸。
- (4b) 於法、僧不壞淨，聖戒成就，亦如是說。
- (5a) 如是難提！若聖弟子成就於佛不壞淨，其心不起知足想，於空閑林中，樹下、露地，晝夜禪思，精勤方便，能起勝妙出離隨喜；隨喜已生歡喜，生歡喜已身猗息，身猗息已覺受樂，覺受樂已心則定。若聖弟子心定者，名不放逸。
- (5b) 法、僧不壞淨，聖戒成就，亦如是說。」
- (06) 佛說此經已，難提優婆塞聞佛所說，歡喜隨喜，從座起，禮佛足而去。

(印一一五九)(光八六七)(大八五五)

經文(六五二)

- (01) 如是我聞：一時，佛住舍衛國祇樹給孤獨園。
- (02) 時有釋氏難提，來詣佛所，稽首佛足，退坐一面，白佛言：「世尊！若聖弟子於四不壞淨一切時不成就者，是聖弟子為是放逸，為不放逸？」
- (03) 佛告釋氏難提：「若於四不壞淨一切時不成就者，我說是等為外凡夫數。」
- (04) 釋氏難提！若聖弟子放逸、不放逸，今當說，廣說如上。
- (05) 佛說此經已，釋氏難提聞佛所說，歡喜隨喜，從座起，作禮而去。

(印一一六〇)(光八六八)(大八五六)

經文(六五三)

- (01) 如是我聞：一時，佛住舍衛國祇樹給孤獨園。前三月夏安居竟。

- (02) 有眾多比丘集於食堂，為佛縫衣。如來不久作衣竟，當著衣持鉢，出精舍，人間遊行。
- (03) 時釋氏難提，聞眾多比丘集於食堂，為佛縫衣；如來不久作衣竟，著衣持鉢，人間遊行。
- (04) 釋氏難提聞已，來詣佛所，稽首禮足，退坐一面，白佛言：「世尊！我今四體支解，四方易韻，先所聞法，今悉迷忘。聞眾多比丘集於食堂，為世尊縫衣，言如來不久作衣竟，著衣持鉢，人間遊行。是故我今心生大苦，何時當復得見世尊及諸知識比丘！」
- (05) 佛告釋氏難提：「汝見佛、若不見佛，若見知識比丘、若不見，汝當隨時修習五種歡喜之處。何等為五？」
- (6a) 汝當隨時念如來事：如來、應、等正覺、明行足、善逝、世間解、無上士、調御丈夫、天人師、佛、世尊；
- (6b) 法事；
- (6c) 僧事；
- (6d) 自持戒事；
- (6e) 自行世事，隨時憶念：我得已利，我於慳垢眾生所，當多修習離慳垢住，修解脫施、捨施、常熾然施、樂於捨、平等惠施、常懷施心。
- (07) 如是釋氏難提！此五支定，若住、若行、若坐、若臥，乃至妻子俱，常當繫心此三昧念。」
- (08) 佛說此經已，釋氏難提聞佛所說，歡喜隨喜，作禮而去。

(印一一六一)(光八六九)(大八五七)

經文(六五四)

- (01) 如是我聞：一時，佛住舍衛國祇樹給孤獨園。前三月夏安居。
- (02) 時有釋氏難提，聞佛於舍衛國祇樹給孤獨園，前三月結夏安居。聞已作是念：我當往彼，并復於彼造作供養眾事，供給如來及比丘僧。即到彼。
- (03) 三月竟時，眾多比丘集於食堂，為世尊縫衣，而作是言：如來不久作衣竟，著衣持鉢，人間遊行。
- (04) 時釋氏難提，聞眾多比丘集於食堂，言如來不久作衣竟，著衣持鉢，人間遊行。聞已，來詣佛所，稽首禮足，退住一面，白

佛言：「世尊！我今四體支解、四方易韻，先所受法，今悉迷忘。我聞世尊人間遊行，我何時當復更見世尊及諸知識比丘！」

(05) 佛告釋氏難提；「若見如來、若不見，若見知識比丘、若不見，汝當隨時修於六念。何等為六？

(06) 當念如來、法、僧事、自所持戒、自所行施，及念諸天。」

(07) 佛說此經已，釋氏難提聞佛所說，歡喜隨喜，作禮而去。

(印一一六二)(光八七〇)(大八五八)

經文(六五五)

(01) 如是我聞：一時，佛住舍衛國祇樹給孤獨園。前三月結夏安居，如前說。

(02) 差別者：時有長者，名梨師達多及富蘭那，兄弟二人，聞眾多比丘集於食堂，為世尊縫衣，如上《難提修多羅》廣說。

(03) 佛說此經已，梨師達多長者及富蘭那，聞佛所說，歡喜隨喜，從座起，作禮而去。

(印一一六三)(光八七一)(大八五九)

經文(六五六)【S6】

(01) 如是我聞：一時，佛住舍衛國祇樹給孤獨園。前三月結夏安居竟。

(02) 眾多比丘集於食堂，為世尊縫衣。

(03) 時有長者梨師達多，及富蘭那兄弟二人，於鹿徑澤中修治田業。聞眾多比丘，在於食堂，為世尊縫衣。言如來不久作衣竟，著衣持鉢，人間遊行。

(04) 聞已，語一士夫言：「汝今當往詣世尊所，瞻視世尊。若必去者，速來語我！」

(05) 時彼士夫，即受教敕，往到一處，見世尊出，即速來還，白梨師達多及富蘭那：「世尊已來，及諸大眾。」

(06) 時梨師達多及富蘭那，往迎世尊。

(07) 世尊遙見梨師達多及富蘭那，隨路而來，即出路邊，敷尼師壇，正身端坐。

(08) 梨師達多及富蘭那，稽首佛足，退坐一面，白佛言：「世尊！我今四體支解，四方易韻，所憶念事，今悉迷忘。何時當復得見世尊，及諸知識比丘？世尊今出至拘薩羅，從拘薩羅至伽

(09) 佛告梨師達多及富蘭那：「汝見如來及不見如來，見諸知識比丘及不見，汝且隨時修習六念。何等為六？汝當念如來事，廣說乃至念天。然其長者！在家〔憤鬧〕，在家染著，出家空閑；難可俗人處於非家，一向鮮潔，純一滿淨，梵行清白。」

(10) 長者白佛：「奇哉！世尊！善說此法。在家〔憤鬧〕，在家染著，出家空閑；難可俗人處於非家，一向鮮潔，純一滿淨，梵行清白。」

(11) 我是波斯匿王大臣，波斯匿王欲入園觀，令我乘於大象，載王第一宮女。一在我前，一在我後，我坐其中。象下坡時，前者抱〔我頸〕，後者攀我背；象上坡時，後者抱〔我項〕，前者攀我衿。彼諸嫖女，為娛樂王故，衣繒綵衣，著眾妙香，瓔珞莊嚴。

(12) 我與同遊，常護三事：一者、御象恐失正道；二、自護心恐生染著；三、自護持恐其顛墜。世尊！我於爾時，於王嫖女，無一剎那不正思惟。」

(13) 佛告長者：「善哉！善哉！能善護心。」

(14) 長者白佛：「我在家中所有財物，常與世尊及諸比丘、比丘尼、優婆塞、優婆夷等共受用，不計我所。」

(15) 佛告長者：「善哉！善哉！汝拘薩羅國錢財巨富，無有與汝等者，而能於財不計我所！」

(16) 爾時，世尊為彼長者種種說法，示、教、照、喜；示、教、照、喜已，從座而去。

《雜阿含經・道品》/求那跋陀羅法師譯；
林崇安編輯--[桃園縣]中壢市：內觀教育基金會，
民 92

面：29x21 公分 --（佛法教學系列：A4）

ISBN：957-28672-0-2（平裝）

1. 阿含部

221.84

92005645

《雜阿含經・道品》

編輯：林崇安教授

出版：[桃園縣]中壢市內觀教育基金會

助印郵撥：19155446 財團法人內觀教育基金會

通訊：320 中壢郵政 9-110 信箱。或：

桃園縣大溪鎮頭寮福安里十鄰 12 之 3（大溪內觀教育禪林）

電話和手機：(03)485-2962；0937-126-660

傳真：(03)425-8073

網址：<http://www.insights.org.tw>

初版：【內觀教育版】2003

再版日期：2008 年 3 月